

NATIONAL ASSEMBLY OF SEYCHELLES

Thursday 09th November 2023

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Bonzour. Bonzour tout le monde, bonzour Manm Onorab, bonzour nou zofisyen Lasanble. Bonzour nou piblik ki swiv nou e mersi ankor pour zot partisipasyon. Nou a kontinyen avek deba e mon a demann madanm rapporter pour apel Minis pour ekout entervansyon Manm.

Bonzour Minis Naadir Hassan, Minis pour Finans, Plan Ekonomik e Komers. E byenveni ankor enn fwa dan Lasanble. Nou kontinyen avek deba bann Manm e lo lalis premye laparol i pour Onorab John Hoareau.

HON JOHN HOAREAU

Mersi Mr Speaker. Bonzour Mr Speaker, bonzour tou dimoun ki a lekout. En bonzour spesyal zabitan Beau Vallon e Ton Pol ek Kathleen Denis, Canada ki mon konnen zot pe ekout nou *life*. Laura Pouponneau, Langlete osi ki

bann dimoun ki souvandfwa ekout nou *livestream*.

Mr Speaker yer *Leader* Lopozisyon ler ti pe koz lo trezyenm mwan saler, ti fer remarke ki Prezidan pa fer okenn *appraisal* me selman i pran tou sa ki pour li. Mon le fer ki rekonnexion ki Prezidan i fer en *appraisal* tou le 5 an. E tandis ki li i pa'n zanmen debout dan eleksyon, i lo tiket *rebate* la dan Lasanble. E i pa zanmen pour ganny elekte Glacis. Fodre i pran sa an kont.

Mr Speaker, Ladres Bidze 2023 i enn ki'n ganny prepare avek bokou pridans, klervwayans e osi lanbisyon pou anmenn nou pei a en lot nivo.

En nivo ki pou permet nou kontinyen avek sa transformasyon ekonomik, ancouraz partisipasyon Seselwa dan lekonomi avek bi pou kree plis larises.

Sa Bidze i osi enn ki pou anmenn kontinite dan travay ki Gouvernman *LDS* in komanse, la ki nou'n ariv 3 an dan nou manda. An menm tan pour konsolid bann aki sosyal avek en lizye spesyal lo lazene ek spor. Sirtou pour met an plas lenfrastriktir neseser pou preparasyon *CJSOI* e *Beach Soccer World Cup* en 2025.

Mr Speaker, i osi enportan pou fer resorti ki larepons lo merit Bidze pou

donn nou sa loportinite inik pou anmenn en refleksyon Nasyonal lo ki trazekwar nou pei pe pran, e ki fason nou pti Sesel pe navig sa kouran globalizasyon an fas ek bann defi ki prezante parey lager Mwayen Oriyan, Ikrenn, e sanzman klima e osi trafik drog dan rezyon Losean Endyen.

Osi enportan, sa Bidze pe donn nou sa loportinite pou edik nou pep lo son responsabilite anver la patri.

Mr Speaker i enportan pou nou pep konpran ki menm si nou lekonomi pe fer byen, e in fer byen pandan sa 3 lezot lannen, menm si Minis in predir ki i pou kontinyasyon, ki lekonomi pour kontinyen grosi a en to 4poursan lannen 2024, nou bezwen reste disiplinen e pridan dan la fason ki nou zer nou depans e repartaz bann benefis nou zefor e travay dir.

Si nou pa reste disiplinen e rod sa balans ant revini e depans, nou pou senpleman reviv bann leksperyans 2008. Eski zot rapel an 2008, anba Gouvernman US, kot drayver *pickup* ti bezwen dormi dan zot *pickup* devan saylo siman, pou ganny 4 bal siman.

En letan kot ler ti annan zonnyon ti napa ponmdeter e ler ti annan lantir, ti napa delwil. Se pourtan, sa bann

komodite ti tonm dan lalis esansyel ki pa ti sipoze manke.

Mr Speaker, nou'n sorti lwen. Ozordi tou nou zanfan i kapab ganny en goute dan lekol si zot anvi, menm manze midi. Sel keksoz ki nou demann zot se pou pran zot responsabilite pou etidye e prodwi bon rezulta. E ler zot prodwi bon rezulta, Gouvernman i menm ofer zot en labours letid avanse, souvandfwa aletranze.

En keksoz ki souvandfwa bann zenn i pran a la lezer e pa pran kont ki Gouvernman pe envesti en kantite larzan dan zot. La mon le fer rapel lazenes Seselwa, ki anba ladministrasyon US, labours ti'n kennel an 2020.

Mr Speaker, Gouvernman in met R1.3 bilyon dan *social programme* anba Lazans Proteksyon Sosyal. Anba sa programm i annan sifilan larzan pou ed okenn Seselwa ki bezwen led si i tonm dan kategori vilnerab.

Fodore dir ki anba sa programm ti annan bokou labi oparavan, ti annan zonm ek fanm ki ti an bonn sante e ti kapab travay ki ti pe ganny larzan *welfare*, zis akoz zot ti siporter US.

Tandis ki sa bann ki ti malad e pa kapab travay pa ti pe ganny asiste si zot ti dan lopozisyon a sa tan. Dan

welfare ti annan ek nou pa ek nou. Alor serten striktir ti bezwen ganny met an plas pou fer sir ki sa ki merite i ganny asiste. Alor napa rezon pou personn al dormi vant vid. Petet kot fodre amelyore se lavites ki sa prosedir i ganny fer. A mon avi, i pa devret pran plis ki 3 zour pou en laplikasyon *welfare* ganny travay lo la, e larzan ganny donnent.

Me, lafason ki *Leader US* in koz lo dimoun ki al dormi san manze, i fer ou demann ou lekor si i pe viv lo planet *Pluto*. Sa ki i pa dir e fer konpran son siporter, se ki li i pe tous en panson Lasanble, ki ariv pre R50 mil. I pe ganny en lapey konman konsiltan *Leader Lopozisyon* ki apepre R10 mil ankor. I pe ganny osi en lapey konman *Leader Parti US*.

Si vreman son larm ti koule ler i vwar dimoun pe dormi san manze, mon *challenge* li ozordi, Dr Herminie met 50poursan ou saler tou le mwan. E sa 17 milyon ki *US* in anmase in kolekte, ler in vann tou sa bann propriyete malaki dan en fon anba sekirite sosyal e al donn sa bann dimoun ki pe dormi vant vid.

(APPLAUSE)

HON JOHN HOAREAU

Mr Speaker, nou'n vwar, la nou a vwar si son zorey i tann son labous ler i koze. Si i pa fer sa, vedir senpleman pe fer politik bon marse parey *Pinocchio*.

Mr Speaker, lefe ki lasante, ledikasyon e *social programmes* anba Lazans Proteksyon Sosyal in ganny pli gro Bidze i montre vreman ki nou pe reenvestir dan sekter ki tous tou kous sosyete.

Sa lannen lanfaz in ganny mete lo lapey e kondisyon travayer. Mon sir ki lannen prosen e o firamezir ki nou kolekte plis reveni parey Minis in predir, environ 19poursan anplis ki lannen 2023. Mon sir ki kondisyon bann pansonner pou osi amelyore e plis benefis sosyal pour ganny donnent.

Mr Speaker lo size lasante, zabitan La Digue i dir mwan ki zot fyer zot in ganny zot novo lopital. Zot fyer zot in ganny zot novo por e byento lekol e terminal pasaze, menm si son Manm dan Lasanble atraver ou Mr Speaker, Onorab Herminie ti fer petisyon kont sa.

E zot dir ki a lafen, defen devlopman in retour La Digue apre 43 an ki'n ganny inyore. Gouvernman pe osi, kontinyen envestir dan lekol e dan sant lasante en pe partou.

Mon fyer ki parmi sa bann lenvestisman, Lekol

Beau Vallon Segonder pou ganny en novo blok. En novo blok ki pa pou zis servi zanfan Beau Vallon, me osi zanfan Bel Ombre ek Glacis osi.

Mr Speaker, *ex-NIHSS* pour byento ganny renouvre e dedye konman en *Stroke Recovery Centre* e sa pou sirman anmenn bokou lazwa pou en gran nonm paysan ki souden zot lavi in sanz konpletman avek en latak laservel.

Sa group dimoun i bezwen bokou lasistans fizyo, reabilitasyon e sipor pou permet zot repran lavi normal. Sa *aftercare* apre latak i enn ki spesyalize e souvandfwa difisil pou akonpli kot lakour an prenan kont lekipman spesyal ki neseser. Avek sa novo sant zot byennet e rekiperasyon pou sirman vin pli vit.

Mr Speaker, Minis Finans in met plizyer milyon Roupi pou renovasyon bann facilite sportif ki Gouvernman *US* ti'n les tonm an rin. *Palais de sport* ti koule konman pannyen, tandis ki Stad Linite pa ti kapab host foutbol *internasyonal* akoz son sifas pa ti lo standard.

Ozordi *Palais de sport*, Stad Linite, *Indoor Sport Centre* Anse Royale i parmi bann facilite ki pou ganny renouvre, oubyen konstri de novo. Sa i osi enkli

renovasyon *sport centre* e laplenn foutbol Linyon, La Digue. Sa se laprev direk ki Gouvernman *LDS* i reste angaze avek nou lazenes.

Mon demann mon lekor lo ki baz moral *Leader Lopozisyon* i kapab anmenn en kestyon lo reisit nou bann sportif dan Zwe des Ile. Kan se son Gouvernman *US* ki'n les tou sa facilite sportif tonm an rin.

Eski Minis pour Spor ki ozordi pe anmas tou lepokase pou renouvre sa bann facilite i devret *resign?* Oubyen *Leader Lopozisyon* avek son tim perdan ki pa'n fer absoliman nanryen pou lev sport apre dizyem Zwe de Zil, ki devret demisyonna? E ki Seselwa in met zot dan bin listwar ozordi. Mr Speaker, ler nou vvar ki lopozisyon napa – en ler ou a krwar ki lopozisyon napa lanmour prop.

Mr Speaker, lozman pou nou pep i reste parmi en pli gran defi. Gouvernman *LDS* in pe fer tou sa ki posib pou ogmant la kantite *social housing* e *mid-range condominium* pou Lepep Seselwa. Laprev se pli gro Bidze dan lenfra striktir sa lannen. Setadir 22pourstan Bidze lenfra striktir pe al pou konstriksyon lakaz. Yer *Leader Lopozisyon* ti demande, konbyen lakaz ki'n ganny fer apard sa 24/24?

Larepons se 430 *unit* lakaz in ganny konstrir ant 2020 ziska 2023.

(APPLAUSE)

HON JOHN HOAREAU

An plis ki sa. An plis ki sa 164 *unit* in ganny prozekte pou 2024, e ankor 172-*unit* anba Fon Saudi dan 7 distrik ant 2024 a 2026. Parmi, Beau Vallon pou resevwar 8 *unit*, sa i anliny avek proze redvelopman Pascal Village.

Me Minis pa'n aret la, akoz Gouvernman in al pli lwen e met 12 milyon pour *part rental*, pour asiste bann fanmir kot zot *house-hold income* i R19 mil ou mwens. Mr Speaker mon seryezman krwar ki dan konstriksyon lakaz, i annan lespas pou sekter prive ede. Gouvernman pa pou kapab satisfer demann pou lakaz avek resours limite ki i annan.

Mon santi ki nou bezwen angaz nou plis avek sekter prive, lo en baz *public private partnership* kot i posib pour *cross-subsidizing*, vin en modalite ki pou mars tre byen. Nou bezwen osi eksplor bann fason inovativ pou konstrir pli bon marse, san konpromiz konfor e standar.

Mr Speaker, atraver sa Bidze, Gouvernman in pronons son pozisyon klerman lo son bann priyorite stratezik

Nasyonal anliny avek devlopman Nasyonal.

Premye en servis piblik modern.

En nasyon an bonnsante, dezyenm.

Trwazyenm, promosyon lord ek lape e Lalwa.

Katriyenm, en sistenm ledikasyon modern ki reponn bezwen lefitir.

Senkyenm, soutenabilite e rezilyans kont sanzman klima.

Sizyenm, en transformasyon lekonomi, e sa sis pilye ki pour diriz nou ver nou lobzektif final.

Mr Speaker, permet mwan fer en ti analiz lo sa 6 pilye. Nou parti ki ti antre dan lofis anba temm "Sesel pour tou son zanfan", in fer sir ki tou anplwaye dan sekter piblik pa'n perdi zot plas travay akoz zot krwayans politik. In annan bokou ki pe travay konsyansyezman e mon le felisit zot pour sa.

Me malerezman i annan ankor dimoun ki pe trenn lipye e pa pe donn sa servis piblik a la oter ki piblik i espekte. I plis ki ler pou nou ladministrasyon pran sa size pli serye e derasin sa bann move zerb, ki zot sel lanbisyon se pou met retar, fer dimoun fristre e blanm sa ladministrasyon. Sa zwe politik motive par Lopozisyon napa plas dan nou servis piblik.

Mr Speaker, bokou lanfaz pe ganny mete lo en pep an bon sante. Komitman Prezidan Ramkalawan koman *Chairperson* lo sa Komite Nasional pour Obesite, i laprev lenportans sa size.

I malere ki ozordi dan nou pei nou'n vwar disparisyon en laspe nou kiltir, kot bokou nou dimoun ti mars bokou, e angaz zot dan *sport* lo en baz kominoter. San dout labsans legzersis pe kontribye ver obesite e tou sa bann problem medikal ki asosye avek li.

A en serten pwen dan nou listwar, bokou dimoun ti marse pou al travay e konsonnm bokou fri lokal ki ti en pe an abondans partou, partou.

Me avek developman nou'n vwar plis loto e bis koman mwayer transportasyon ki pe ganny servi. E bokou landrwa kot ti plant en pye fri in ganny ranplase par batiman. Modernizasyon i bezwen arive, me nou bezwen pran konsyans ki nou bezwen viv en stil lavi aktiv.

En lekor san legzersis i parey en loto ki ou'n *park* lo bor semen e les dan labandon. Zour ou pou esey re *start* li, son batri pou'n desarze, glob pou'n brile, *starter* pou'n kole e larou pou'n flak. Mr Speaker, sa i lefe.

Mr Speaker, nou lenstitisyon, set a dir Lasanble Nasional, i annan en rol kle pour pas bann bon Lalwa. Dan sa Bidze, nou'n vwar alokasyon pou lapey bann Manm pou zot zwe sa rol.

Me ki nou vwar? En Lopozisyon ki zanmen vot pour okenn Lalwa, menm si Lalwa i souvandfwa bipartisan. Kot Lepep i espekte zot pran en pozisyon rezonnab, nou vwar zot ki zot pa vote. Depi setyenm Lasanble in konmanse, zot in pas zot letan zis *boycott*, *walkout* e rod tou sord fason pou kre konfizyon parmi nou pep. Zanmen zot in deza propoz okenn lamannman, dan okenn Lalwa.

Mr Speaker, pep Seselwa la deor pe kontinyelman demande akoz ki zot - nou pran sa *taxpayers money* pour pey, pour servi pour pey en group dimoun ki sitan negativ, pares e pa prodiktiv.

(APPLAUSE)

HON JOHN HOAREAU

Mr Speaker, Minis in rekonnéti sistem ledikasyon pli modern, ki pou reponn bezwen nou pei dan le fitir i en stratezi enportan pou nou akonplir nou misyon.

Plizyer fwa mon'n fer remarke ki ledikasyon i parey sa *building block*, oubyen sa

beton pou ed nou konstri en sosyete ki pli for e rezilyan.

Mr Speaker, parfwa mon santi mwan artiste ler mon vizit lekol Leta e vwar ki sa menm tablo nwanr e lakre ki'n ganny servi depi letan Herod i ankor metod ki pe ganny itilize pou enskri nou zanfan. In plis ki ler pou nou lekol evolye avek letan modern.

I plis ki ler pou nou war lentegrasyon teknolozik, parey *smart boards* e plis konpiter dan laklas. I plis ki ler ki Gouvernman, ki programm letid tradisyonnal i ganny revize e bann size modern tel konman letid finansyel, letid komunikasyon ek teknolozi, letid sivik e demokrasi i ganny en plas dan *curriculum*.

Pou bann ki pli doue, bann size vokasyonnel – dan bann size vokasyonnel, in plis ki ler pou zot ganny zot lekol vokasyonnel, pou zot ganny en bagaz neseser e ranplas travayer etranze dan domenn konstriksyon e lendistri.

Bokou fwa nou fel pou realize ki problem konportman i vin akoz sistem pa pro-aktiv pou reponn lentere nou bann zanfan. Mr Speaker, vizyon nou Gouvernman lo transformasyon ekonomik i enn ki enportan e ki pou tous 3 sekter kle dan nou lekonomi.

2 ant sa 3 sekter i relye avek zefor pou anmenn sekirite alimanter. Sa se *hi-*

tech farming e lekonomi ble. Tandis ki lot sekter i relye avek servis dan sekter tourizm.

I enportan note ki malgre larive plis touris nou pe ranmas mwens par latet. Touris i zeneralman nou dipen an term reveni total ki i zenere. *Comme* tel, sa sekter i bezwen diversifye son prodwi pour ki Seselwa i benefisyе plis avek bann lavant, bann leksperyans ki zot ofer bann kliyan.

Mr Speaker, nou'n antann en gran koneser ki dir, ki si – ki'n dir ki si i vin o pouvwar i pou retir sa *tax soutenabilite lanvironnman* lo touris. Pou fer desann laz pansyon, donn trezyenm mwan saler, menm si ou prodkтивite pa bon.

Me sa ki sa gran koneser pa dir nou, se ki kote ki i pou ranmas larzan pou fer marse sa pei ler in koup tou souris reveni. Ki fason ki i pou finans bann depans an plis ki in promet sa pep Seselwa?

Pep Seselwa pe demande lekel ki i krwar i a pe anbete?

Eski i sitan napa respe pou sa pep, ki i a pe ensilte zot lentelizans avek en politik demode, en politik enfantil san lozik? Se sa ki mon krwar Onorab Vidot ti pe dekrir koman mank konfyans e mansonz yer. E la mon bezwen dir zot. *Wake up!* E sorti dan sa rev.

Mr Speaker, dezyenm e trwazyenm sekter dan sa transformasyon ekonomik se Sekter Lagrikiltir e Lapes.

Mr Speaker, atraver listwar legzistans, nou legzistans konman imen. Lemonn in temwannyaz plizyer lepok kot in annan lafamin dan Lerop, Lafrik, Sides Lazi e menm Lanmerik. Apre 1927, ler langre artifisyel ti ganny dekouver, ti annan en revolisyon agrikol e lemonn ti krwar ki zanmen lafamin ti pour retournen.

Ozordi avek lenflasyon lo pri manze globalman, leksplozyon popilasyon, menas sanzman klima e lager, in fer ki size soutenabilite e sekirite alimanter vin en priyrite dan tou pei. I pa drol ki tou pei i bezwen met an plas bann stratezi pou ranforsi zot rezilyans e stabilite entern. Apre tou a '*hungry man is an angry man*'.

Alor Mr Speaker, nou Gouvernman pe met 63 milyon dan en fon ek *DBS* pou don *loan* bann dimoun ki investi dan *hi-tech farming*.

Ankor 45.9 milyon dan sekter lapes pou develop lenfrastriktir e lansman proze *containerized hatchery*, pou akwakiltir e ede relans sa de sekter.

Mr Speaker, mon konvenki, pour ki sa stratezi i vin en sikse, i enportan ki de

keksoz i arive. Premye se transfer teknolozi e dezyenm se formasyon mendev kalifye pou lans sa bann kalite proze.

Nou Gouvernman pou bezwen fer bokou plis pou lev nivo standard e lekol lagrikiltir. Nou bann etidyan i bezwen ganny ekspoze avek nouvo matyer parey teknolozi lagrikiltir, biolozi lamarin. Plis lekipman e teknolozi lagrikiltir e lapes i bezwen ganny mete a zot dispozisyon pou siport sa vizyon. Lespas e teren pour enstal lekipman i osi en defi reel. I enportan ki tou sa mayon i senkronize pou sa stratezi ganny akonpli.

Mr Speaker, dan mon distrik i annan en gran transformasyon enorm pandan sa 3 an ki Gouvernman *LDS* in diriz pei. I vre ki bann pti proze anba Gouvernman Lokal in ganny pa mal retar. Me an zeneral bann lezot proze governmental in pran en bon lelan.

Apre menas degradasyon e sanzman klima, nou zoli lans Beau Vallon preznan pe ganny proteze par de zoli miray ki'n ganny byen apresye par bann zabitan. Menm si en ti group ki ozordi pe servi sa landrwa plis pa ti oule.

Nou bann semen primer i ganny en zoli cours koltar e enkli plizyer lezot ti semen segonder. 4 milyon in ganny mete pou lagrandisman semen

primer an desandan larantre Pascal Village ziska kontour Laflit e miray pou anpes glisman teren ki ti en problemm toulstan pe ganny rezourd.

Mr Speaker, nou'n konstri *bus shelters* e avek alokasyon ki distrik pou gannyen plizyer lezot ti proze semen tel konman premye faz semen Dan Kann La Batie, ekstansyon semen Nouvelle Vallee e Berlin i lo nou azanda. Plizyer *bin sites* in ganny idantifye pou konstri e lezot *bus shelters* pou osi ganny konstri en pe partou, partou.

Devlopman sit Bazar Labrin in konmanse kot en trantenn kiosk pou ganny konstri pou vann lobze artisanal, manze e labwason. Dan sa li menm, i pour donn biznes plis ki 30 dimoun e pou met manze dan lasyet plizyer fanmir.

Proze *PUC* pour enstal *33kv electricity line* pou rezyon nor Mahe in konmanse e proze *sewage* dan rezyon lo lanmar pou konmanse byento apre en retar akoz *wayleave*. Sa i a retir fardo lozistik e finansyel pou ponp *sewage* ki bann fanmir i bezwen sibir de tanzaot akoz sa landrwa i souvandfwa annan en *high water table*.

Lannen 2024 nou pou vwar konmansman premye faz re-devlopman lozman Pascal

Village anba Fon *Saudi* e mon espekte ki dezyenm faz i a kontinyen anba Bidze 2025. Tousala i montre ki Beau Vallon i an mouvman.

Mr Speaker, mon le fer resorti ki se pa toulstan ki i posib tou dimoun dan distrik pou arive ganny sa ki zot demande. Nou napa en Bidze ki san limit e nou napa kapasite pou fer tou keksosz dan en klendey.

Alor i annan serten defi mazer ki nou bezwen konpran e sa i normal. Fodre ki nou pep i les li ganny gide par lespri pozitif e se sa mesaz ki *LDS* pe promouwar.

Mon bann frer pa les bann fo profet e bann ki lafen pouvwar esey derout zot. Bann ki zot sel lanbisyon se pour fann propagann e esey bat latet Seselwa avek bann promes ki zanmen zot pou kapab akonplir.

Mr Speaker, avek sa mwan a remersi ou e avek sa mwan remersi zabitan Beau Vallon ki'n met zot konfyans dan mwan e pour kontinyen met zot konfyans dan mwan pou fer marse zot distrik. Mersi.

(APPLAUSE)

MR SPEAKER

Laparol pour Onorab Sathya Naidu.

HON SATHYA NAIDU

Mersi Mr Speaker. Minis Hassan, tou Manm Onorab, staff Lasanble Nasyonal, zabitant St Louis bonzour. I donn mwan en gran plezir pour mwan prezant mon katriyem repons lo diskour Bidze delivre par Minis Hassan.

Minis, premyerman les mwan dir ou mersi pour lefe ki ou'n vin devan pou pran sa *portfolio* le 7 Novanm 2020. Mon rapel sa zour ki ou ti'n sermente. E fransman dir ou, mon pa ti konnen lekel ou. Mon pa ti konnen ki ou *background* vreman.

Me selman atraver sa 3 an ki ou'n dedye ou letan pour ou pei, pep Seselwa in kapab apresye poudir ki nou annan en Minis Finans ki kosto, ki konpetan. E in kapab vir sa sityasyon ekonomik dir ki nou, nou ti'n erite.

(APPLAUSE)

HON SATHYA NAIDU

E anmenn nou ver en semen kot nou pe bouz ver pozitivite. Mr Speaker, mon le osi remersye tou bann teknisyen ki'n akote Minis. Ki'n donn li sa koudmen e sa sipor neseser. E sa i montre ki zot annan Sesel a ker.

Mr Speaker, ozordi nou'n sirpas lekspektasyon *United*

Seychelles. Dan ki sans? Zour zot ti'n ganny tire o pouvwar zot, zot ti krwar ki vi ki nou ti'n erit pei dan en moman vreman difisil e dir. E annou pa blyie poudir ki zot ti'n kit en kof vid dan letan *COVID*.

Zot ti'n mal zer finans pei. Labi dan tou sort kalite form nou'n vvar pour nou menm. E par lao sa, laplipar nou bann lenfrastriktir ti'n ganny abandonnen. Ti'n tonm an rin. E avek en sityasyon kot nou'n rankontre en kriz lasante avek en kriz finansyel, nou pei ti lo *lock down*. Lekonomi ti lo son zenou. Zot, zot ti krwar ki nou, nou ti pou fel. Me i pa'n arive!

Ler nou'n dir reouver nou frontyer, ki zot ti dir? Pa fer. Ler nou dir nou pe pep pran vaksen, ki zot ti dir? Pa fer. Akoz sa bann desizyon ki nou, nou ti pe pran se pour nou kapab rekouver. E zot, zot pa ti ok avek sa. Mon pa pe dir zot parti.

Me ti annan menm en lesey par 2 sispe pou met bonm kot Stasyon Grand Anse Mahe. Be si sa bonm, *God forbid* dizon ti'n eksplode. Ki kalite konsekans katastrofik eski i ti pou annan lo nou pti pei? E mannyer eski lasenn enternasyonal ti pou'n rapporte lo sa size? Zot ti pou dir Sesel pa *safe*, e sa ti pou afekte nou lekonomi.

Mr Speaker, tousala ti bann lesey pou kree enstabilite dan nou pei, e vir nou pei anba lao. Se sa kalite lopozisyon ki nou annan. Zot pa annan Sesel aker zot. E ou konnen kwa Mr Speaker, in annan tou sort kalite lezot lesey ankor. E menm *Ali*, *Ali* pa'n kapab ed zot, akoz Bondye i lo nou kote. Bondye in toultan bon.

Mr Speaker, devan mwan i en Bidze ki pe sey transform nou pei e anmenn nou pep ver prosperite kot bezwen tou dimoun pe ganny zwenn. Ankor en fwa mon le felisit sa lekip teknisyen ki'n asiste Minis Hassan pou met sa Bidze ansanm.

E mon asire ki i pa en latas ki fasil, espesyalman ler zot bezwen zwenn lekspektasyon ouswa demann sak departman. Me selman mwan mon satisfe avek sa ki'n ganny prezante. I kouver en bout dan tou e i donn nou pep lespwar.

An menm tan i enportan pour nou reflesir ki o debi diskour ki Minis ti'n prezante. E ti'n fer nou fer en analiz lo sityasyon ekonomik lo en baz mondal. Kantmenm i annan en lager ki serten pou dir i napa naryen pou fer ek mwan. Me i annan en lenpak lo nou.

E an menm tan malgre sa, nou sityasyon lo en baz lokal an konparezon avek

bann lezot pei dan larezyon, i enportan ki pep Seselwa i fer sa analiz pou regarde mannyer nou, nou pe performen an konparezon avek bann lezot pei dan rezyon. E menm *au monde*. E fransman dir ou, nou pa pe mal debourye. I en keksoz ki pozitiv. Pozitiv akoz nou annan en Gouvernman ki responsab.

Mr Speaker, mon fermeman krwar selman pour sa Bidze ganny dekrir koman en sikse, fodre ki i ganny enplimante dan en fason ki efikas. E sa i konmans avek sak travayer dan Gouvernman ki resevwar en saler, vi ki sak endividé i annan en responsabilite pour li desarz son fonksyon.

I pa zis lo Minis tousel, non. Par anba li i annan bann lezot dimoun ki travay. E nou annan R3.6 bilyon ki'n ganny met a kote pour reminerasyon ek saler. E sa i konsern saler tou travayer dan nou *civil service*.

Malerezman, i ankor reste sours nou – non selman mon fristrasyon, me fristrasyon pep Seselwa an sa ki konsern lafason ki bann diferan departman dan Gouvernman pe performen. Dimoun i le ki nou ganny en servis ki pli o an term kalite. E menm dele letan ki zot ganny akse avek sa bann servis.

E i kler ki nou Gouvernman, nou'n erit sa.

Nou'n erit en fason fer. E i pa fasil pour nou imedyatman sanz *mindset* dimoun. Me selman nou pe bouz ver *RBM*. Nou pe donn bann lantrennman neseser, bann formasyon neseser pou pli byen ekip nou bann travayer.

E pour bann ki pe travay dir, nou donn zot en 10poursan.

E si zot travay pli dir nou fer sir ki zot trezyenm mwan, baze lo performans. Akoz nou le ki zot performen, ki zot gannyen. Travay pa travay ou gannyen. Sa ti largiman lo kote lot kote latab. *That's their philosophy.* Nou, nou pa krwar ladan Mr Speaker.

Mr Speaker, an relasyon avek mankman mendev. Dan *Mid-Year Review*, in en febles. Pour plizyer lannen i ti'n devret annan en *national manpower planning strategy* an plas pour nou kapab *fill in the gaps where its required*.

Malerezman nou annan par legzanp, tro bokou dimoun pe fer *bachelor's in business administration*. And the market, what happens? It's saturated.

E i annan bann lezot domenn ki bann dimoun i bezwen spesyalize. E alors mon apresye ki Minis in met lanfaz lo la. E mon konnen ki son retonbe pa neseserman ki pou vin demen.

Me dan 3 an, 4 an. Akoz nou konnen ki *course in any degree, its maximum 3 years?* So, obviously by the time it can really feel the effect, i pou pran en pe letan. Me selman mon apresye ki tou sa bann zefor pe ganny mete pou fer nou *civil service* vin enn ki pli efikas. Me selman mon santi ki *mindset* ki bezwen sanze.

Sa bann travayer dan Gouvernman, mon pe lans en lapel avek zot. Aret atann lenstriksyon ki sorti kot zot siperyer pou zot pran aksyon silvouple! Toultan *PS*, ouswa *DG*, ouswa *Minis* ki bezwen dir? Ouswa *MNA* ki bezwen mel dan tou keksoz?

Parfwa mon trouv mwan pe tou – fer *micromanage*. Mon bezwen *micromanage* tou keksoz pour mon zabitan ganny led. E, yer mon'n rekonnent ki Lasanble Nasional pe sansibiliz dimoun lo rol Lasanble.

Me selman, kekfwa en bout ki nou'n manke se *we are the second of everything in the civil service. Unfortunately. We have to ensure* ki lo kote *RBM* nou bezwen fer sir ki i ganny byen enplimante, pour ki bann ki pe kale, pour bann ki pa pe travay *they will be taken to task*.

Fodre ki annan bann target le mwan pour nou regarde mannyer eski zot, zot pe performen. E an plis ki sa i

enportan ki zot, zot pa met politik dan travay. Politik i annan son moman li. Met nou pep a ker dan devlopman. Mazin zot. Mazin zot ki ler zot pe rann sa servis, zot...

Parfwa i annan serten keksoz ki parfwa ler en dimoun i ganny ede, sa kantite gratitud ki zot annan, i en keksoz ki sitan senp. *I'm like, why should you thank me? I'm not doing you any favours. It's a service that you have every right to access to.* E parfwa mon santi se sa ki fer politisyen krwar zot annan pouvwar enorm. Non, i pa devret leka.

Mr Speaker, ler i konsern akse avek bann diferan travayer dan Gouvernman, mon ti pe sey pas lo nou *Government telephone directory*. Mon krwar in plis ki ler pou nou *update* sa, pou fer sir ki limero telefonn tou bann diferan travayer dan Gouvernman i laporte piblik pou piblik *call zot and hold them to task* e fer zot travay.

Ler mon pe koz lo aksesibilite, i fer mwan mazin bann diferan lanons ki'n ganny fer dan Bidze ki an plas. Me selman ou konnen kwa? Parfwa dimoun pa konpran ki kriter ki zot bezwen zwenn pour zot ganny akse avek en servis dan Gouvernman.

E dan serten lenstans, nou fer sir ki pour ou ganny

akse avek sa servis, fodre ki ou konman sa sitwayen pran en serten nivo responsabilite. Sa osi nou bezwen asire ki nou sansibiliz nou pep. Akoz sa dimoun ki napa sa lenformasyon, i vin kot sa travayer dan Gouvernman.

Parfwa i annan travayer dan Gouvernman menm ki pa konnen mannyer serten *scheme* i marse. E alors fodre ki annan bann sansibilizasyon lo en baz entern osi. Akoz parfwa sa travayer dan Gouvernman i napa sa lenformasyon e i mal enform sa dimoun ki pe vin rod sa led. Prezan sa dimoun i vir an ron. E se sa ki kree fristrasyon.

I enportan ki Legzekitiv i angaz li dan bann legzersis serye ler i konsern PR. Mon vreman apresye tou resaman lo kote Departman Finans akoz en *auto dealer* in met en piblikasyon ki fo. Zot in vin devan pou koriz zot a sa ki konsern bann diferan bout pyes e ki kalite benefis ki pe vin pour bann konsonmater.

Me annou pli proaktiv. Annou pa atann lopozisyon pou dir en bann mansonz e apre nou, nou vin devan pou dir *what is the actual truth*. Otan ki nou proaktiv, nou elimin bann posibilite pou les lopozisyon konfiz dimoun. Sel lobligasyon ki Lopozisyon ozordi i annan, se pou sey konfiz dimoun. *Distort larealite*

e kree, e tou bann diferan senaryo, egzazer li.

E nou pa pou kapab les lopozisyon ganny pwen lo nou kot nou konnen ki ozordi konman en Gouvernman, nou pe tap tou pour tou pou delivre pour sa pep. E nou en Gouvernman ki annan nou pep e nou zanfan aker.

Ler mon pe koz lo bann zanfan, nou pe envestir en kantite dan nou sistenm ledikasyon. Nou pe fer zot vin nou priyorte. E menm sa *statutory benefit*, dan sa 7 benefis pros 5 i annan en lenpak lo lavenir nou zanfan.

E ledikasyon. Bann ansennyan zot annan en rol pou zwe. E mon apresye travay ki pe ganny fer. Dan lenstans Lekol Belonie ki mon annan en bon relasyon avek, avek *management* lekol. Mon vwar sa bon travay ki zot pe fer. Parfwa wi, zot dezyenm paran. Lekol i vin dezyenm lakour akoz kot lakour sa zanfan, sa lanvironnman ki sa zanfan i ladan i pa neseserman stab.

E se la kot nou bezwen fer sir ki bann diferan departman tel ki Zafer Fanmir, Sosyal e menm Gouvernman Lokal. E menm lo nivo *Sports and Youth*, pou fer sir ki an deor lekol i annan en lanvironnman ki osi stab. Nou pa konnen ki pe pas dan lespri en zanfan toulstan.

E i enportan ki nou met lanfaz neseser pou kapab ankadre nou bann zanfan an deor lekol atraver bann bon programm ki mon konnen ki nou, nou pou kapab fer si nou met nou lespri ansanm avek bann lotorite distrik atraver pei.

Ou konnen Mr Speaker, rezon mon pe dir sa se akoz ozordi kontan pa kontan, sa sistenm ki'n la in annan en degradasyon moral parmi nou pep. Mon pa pe dir tou, me in annan. In annan en degradasyon sosyal. E parfwa sa bann keksoz ki mon vwar lo teren i regretab akoz paran pa toulstan pe pran zot responsabilite.

Konbyen fwa eski nou vwar lo paz rezo sosyal pour Lapolis poudir zanfan 13 an, 12 an in ganny rapporte manke? But ki kalite ledikasyon eski nou pou donn nou zanfan dan lekol pou dir ki sa ki pe arive i pa akseptab pour lezot pa swiv sa legzanp?

Mr Speaker, i kler ki lo kote lekol, laprantisaz. Ou konnen i annan diferan size ki byensir ou bezwen etidye pour ou ganny en kalifikasyon. Me pli gran size, pli gran legzanmen plito se lavi li menm. E nou bezwen vin avek en size.

Bokou fwa mon'n met lanfaz lo *PSEE*. And I, truth be told, mon pa satisfe. Akoz

mwan mon ti en etidyan an 2010 lekol Belonie S4, S5. Ok? So, mon konnen mannyer sa size ti ete. I enportan ki nou revwar. *Curriculum* i zoli li. Lenplimantasyon ki enportan.

E fodre ki menm *curriculum* an zeneral, Minister Ledikasyon dan lepase zot in dir zot pe revwar *curriculum*.

Mon le konnen kan eski sa revizyon pou fini? Kan eski nou pou bouz ver lenplimantasyon? E eski nou pou toultan dir wi, nou pou met lanfaz lo kiltir, nou pou met lanfaz lo spor, nou pou met lanfaz lo bann lezot abilite?

Me mon le vreman vwar plis zefor pour nou kapab donn lankourazman pour bann zanfan ki pa neseserman akademikman doue. Zot annan bann lezot abilite ki nou bezwen *tap into* pour zot kapab eksplor zot potansyel. E mon santi ki nou, sa Gouvernman ki la nou pou kapab akonplir sa.

Ozordi pli gran kriz ki pe afekte nou zenerasyon se adiksyon drog avek lalkol. Mon le felisit Fady Banane pour sa dokimanter ki i ti'n fer. E i enportan ki sa dokimanter i ganny montre dan tou nou bann lekol pou zot konpran ki kalite lefe, ki kalite lenpak ki i kapab annan

dan lavi en endividé. Lo lavi en fanmir e lo lavi en pei.

E a plizyer repriz, ler mon pe. Mon'n koz lo lasante. Mon'n fer en mansyon avek sant reabilitasyon. Avan ti annan en don *UAE* pou dir ki zot pe konstri en sant reabilitasyon. Ti en sonm ase eleve. E la mon pe vwar ki i annan en sant ki pe ganny konstrir vizavi Klinik *Rivière Anglaise*. Me Selman i kout R15 milyon. Eski sa plan pour sa sant ki ti'n ganny anonse pli boner atraver en don, i ankor lo latab?

Si wi, donn nou plis lespar poudir nou pe bouze ver sa azanda an sa ki konsern reabilitasyon. Akoz fransman dir ou, lo kote programm *methadone*, sa lapse reabilitasyon ti en mankman. E sa sant i en tre bon linisyativ.

E mon vreman kontan ler mon'n vwar sa lanons akoz i donn bann adikt ki pe sey zot mye pou sorti ladan, sa loportinite pou vreman ganny sa lankourazman neseser. E pour sa mon le felisit Departman Lasante, Minister Lasante pour sa linisyativ ki zot, zot pe pran.

An relasyon avek lasante, ankor enn fwa nou pe fer en gran lenvestisman *comme d'habitude*. E ler i konsern lasante, in annan pa mal kritik parmi nou pep. Me

selman annou pa blye poudir ki *the way of doing things in the healthcare system has been there for years and years and years! And we're trying to turn that around.* E i annan progre.

E ler nou regard lafason ki tou bann staff lasante, tou bann ners, tou bann dokter ti'n dil avek COVID. *That is a success story.* Felisitasyon. Parfwa nou tant pou blye *how much work these people put in.* Alors nou annan en servis lasante ki annan sa potansyel.

E ler nou pe regard lekspektasyon dimoun. Mon santi parfwa ler en dimoun i, parey mon leksperyans pour mwan, ler mon ti'n al *casualty*, mon ti'n bezwen atann 2erdtan. E personn pa ti'n enterakte avek mwan, ziska ler mon'n dir, ayoyo i fermal.

E la ki en dimoun in koz ek mwan e zot in dir mwan ki i annan en lot dimoun ki dokter. I pe fer en prosedir ase entans lo sa dimoun e i bezwen plis latansyon. E dan mon lespri direkteman mon ti'n dir *ok*, mon ava atann pour ankor en pe letan.

Ou konnen, pwen ki mon pe sey fer resorti se lo baz *customer care.* Fodre ki nou met en pe plis lanfaz lo la. Kominikasyon i elimin en kantite fristrasyon. E mon santi ki lo kote *customer care*

dan Lopital Sesel, si nou met ase zefor ladan.

Mon pa pe dir ki tou bann ners pa fer zot louvraz. Me selman i annan lafason ki zot donn swen, parfwa i annan kritik ki leve. Menm dokter i sitan *busy*, i zis get ou i ale. Se sa ki dimoun i dir. *How do we improve that aspect, ok?*

An relasyon avek nou hospital information management system, mon swe se ki apre \$4 milyon ki'n ganny envestir. Nou'n ganny enformen poudir lafen lannen i pou ganny enplimante.

Kekfwa sa i ava ede lo lafason ki ler dimoun pe rod rapor medikal, zot pa pou bezwen atann pour 2 semen, 3 semenn. E parfwa dan serten lenstans, zot pa gannyen. So, ler nou annan en tel sistem, kekfwa sa i ava ede pou amelyor travay ki Departman Lasante pe rann ver pep Seselwa.

Ler nou pe regard laspirasyon nou Gouvernman pou konstrir en novo lopital. Wi, i annan 9 milyon. Me eski ki tan eski nou pou kontinyelman fer travay *maintenance?* Sa lopital i pe al vin 100 an. Sa Gouvernman 43 an pa'n kapab konstrir lopital.

Lopital La Digue zot in dir zot pou konstrir pour sepa konbyen lannen! Prezidan Ramkalawan ansam avek

Minis Finans, ansanm avek Minis Lasante ti'n pran sa linisyativ zot in donn en zoli Lopital St Mary's.

E mon konnen, e mon konvenki, e mon annan lespwar poudir ki sa linisyativ pou donn pep Seselwa en nouvo lopital. Mon annan lespwar. Mon optimistik poudir nou pou arriv ver sa destinasyon ki nou anvizaze.

Akoz ler mon'n regard sa kalite travay ki'n ganny fer Lopital La Digue ler mon ti'n ganny sans pou vizit avek Komite Defans pa tro bokou letan pase, mon ti'n vreman enpresyonnen. E tou bann Digwa zot vreman kontan ki zot annan en lopital.

E menm Onorab Uranie ti la zour seremoni pou tir portre ek lopital! Me selman li menm li ki fer plis kritik pou dir napa bekir. Be fer, pran en pe linisyativ parey Onorab Doyace Porice ti fer Baie Ste Anne, Praslin pou rod bann donasyon. Pran linisyativ Onorab!

(APPLAUSE)

HON SATHYA NAIDU

Mr Speaker, i enportan ki ler nou pe regard lasante, nou pep osi i pran zot responsabilite ver zot lasante. Ou pa pou kapab negliz ou lasante e ekspekte ki dernyen moman, ou lavi pou ganny

sove. *A lot of people are grossly negligent towards their health.* E se la kot sansibilizasyon entans i antre.

Mon konnen lo kote Departman Lasante zot pe fer en ta travay pour sansibiliz nou pep. Me i reste ankor en kantite pour nou fer. Me an menm tan, ler nou pe regard sa ki nou konman en pep pe konsonmen, mon krwar i bezwen annan en letid ki ganny fer sa ki nou, nou pe konsonmen. E ki kalite lenpak negativ ki annan lo nou lasante.

Parfwa dan bann laboutik ki ou ale, ler ou regard en prodwi ki son *life shelf* i apepre 2 an. Be apre ou menm ou, ou pe manz sa. Be ki kalite lenpak ki annan lo ou lasante?

I enportan ki nou fer le letid neseser akoz ozordizour ler ou pe regard lakantite dimoun ki pe ganny kanser e bann lezot maladi, mon panse ki i annan en lyen direk avek nou nitrisyon. Alors i annan en nesesite pour nou fer en refleksyon lo sa size.

Mr Speaker, dan bann *meeting* piblik, si i annan en size ki'n sorti toulstan, e si i annan en Minis ki mon bezwen dir in ganny tou sort kalite kestyon osi en pe plis ki tou se pa lot ki Minis Rangasamy, lo kote *MLH*.

In annan en kantite kestyon ki dimoun in poze lo lozman. E dan ka St Louis, nou annan 150 laplikasyon ler i konsern later ek lakaz. 24 i pour later, larestan i pour lakaz. E mon vreman soulaze pou vwar ki atraver Bidze Gouvernman, zabitant St Louis pe al ganny 16 *unit Waterloo*.

E sa i en tre bon nouvel pour bann ki pe kontribye. Pour bann ki'n atann pour plis ki 15an. E anefe dan konteks St Louis, nou annan 25 dimoun ki'n atann pour plis ki 15an. Alors sa i pou ede soulaz sa *backlog* ki nou, nou annan lo nivo distrik. Mon konnen ki pa tou ki neseserman an faver.

Me selman ler nou annan mankman later, fodre ki nou sey tou sa ki posib pour nou annan sa balans ant lozman, fasilite rekreadyonnal e lezot ankor. E alors nou lotorite St Louis, nou'n pran sa desizyon pour nou fer sa proze pour byennet nou bann zabitant.

Annou mazin lo en laspe en pe pli global ler nou pe regard sityasyon dan distrik, mon bann ser ek frer. Ler nou pe koz lozman, in annan bann diferan *scheme*. E parey pli boner mon'n dir, dimoun i en pe konfize lo mannyer serten *scheme* i marse. Espesyalman lo kote *MLH*.

I enportan ki tou sa bann diferan *scheme* i kler pour dimoun konpran. I kler pour

dimoun konpran pour zot kapab ed zot lekor. Ler nou pe fer referans avek part *rental*. Mon bezwen demann Minis si sa laspe *part rental* i pou kouver sa eleman depozit? Wi ou non?

Akoz konmela ler en dimoun pe lwe lakaz, dimoun i ganny demande depozit. Mon konnen parfwa dimoun i bezwen pran zot responsabilite pou sey fer en pti *saving* pou kapab pey sa depozit. Me, *life is not always how you would plan out for it to be*. Me i enportan ki sa laspe i ganny get ladan.

Lo size *HFC*, mon konforte pou vwar ki sa lapel ki mon'n fer a plizyer repriz in ganny ekoute kot mon'n dir poudir ki sa sonm larzan pour en *second housing loan*, ouswa en *first housing loan*. R550 mil ozordi pour en *second housing loan*? *Is it really feasible? I think not. 1.2 million for a first housing loan?* Mon krwar pa.

So, mon apresye ki i annan en refleksyon ki pe ganny fer lo kote *HFC*. Me selman sa ki mon kontan se i annan R10 milyon ki'n ganny met akote pour bann dimoun ki ganny difikilte pou ganny akse avek *HFC*. Savedir sa *sealing 1.2*, pa tou dimoun ki pe zwenn. Savedir si zot in ganny apepre en milyon. Par egzanp mon ava servi ka Mr Francois Finesse, Belonie. Kot

Gouvernman avan ki ti'n konstrir son lakaz. Ozordi i ranpli avek bann defo lo en baz striktirel. E pe sey son mye li pour li ganny son *loan*.

So alors, ler nou pe regard sa, mon swe se ki bann sirkonstans koumsa kot i annan son merit, sa bann dimoun i ava ganny ede. Ler nou pe koz lakaz pour bann dimoun ki mwen fortinen, pour zot osi ganny asiste avek bann reparasyon. Mon panse zot pe fer referans avek *vulnerable home repair*. I annan 10 milyon.

Well, ler nou pe regard 26 distrik, mon swe se ki sa sonm larzan i ava ganny depanse dan en fason ekitab pou fer sir ki tou zabitan dan tou bann diferan distrik i ava ganny en bout dan sa *scheme*. Ou pa pou kapab ganny St Louis zis ganny enn apre ou vwar serten lezot distrik i ganny 5,6,7,8,9. Non. I pa devret koumsa. *It has to be distributed evenly for everyone to feel the benefit*.

Ou konnen Mr Speaker, enn bann largiman ki'n osi ganny fer se an relasyon avek *HFC* dan lepase, se sa prosedir ki parfwa dimoun i bezwen pas ladan. I enportan ki, prosedir i en pe parey nenport ki labank. Alors *there is a due diligence* lo zot kote osi pou fer sir ki dimoun i ganny en nide kler pou zot kapab ganny akse avek zot *loan*. Akoz i annan

dimoun ki'n atann pour pa mal letan ozordi e mon swe ki se ki keksoz i ava bouz dan en direksyon ki pli pozitiv.

Mr Speaker, ler nou pe fer referans avek lozman, i osi enportan ki ler nou retourne lo laspe bann zenn ki a tre boner zot konmans fer zot kontribisyon. Ki ler zot pa bite dan milye semen ki zot pe sey rod sa rekour. Ler zot fer planifikasyon a en staz tre boner.

E ankor en fwa, mon ava retourne lo ledikasyon. *This is where* ler nou pe prepar dimoun pour lavi. Fodre ki bann *scheme* ki aporte, bann zenn i osi ganny met devan a en moman apropriye pou zot kapab konpran, pou zot kapab ganny akse avek bann diferan fasilite ki an plas.

An relasyon avek *sports*. Lopozisyon i dir Minis *resign*. Napa keksoz ki zot in pa'n dir. Me selman, mon panse ki pep Seselwa byensir ler zot ti'n pran sa desizyon Oktob 2020, zot ti tre konsyan poudir mannyer nou lenfrastriktir sportif ti ete anba zot *watch*. Zot ki'n fel e pep Seselwa in donn nou sa loportinite, pou nou fer pli byen. Parey Onorab Vidot i kontan dir nou.

E ler nou pe regard lo en baz nasyonal, partou kote i annan bann reparasyon. I annan bann renovasyon ki pe ganny fer. Tre byen. Me

selman i enportan pour ki lo nivo *grassroots*. Nou sorti lo nivo *grass roots* pour nou ariv lo nivo nasyonal. Ki laba osi i annan latansyon neseser.

En sonm 4.2 milyon i bokou pli ankourazan an konparezon avek bann lannen oparavan kot nou'n senpleman ganny zis 1.5. Mon swe se ki ankor en fwa sa 4.2 i ava ganny distribye dan en fason ki ekitab kot tou distrik i ava ganny en bout. E dan konteks St Louis, nou'n fer en zoli devlopman.

E mon swe se ki i pou vin en zoli devlopman. Me selman apre en kantite zefor nou'n nobou kapab envestir dan nou lenfrastriktir sportif, ki pou permet nou ankouraz nou bann zenn pou sorti dan bann move lenfliyans. Annan bann fason pou detann dan en fason ki pozitiv. E nou pe fer bann diferan linisyativ atraver menm sekter prive.

E mon vreman kontan pou vwar ki i annan en logmantasyon 150poursan an term *exemption*, me selman lo kote finans mon panse ki i bezwen annan bokou plis sansibilizasyon pou fer sir ki kominate biznes i vin devan.

Dan konteks St Louis, mon pe travay avek en biznesmenn. Mon pe travay avek en biznesmenn ki pare pou envestir R500 mil. E mon le dir mersi pour lefe ki ou'n

vin devan e ou annan distrik aker. Nou bezwen plis dimoun koumsa. Dan plas zis demande ki Gouvernman pe fer? Ou osi ou bezwen vin devan.

MR SPEAKER

30 minit Onorab. 30 minit.

HON SATHYA NAIDU

Donn en koudmen pour nou kapab bouz nou distrik de lavan.

30 minit pou reponn en diskour 2erdtan. Byensir pa fasil Mr Speaker. Selman zabitan St Louis partou kote zot ale zot vwar devlopman.

Mwan mon lo teren. Mwan mon donn zot mon langazman pou travay pli dir.

Parey mon'n dir *civil service* pou zot travay dir. Mon osi mon bezwen travay pli dir ankor pou delivre en St Louis ki meyer e en Sesel kot nou tou nou pou prospere. E se sa ki sa Bidze ki devan nou pe attend. Mersi Mr Speaker.

(APPLAUSE)

MR SPEAKER

Mersi. Laparol i prezan pour Onorab Wilbert Herminie.

HON WILBERT HERMINIE

Mersi Mr Speaker. Mr Speaker, mersi pou donn mwan laparol apre ki Onorab ki'n koz avan mwan in fini

koze, bann zabitan St Louis pe dir mwan, vre zot ayoyo e zot fermal.

Mr Speaker. Ser, frer Lepep Seselwa, tou Manm Onorab e tou dimoun a lekout e bann siporter US, bonzour. Malgre kouler politik, toulstan mazinen ki zot reste en Seselwa dan zot pei, menm si Sesel pa pour tou son zanfan, parey i annan ki'n zot krwar lekontrer pour zot ganny eleksyon an 2020.

Mr Speaker, ozordi i Zedi le 9 Novanm 2023, mon repepe ozordi i Zedi le 9 Novanm 2023 parey tou kalandriye i montre eksepte sa bout papye sal ki LDS i apel zot kalandriye. Sa swadizan kalandriye, Mr Speaker i montre avek Seselwa ki mannyer LDS in vreman bite. Pour LDS ozordi i le 10 Novanm non pa le 9 Novanm. Ziska dat lo kalandriye i mal e aprezan dir nou ki konfyans nou pou annan dan zot pou kontinyen diriz sa pei?

I fer onte, zot in dereggle e oule ammenn sa pep Seselwa avek zot. Me non, tan ki US i egziste, sa pa pou zanmen arive. I vre ki Lepep Seselwa ti oule vvar en sanzman dan sa pei, apre ki zot in anvoy bann labwet pouri partou, partou.

Me ozordi apre ki sa in arive, plizyer Seselwa pe dir LDS zanmen ankor. E an 2025 zot pou tat zot delo.

(APPLAUSE)

HON WILBERT HERMINIE

Sa Bidze 2024, ki mon ava dekrir li koman en masin koud ki napa difil ki pe zis vire dan lenzir ditan, san koud nanryen.

Minis in vin la in rate, in azite, in eksite. Akoz? Akoz in vin akont nou en zistwar avek sa pep, en zistwar ki li menm i konnen i en mansonz. Alors, avan i ti komanse i ti devret dir nou "poul ponn dan pikan" tou dimoun ti a konn sa larepons. Apre ki'n koz plis ki 2erdtan, in tir la in met la, me dimoun deor pe dir, i pa'n dir nanryen konkret. Yes tande me *no* konpran!

Nanryen pa pou amelyore pour zot. Sa Bidze i montre nou ki sa martir ki zot toulstan sante, ki zot in pas ladan pou sa 43 an ozordi i pli pir pandan sa 3 an ki LDS in o pouvwar. Minis, dan sa Bidze kote sa manman tousel i ganny trouve laba? Pou sa manman ki deza annan 3 oubyen 4 zanfan, oli li dan sa Bidze? Sa madanm ki kot *cleaner's cooperative* ki pe ganny dir tou lazournen ki korperativ pe al fermen, eski ou'n pran li an kont dan sa Bidze?

Zot dir ners in byen travay pandan COVID me sa bann *long service allowance* ki

zot ti'n *freeze*, eski dan Bidze 2024 zot pe al *unfreeze*? Donn bann travayer zot larzan ki zot merite.

(APPLAUSE)

HON WILBERT HERMINIE

Sa msye 90 an ki pe viv lo sekirite sosyal e ki ankor pe fer konfyans ek lespwar e ki ti vot pou sa Gouvernman, pour li ganny son R10 mil ki zot ti'n promet li avan eleksyon.

Eski Gouvernman *LDS* pa onte, pou fer sa bann kalite promes koumsa e abiz lo febles bann dimoun pour zot ganny vot. Apre zot reste silans e ganny lolas poudir napa larzan e nou bann dimoun pe viv pli lontan.

Pour sa enn ki'n vot pour *LDS*, eski ou vwar ou lekor dan sa Bidze? Apre 3 an ki *LDS* in o pouvwar zis demann ou lekor eski ou'n avans pli devan? Eski ou'n ganny plis larzan dan ou pos? Eski ou'n kapab lev sa pti miray deryer ou lakaz, ki ou ti annan plan fer? Eski ou'n kapab azout en lasanm oubyen menm pran sa pti bout *loan* pou kapab rekouver ou lakaz kan lapli i tonbe? Mon asire ki larepons se non.

LDS i kapab araze me nou dan *US* nou la, dan Lopozisyon pour nou dir zot kot i mal, me met presyon pou zot amelyor lavi Seselwa.

MR SPEAKER

Eskiz mwan. Onorab! Aret en moman. I fer de fwa, i fer de fwa ki mon tann sa mo ki mon pa pour repete dan Lasanble. Yer. Wi, yes, yes, yer en Manm lo kote *LDS* ti dir e ozordi mon tann en Manm lo kote *US* dir. Mon pa pe, ok tou lede in servi en fwa, mon pe dir serten langaz zot bezwen evite.

(Interruption)

MR SPEAKER

Onorab Pillay mon'n dir mon'n dir, mon rekonnet poudir ti ganny dir yer e silvouple ekout mwan e aret enteronp mwan!

Mon'n dir ti ganny dir yer in ganny dir ozordi annou fini avek. Mon krwar nou bezwen evite serten langaz ler enn in servi, lot i servi apre lezot zis i repete, silvouple nou'n fini avek sa. Onorab Herminie kontinyen.

HON WILBERT HERMINIE

Mersi Mr Speaker pour ou enteripsyon. Mon remarke ki yer *LGB* ti dir...

MR SPEAKER

Kontinyen Onorab, mon'n eksplik sa.

HON WILBERT HERMINIE

Ok. Mr Speaker, pouz nou dan Lasanble si zot oule, parey zot

abitye fer, nou pou toultan koze, ekspoz zot bann demagozi ki zot pe fer akoz nou vvar zot dan problem. Lepep Seselwa i vvar zot dan problem. Senpleman akoz zot ti napa en sou nide ki mannyer pou diriz pei, zot in zis vin tat, tate dan fernwanr. Si zot ti oule seye, zot in seye e vwala rezulta seye!

Sesel pe al dan presipis, kot sa ki annan i vin pli ris, sa ki napa i vin pli mizer. E ou Mr Prezidan, ou'n vin en *cabin crew* lo bann avyon e ou zis monte desann dan bann pei.

Pour 43 an, *SPPF*, *SPUP*, Parti Lepep, *US* in anmenn devlopman dan sa pei. Tou le lannen se nou parti ki'n anmenn Bidze dan bann sekter e Minister. E vwala ki mannyer Sesel ozordi i ganny dekrir koman en pei byen avanse.

Se nou parti ki tou le lannen ti anmenn Bidze pour lasante. Se nou parti ki tou le lannen ti anmenn Bidze pou ledikasyon pour tou zanfan pa kout en sou. Se nou parti ki tou le lannen ti vot larzan dan Bidze pour lasistans sosyal, i egziste pou bann ki pli vilnerab.

Se nou parti ki tou le lannen ti met larzan dan Bidze pour en sistèm *carer* pou nou vyeyar. Se nou parti ki ti met larzan dan tou le lannen dan Bidze pou *part-rental* egziste

pour sa bann ki pe lwe lakaz. E se nou parti ki ti met larzan pour sibvansyonn pri bis pou ki sa manman tousel i kapab pey son bis e pour kapab al travay toulezour. E se nou parti ki ti met larzan pour bann fermye pour zot kapab aste manze zannimo, pour zot kapab fer zot biznes marse.

E se nou parti ki'n met larzan dan Bidze pou nou soutenir e agrandi bann pti biznes. Nou merit fyer avek tou nou bann lakonplisman, me i malere ozordi ki serten bann keksoz, ki nou, nou ti pe pran kont dan Bidze *LDS* pa vvar li enportan. O kontrer zot sef ti *boycott* tou keksoz. *Boycott* Vilaz Roche Caiman, zot ti apel li lakaz lapen, selman ozordi get li pe fer kanpanny laba.

Boycott later konble. Selman ozordi zot in fer *rally* laba. *Boycott* Liniversite Sesel, selman zot met palto e kravat pour al laba. *Boycott* batiman Lasanble Nasyonal, solman ozordi tou diskour i zot vin fer isi *live*.

(APPLAUSE)

HON WILBERT HERMINIE

Mr Speaker, Minis in vin koz ek nou lo tir *tax* lo *twin cab*? Be sey dir mwan eski Minis pe viv dan menm pei avek nou? Konbyen Seselwa ordiner dan sa pei ki pour

benefisye avek sa? Eski pa ti pour pli mye ki nou retir *tax lo* – ki nou tir *tax lo twin cab* me tir, rod mannyer pour fer desann pri bis?

(APPLAUSE)

HON WILBERT HERMINIE

Sa ti ava en keksoz ki ti pou tous tou Seselwa. Akoz mazorite Seselwa i servi bis piblik.

Dan bann landrwa kot nou ti konnen nou sitwayen pou pli ganny afekte, nou ti fer nou mye pou kit pri ba. Me ozordi *LDS* pa pe fatig zot ek tousala. Pri i o, en Gouvernman bef dan disab sakenn vey son lizye. Si ou annan ou peye si ou napa ou kite e ale.

Eski dan Bidze 2024 in annan okenn logmantasyon saler pour bann travayer Seselwa? Manke rezon se napa larzan. Dan sa pei, sa dernyen 3an in vin zis en fars. Larzan pour travayer Seselwa pour ganny en logmantasyon zot napa. Solman i annan larzan pou donn *allowance palto*, *allowance ledan*. Si sa pa en fars dir mwan kwa silvouple?

Seselwa nepli fou. *LDS* i bezwen *lead by example*. Ou dir napa larzan, savedir napa larzan pou nou tou. Akfer sa bann *allowance VIP* pour al kot dantis? Eski zot napa

konfyans dan nou sistenm lasante? Ou anvi al kot dantis prive, bour lanmen dan ou pos, fer parey tou Seselwa ordiner e pey ou servis prive ou menm. Akfer ki Leta i bezwen peye pou ou?

(APPLAUSE)

HON WILBERT HERMINIE

Nou sistenm lasante, Mr Speaker. Lannen apre lannen Bidze Lasante i enn ki pli o, 1.4 bilyon in ganny mete. Minister Lasante i pran pli gro porsyon dan Bidze, malgre sa sistenm lasante i kontinyelman degrengole.

La sa bann dernyen lannen en katastrof total. Nou sistenm lasante in pli pir ki zanmen. Sa se akoz *poor leadership*, mon repete *leadership* pa bon. Ki rezulta ou ekspekte gannyen ler ou'n pran en dimoun ki ti lo retret pe zwe ek son pti zanfan, pou retournen pour vin ansarz en Minister? Senpleman Minister pou fel.

Malgre mon pe note, i annan plizyer travayer talante e kalifye ki nou dan *US, United Seychelles* e Parti Lepep nou'n siporte pou anvoy zot *training aletranze*. Kot nou dan *US* nou'n etablir kontak avek bann pei zanmi, ki zot in kapab al aprofondi, aprofondir zot konesans par bann labours e pou zot spesyalize.

Se anba mon Gouvernman e mon parti ki ou'n reisir ariv kot ou'n arive. Wi, ou ti annan ou lentelizans, me sa in ganny agrandi e devlope par bann Polisi ek bann loportinite ki nou'n donn ou. Ki *LDS* in fer pou ou? In fer kontak ek pei zanmi parey *UAE*. Sa menm *UAE* ki zot maltrete e dir nou ki nou pe vann Sesel ek Arab. Be dir Lepep Seselwa ki zot in vann pour zot kapab ganny lopital La Digue? Mon poz sa la.

Mr Speaker, ozordi bann desizyon ki ganny pran pa neseserman pwennvi pran par bann teknisyen, me plito baze lo pwennvi politik, politisyen e politik. Nou'n vwar demagozi ki'n arive pandan letan *COVID*. Si zot ti ekout bann eksper, plizyer gaf ti'n kapab ganny eliminien.

Casualty, bann travayer in ganny ase, menm isi dan sa Lasamble pa tro lontan ti annan en size lo *Casualty*. Si *leadership* ti pran kont sityasyon *Casualty*, keksoz pa ti pou dan sa leta. Si sa Minis pa ti zis asiz dan son biro, me plito fer letour pour regarde ki ti pe arive i ti pou konnen ki pe pase.

La kot *SOPD*, pli move. I annan en delo ki tou lazournen i fer zot noye e larme i ganny apele pou vin tir delo. Minis i desann i vin gete, i remont dan son biro, 2

semenn pli tar delo i vin ankor.

Fotespere dan Bidze 2024 Minister Lasante i a pran sa problem an kont pour vin rezourd sa problem. Akoz ler sa i arive bann pasyan i soufer. Zot ganny mete deor e servis i enteronpe.

Mr Speaker, mon zis swete larzan in ganny mete dan Bidze pou aste en novo masin *X-ray*, *mammogram* e lezot ankor. E si i annan sa ki nef larzan, ki ganny mete pou *maintenance* frekan ki ler sa bann pasyan i vin servi sa bann servis, zot lapwentman pa ganny kennel akoz masin pa bon.

La nou bann ward nou vwar bann ners in fatige, malgre zot kontan zot louvraz, zot dir ki zot pa pe ganny byen gete. Zot fristre e sanmenm sa ki bokou zot pa pe deservi pasyan byen. Sa se fristrasyon. Konbyen fwa ou'n al lopital, swa ou'n admit, swa ou'n al vwar en manm fanmir ki ou ganny dir ki napa tapi, napa bekir, napa isi, napa laba. Me selman apre tou zot dir tou keksoz i *ok*, tou i korek, tou keksoz i annan.

La lo sa zafer *uniform* pour bann ners, annou pa koz lo la. Akoz sa montre kote koripsyon i ete. Ozordi i malere Mr Speaker, ki pasyan ki sipoze al trete aletranze i ganny dir ki zot – i ganny letan

desede avan menm ki zot vwar tretman. Zot ganny dir espere zot spesyalis in retourn dan zot pei, aprezan zot bezwen ganny refer avek bann lot spesyalis. I malere me sa i realite.

Zot pe koz ou lo lefikasite lopital La Digue. Mr Speaker yer menm en madanm in tonm malad dan son travay, in ganny anmennen klinik Grand Anse Praslin e apre esper lanbilans ki'n anmenn lo lopital Baie Ste Anne. Laba bann Ners in fer tou pour sa madanm, me move *leadership* dan Minister Lasante kot zot napa resours pour travay avek, zot in vwar ki sa madanm i bezwen ganny transporte Mahe. Be ankor en fwa bann *staff* lopital in sey tou pour ganny avyon pour anmenn sa madanm Mahe. 11er, midi, 2er, ni *Air Seychelles*, ni *Zil Air*, ni *IDC* zot pa'n kapab gannyen.

Finalman zot in dir ki sa madanm pour desann Mahe 2er edmi. Mazinen depi 10er sa madanm i lo erport pe fer prosedir - pe esper prosedir pour li desann, me sa malerezman sa madanm in ganny letan kit nou. Sa i vreman tris e pa akzeptab ditou.

Minister Lasante in drwa sa fanmir en leksplikasyon, me sa ki pli trakasan Prezidan i dir nou ki i annan en *state of*

the art hospital La Digue, akoz pa ti anmenn sa madanm laba alors? Nou dan *United Seychelles* nou senpatiz avek lafanmir e nou denons sa bann mansonz sa Gouvernman. Zot pa efikas, zot napa konpasyon. Onorab Woodcock i konn tre byen ki'n arrive yer, sa bann tel sityasyon i deplorab e zot pe fel sa pep. In ler pour zot sed la plas e 2025 zot pour sorti.

(APPLAUSE)

HON WILBERT HERMINIE

Dan Bidze 2024 ki annan pou nou bann frer ek ser ki lo sibstans pour zot kapab ganny en dezyenm sans dan lavi? Sa sant reabilitasyon mon tann zot pe koz, kriy for lo la. *LDS* i abitye sant laglwar lo keksoz ki lezot in komanse e fer konmsi ti zot nide.

Me atansyon Lepep Seselwa i konpran sa kalite manni. Mon a *remind* *LDS* ki zot in bliye ouswa zot pa oule mazinen ki sa sant reabilitasyon son premye negosyasyon se Dr Patrick Herminie ki ti komanse avek *UAE*.

Akoz dokter ti annan sa bann dimoun a ker. I ti fer tou demars pou zot ganny zot sant reabilitasyon. E sa bann letan *LDS* ti zalou. Par montre zot gro ker, zot pa ti dakor avek e demande akfer. Fer sa bann

kliyan al *cold turkey*. Be ozordi la ki'n arive avek sa nide *cold turkey*? Sa zot sa. Ler keksoz pa dan zot faver, zot sot anler e kriy pa bon. Ler i dan zot faver, sa ki pa ti bon in vin bon.

La zis an pasan mon le dir Minis Lasante ki sa 4 *van methadone* ki Minister Lasante in gannyen avek Lenn se Dr Patrick Herminie menm ki ti fer demars e negosye avek Lenn pou *APDAR* gannyen, ler Minis ti ankor dan retret.

La zot pe al fer nouveau lopital e pe rod kontribisyon avek Seselwa. Me kote Seselwa pou gannyen? Ou Gouvernman napa larzan menm *comme* dir granmoun, la aprezan ou le tir dile ek park. Me zot pa fer onte. Menm senaryo fer gran lafanfar ouver *library*, zoli isi e zoli laba, selman apre napa liv pou met ladan. Zot dir dimoun fer donasyon, be zot pa vwar zot in bite!

Logos Hope in vini, akoz zot pa ti pran en pe larzan aste liv e met dan *library*. La nou annan en zoli *building* me i pa pe servi son *purpose*. Tipikman en Gouvernman *LDS* konfize, dezespere e fatige.

Ledikasyon R1.4 bilyon. Ledikasyon i en lot Minister ki pran en gro porsyon dan Bidze, me nou kontinyen tann bann diferan katastrof ki pe

pase dan ledikasyon e menm dan sa bann lekol. Dan bann *meeting* piblik nou'n tann en bal ek en pake. Napa *teachers*, napa latab ek sez, e lo latab manrmay i annan karpet ki'n ganny mete.

Sa zis sa ki nou'n tandé, be sa ki nou pa'n tandé. Wi i annan manrmay ki pa le aprann e ki fer dezord, me dan lot kote osi i annan ki pe pran – nou bezwen pran kont ki i annan manrmay ki oule aprann. Be ler en *teachers* toulezour i absan, eski ou krwar son zelev pou perform byen?

Get dan *welfare* sa bann *teachers* osi, rode kwa ki pa pe mars mal. Minis zwenn avek ou *teachers* e regard bann problem. Pa zis mont dan *meeting* piblik e dir napa problem sez ek latab, solman apre ki nou vvar?

Minis Finans i dir ki pou annan en sonm, i annan en sonm dan Bidze pou akizisyon sez ek latab. Si i napa problem parey Minis Ledikasyon i dir, akfer aste? Mansonz e plis mansonz. Zot dir manrmay i fer vandalizm ek latab ek sez, be akoz Minister Ledikasyon pa pe al dan direksyon pour enstal bann *camera* sirveyans dan bann laklas.

Mon mazinen sa osi ti ava ede abes lakantite move konportman dan laklas. Mr

Speaker sa i anmenn mwan lo pwen *breakfast* dan lekol. Mon kontan tande ki dan Bidze 2024 Gouvernman *LDS* pe fer provizyon pour kontinyen donn zanfan *breakfast* kot lekol.

Me eski ti neseser pou nou dan *US* an partikilyerman Dr Herminie met presyon lo zot pou zot kontinyen ek sa program apre ki zot ti'n arete. En Gouvernman ki annan konpasyon pour son pep i devret vwar sa koman en priyorite. Me non! *LDS* pa vwar sa enportan, *US* i deside donn *breakfast* li menm e lanmenm la zot taye e ranvers zot desizyon.

Eski zot pa kanmi pou pa donn nou bann pti trezor en pti goute kot lekol. Ki kalite leker zot annan? Ou sa manman ki ti vot pou *LDS* eski ou an faver sa kalite tretman sorti kot sa bann dimoun ki ou'n donn ou vot? Eski sa sanzman ki ou ti oule? Pou zot dan *LDS*, bef dan disab sakenn vey son lizye.

Mr Speaker, sport si nou pa konn anmenn li byento i pou disparte. I malere ki ozordi zot tann bann atlet e osi bann ansyen atlet lo medya sosyal partou, ki mannyer zot pe kritik *sport* dan *Sesel*.

Sport dan *Sesel* in ganny larzan dan Bidze tou le lannen. Me kestyon i reste, ki mannyer sa larzan pe ganny

servi? Pou aste *make up*, oubyen pou anmenn fanmir al get Zwe des Ile? Mon poz sa la.

Lenfrastriktir pe degrengole lo atlet. La nou annan *NSC Hall* ki'n ganny donneン pou fer *sport* ladan, ozordi ler bann klib spor i demande pou zot al *practice*, zot dir ganny dir pa pou posib akoz i annan fonksyon. Be pran zot en desizyon silvouple. Eski sa *hall* pour ganny servi pou spor oubyen pou fonksyon?

Si zot in donn sa pour fonksyon, aprezan rod en lot landrwa pour atlet. En lot landrwa konvenab pour sa bann atlet kapab pratik zot *sport*. Kontradiksyon e plis kontradiksyon. Landrwa kot i fer tes anti-dopaz Stad Popiler in vin en *bar*. Vre zot parey en sang ki'n mank gans.

Dan sa Bidze ki'n ganny donneン pou spor eski i osi pran an kont ki ler bann atlet i al *training* aletranze, eski zot pour ganny en *allowance* pou soutenir zot pandan *training*? Parey bann travayer dan servis piblik i gannyen *per diem* ler zot *travel*. Dir bann atlet si sa i egziste akoz zot anvi konnen.

Sa larzan meday, ki *deal* sa? Eski i pour dan Bidze 2024? Tes in fini fer ouswa pa ankor fini fer? Pou donneン ouswa pa pou donneン? Kot lot

leskiz pour vin avek- ki lot leskiz zot pour vin avek? Aret koz mansonz ek sa bann atlet silvouple. Zot in fer zot promes alors delivre lo la. Si sa bann atlet ti'n desann avek sa *container* meday ki zot ti pe demande, ki ti pou devenir avek zot? Zot ti pou bezwen al pran *loan* avek Arab pou pey meday.

Sport i pa zis lenfrastriktir, i osi sa atlet. Eski bann atlet pe ganny training camp ek exposure enternasyonal avan konpetisyon? E sa larzan child-minding ki zot ti promet avan konpetisyon ki'n arive avek? Zis ankor en lot gaf. Gran prometer pti donner, zot annan en rikord lo la.

Mr Speaker, eski dan Bidze 2024 i annan Bidze pour sa senkantenn misyon aletranze ki Prezidan pour deside fer pandan lannen? Akoz i pa ankor fini tik tou bann bwat bann pei ki i bezwen vizite.

Zot mon bann koleg lo lot kote latab, sey negosye ek li avan i ale ki zot avan dan son delegasyon pour zot tandem menm si vre in al re negosye bann keksoz ki pour pli meyer pour Seselwa.

Mal planifikasyon e demagozi ankor. Annou al en pti kou lo Praslin. Gouvernman US in konble en bout later lo Praslin e Lasose

Baie Ste Anne ki'n ganny konstri lo la. E les mwan *remind* zot ki Msye Ramkalawan ti kont later konble, selman ozordi zot in fer en pti trou nennen *building* lo la, lo en gro bout later. Sa i montre mal planifikasyon e kan zot pe taye pour zot al koup en lot riban. Gaspiyaz ankor.

Mr Speaker, Gouvernman LDS i koz lo lazennes labous plen, me aksyon zero. Ankor mon le *remind* zot ki Msye Ramkalawan ti kont Liniversite Sesel. Sa menm Liniversite Sesel ki ozordi bokou nou bann zenn pe al laba pour *study* e ganny zot kalifikasyon.

Eski dan Bidze zot pe pran kont sa batiman ki pe degrengole bout par bout. Eski bann etidyan *lab* a pe ganny sa bon servis pou sa sonm ki zot pe peye ouswa eski Liniversite pe vin zis en biznes? Dan Bidze 2024 pour bann aktivite lazennes dan bann distrik in redwir. Sa i senpleman montre nou ki LDS pa pe enterese avek lazennes, me plito dan ranpli zot pos, anmize, donn bal, monte desann aletranze. Me nou travayer nou ava travay pli dir e pli dir ankor.

Mr Speaker, pri *fuel* dan lemonn i desann, me Sesel i kontinyen monte. Blanm tou

lo *Ukraine* zis parey zot ti blanm tou keksoz lo *COVID*, menm lapli pa ti tonbe zot ti blanm lo *COVID*. Pou 43 an *SPUP*, *SPPF*, Parti Lepep, in krwar dan ler ou ariv laz 63 an omwen en dimoun i ganny son panson e i al zwir dan son lavi dan leape e frankilite.

Me ozordi zis dan 3 an sa in totalman ganny ranverse, zot dir dimoun 63 an, ou ankor for e ou kapab ankor kapab travay e ki ou ava ganny ou panson a laz 65 an. Si ou annan en leker pour ou sitwayen, eski ou fer avek zot koumsa?

Mr Speaker, rezon ki keksoz i koumsa se akoz *LDS* pa krwar dan bann ideolozi ki nou, nou krwar ladan. *US* i en parti travayis e progresis, kot nou met zom o sant devlopman. Kot ou kapab vin sa ki oule vini.

Me *LDS* i le *run* pei parey en biznes. Sa ki annan, pou reste toultan annan. Sa ki napa pour reste touzour napa. Dan Bidze nou ti espekte vwar larzan pour trezyenm mwan saler pour sa bann pti kontrakter, ki zot ti ganny dir ler zot pe *tender* pou pa met sa trezyenm mwan saler ler zot pour ganny sa bann kontra.

Ozordi nou pa vwar sa, zot in ganny blyie. Napa Bidze pou tir *fungus* kot nouvo lekol *NIHSS*. Dan Bidze napa

lekipman pou bann travayer *SFRFA* ki reste lo zil.

Mon kontan ki nou vwar bann travayer *HR* e bann dimoun *ICT* ek ladministrasyon pe ganny zot *scheme* revize. Be oli sa bann *scheme* pou bann profesyonnel e *allied workers* lasante ki ti'n ganny promet? Larzan pour *carer* napa, lalis i long, i zis promes vid apre promes vid.

Mr Speaker, *US* ti prioyoritiz letid avanse pour nou bann zenn. Nou ti menm kree en lazans *ANHRD* ki ti fer – ki ti sa pon ant Minister Ledikasyon avek Minister Lanplwa. Me zot ki zot ti fer? Zot in frenm sa lazans epi zot dir nou ki annan serten pozisyon ki reste *vacant*. Evidaman pozisyon pou reste *vacant* akoz lanmen dwat pa konnen ki lanmen gos pe fer. Sa i ilistre nou byen akoz nou dir zot en Gouvernman kanmaron.

Koripsyon ankor dan kontra. Gro kontra i donneen pour fer semen pour plis ki milyon e de milyon, me selman *tender* in ganny fer selektivman. Kontra nou'n demande, pour ganny donneen avek Lasanble Nasyonal me nanryen pa ankor gannyen ziska prezanz. Kwa ki zot pe kasyet? Seselwa ki pou ziz zot.

MR SPEAKER

30 minit Onorab.

HON WILBERT HERMINIE

Terminen menm mwan Mr Speaker. Me lefe i reste ki mazorite ti le en sanzman dan Sesel san konnen ki vre sanzman ki zot ti pou gannyen. Me mon bann frer ek ser pa dekouraze. An 2025 zot pou ganny sa loportinite pou dir avek *LDS enough is enough*.

Zot pour ganny sa sans pour anmenn sa sanzman akoz *LDS* in fel. E an 2025 pouvwar pou retourn dan nou lanmen mon bann frer ek ser Seselwa. Pa les zot ganny anbete ankor. Fer sa sanzman, vot pou *US* akoz *US* i sel opsyon pour Sesel.

An konklizyon Mr Speaker, mon oule dir avek *LDS*, ki sa Bidze i maf. Seselwa pa vvar zot ladan. I zis en serten ki'n ganny benefis. An 2025 nou pou tir plans anba zot lipye, zot pour santi zot mank lekilib, akoz mazorite Seselwa e an gran mazorite pour al vot *US State House*. Mersi Mr Speaker.

(APPLAUSE)

MR SPEAKER

Mersi. Bon, mon oule fer rapel, sirtou lo kote bann Manm US. Pou evite enteronp lezot Manm letan pe koze. E mon pa'n enteronp

entervansyon en Manm me selman mon pran sa lokazyon. E i annan serten lawwa isi ki mon tann tro bokou e sa se Onorab Woodcock e Onorab Porice, silvouple. Silvouple evite kriy atraver lasal. Onorab Woodcock ou'n tann mwan? Mersi.

Nou a pran poz la e nou re pran deba 11er. Mersi.

(BREAK)

MR SPEAKER

Laparol i pou Onorab Doyace Porice.

HON DOYACE PORICE

Mersi Mr Speaker. Bonzour Mr Speaker. Bonzour tou mon bann koleg MNAs. Bonzour Minis e tou dimoun a lekout, spesyalman zabitan Baie Ste Anne.

Mr Speaker, avan mon komans mon lentervansyon mon bezwen dir mersi mon Bondye Papa pou kontinyen kontan nou isi lo sa later. E ki nou osi nou bezwen kontinyen kontan li e viv dan li. E la mon mazin e senpatiz avek Lina, Cote D'or Praslin ki ti perdi enn son frer semenn pase. E senpatiz osi avek Ceclia Simeon, ki'n perdi son fir e fineray ti fer yer. Ki zot nanm i repoz anpe.

Mr Speaker, atraver ou mon oule dir avek Onorab Herminie ki mon ti perdi enn

mon ser 6 an pase, dan menm parey ki i pe rakonte taler dan lopital Baie Ste Anne ki ti bezwen esper en ta letan avan i ariv Mahe, e i ti perdi son lavi. Savedir son Gouvernman ki ti o pouvwar sa letan. Mersi.

Mr Speaker, sa Bidze prezante par Minis Hassan i katriyemn Bidze depi Gouvernman LDS i o pouvwar. I en Bidze ki pa neseserman an faver tou Lepep Seselwa. I en Bidze ki sa Gouvernman pe fer zot mye pou anmenn sa ki bon pou sa pei e son pep. E i en Bidze ki mwan mon vwar i ase satisfezan pou amelyor lavi nou pep. E ki anmenn plis devlopman dan nou pti pei Sesel.

Kot mon'n vwar bokou sonm ki pou kouver bokou keksoz zis parey, larzan pou renovasyon lopital kot mwan mon'n plizyer fwa rod sponsor pou benefis Praslin. Zis parey Onorab Naidu in dir. Larzan pou proze lakaz, *condominium*, *land bank*, renovasyon lakaz pou dimoun aze. E la mon mazin Mr Angelin Dorizo Cote D'Or, Etienne Meriton Baie Ste Anne, Mrs Annette Rose Marie-Jeanne Estate, e lezot ankor.

Konpansasyon zabitant ki reste semen PUC, ki Gouvernman US pa ti oule peye e fer plizyer demagozi ek sa lalis. Logmantasyon

allowance pou bann etidyan Praslin e zil pros ki la. Logmantasyon pou bann etidyan Praslin e zil pros ki al pos segonder Mahe.

En sant pou bann adiksyon. E la mon mazin Mr Stravens ki lontan pe travay avek sa bann group. E osi nou'n antreprann en group ki mon ladan. Miss Willna, Paster Selvin ek son madanm, ki nou osi nou pe fer en travay avek sa bann adiksyon. Logmantasyon pou bann manman ki al ganny zot baba Mahe. Logmantasyon pou bann zanfan semi orfelen, *home carer, foster child*.

Tousala Mr Speaker, zabitant Distrik Baie Ste Anne Praslin, enkli mwan menm pou benefisye dan sa Bidze. Zabitant ki anvi ganny plis leklersisman, pa zis parey. Plis leklersisman, pa ezite parey zot labitud zwenn mwan, e mwan a eksplik zot ankor. Me par kont sa bann ki pe donn an gro kot bann Minister konsernen, mon ti a kontan ki distrik Baie Ste Anne i benefisye li osi, atraver *bus shelters* kot i annan 1.5 milyon.

Lalimyer lo semen piblik, i annan 7.7 milyon. Lasistans pou en pti *loan* pou *daycare operators*, 27 milyon. *Loan* pou lagriktir, R21.9 milyon. Benefis sosyal, R1.3 milyon e *part rental*. 48.3 milyon, pou

lenfrastriktir sport. 3.1 milyon pou bann profesyonnel. Pour bann pti proze dan distrik 26 milyon. SPTC 70 milyon. Tousala mon ti a kontan Baie Ste Anne Praslin i benefisyé.

Mon ti a kontan ki Minis i rod en pti Bidze pou semen Salazie kot mon bann fanmir, kot lafanmir Joubert, Marie-Brioche i reste. E ki lontan zot in ganny promet. Si pou detrwa vot, e la ler zot call MNA elekte i dir zot call State House, akoz pa zot ki o pouvwar.

Me Mr Speaker, mwan mon la pou siport zabitan pou ganny sa ki neseser pou nou distrik Baie Ste Anne Praslin, kot mon pe debourye pou plis ankor.

Keksoz ki satisfer mwan sa lannen ki ti vin dan Bidze 2023, se sa devlopman lo mon zil. Sirtou distrik Baie Ste Anne. Ler mon get parey novo Lasose Ero, fasilité pou bann peser kot i konsern novo bazar. Nuevo *gears store*, novo *ice plant*, novo *supermarket STC*. Pa zis sa, nou zoli *round about*, sirfas semen, nou novo *cross barrier*.

Novo semen segonder Mr Speaker, e pa bliy novo *bin shelter*. Devlopman Kato Nwar ki byento later pou ganny distribye. Premye distribisyon later Ile Eve ki'n fini ganny fer, apre sa ta

dezord ki ti annan. Ni lenfrastriktir ti napa. Wi, later ti ganny konble pou vann ek zot bann dalon pou en pti roup. Apre vann ek etranze pou milyon. Manm Elekte pou Baie Ste Anne i bliy vitman.

E la bann pti biznesmenn in komans konstriksyon. Tousala Mr Speaker se sa ki mwan Onorab Doyace Porice, MNA Proporsyonnel ki'n lager pandan sa 3 an pou distrik Baie Ste Anne.

(APPLAUSE)

HON DOYACE PORICE

E nou Prezidan Ramkalawan ek son Gouvernman LDS in ekoute. E siporte. Koumsa ki en Gouvernman responsab i travay.

Par kont, menm si MNA Elekte avan 2020 ti lager pou sa bann proze ganny antreprann. Me son Gouvernman SPPF, Lepep, e la i US, pa ti tann li ditou. Menm son ansyen Prezidan ek Minis Finans pa ti ekout li. Zot ti krwar ki zabitan Baie Ste Anne ti pou kontinyen ekout zot bann mansonz e vot pou zot la mazorite parey labitud.

Mwan Onorab Porice, mon fer sir ki mon Gouvernman i ekout mwan. E i ekout demann zabitan lo zil, sirtou distrik Baie Ste Anne kot mwan mon pe debourye. E zabitan Baie Ste Anne i

vreman kontan Mr Speaker, e i apresye ki sa Gouvernman pe fer pour sa pti git letan ki nou o pouvwar.

Wi i annan keksoz ki devret amelyore, sirtou i konsern kou lavi, kot zabitan in diskit avek mwan. Ki toultan nou pe ganny li pli ser. E la mon ti a kontan ki Minis Finans i kontinyen get ladan, kontinyen fer sa negosyasyon avek Sekter Prive, e get osi nou bann operator bato ki anmenn marsandiz lo nou zil. Pou donn zot plis sipor, pou ki zot osi zot a return sa byen kot zabitan.

Pa zis sa Minis, get en kou lo kou avyon *Air Seychelles*, pou Mahe/Praslin e Praslin/Mahe kot i vreman ser. Fer en pti negosyasyon osi ek zot oubyen gete kot nou kapab soulaz zabitan ki pa kontan al dan bato.

Mr Speaker, ou krwar ozordi nou ti pou koumsa? Si ti napa bokou vol, koripsyon tout sort fason ek *taxpayers money* avan 2020 atraver Gouvernman ki ti la o pouvwar pou 43 an, kantmenm zot pa oule tann nonmen. Nou ti pou lwen e *Air Seychelles* i enn ki'n pas ladan.

E sa bann larzan ti ava dan fon Gouvernman. E sa Gouvernman ankor en fwa ti pou pli lwen ki ete ozordi. E Minis Hassan i a koriz mwan, e mon konnen ki Gouvernman

ti pou met plis larzan dan pos Seselwa. E menm sa bann later ki zot in aste avek *taxpayers money* sa letan, e la zot pe vann Mr Speaker, plizyer bout zot ankor pe vann. Akoz zot pa rann Gouvernman sa larzan later pou Gouvernman return avek Lepep Seselwa.

Apre zot menm parti minoriter i dir Seselwa i mizer, i manz zis en repa par zour. Seselwa pe soufer, me zot foutou, donn sa bann Seselwa en pe sa bann gro *allowance* ek benefis ki zot Prezidan parti pe benefisy, atraver *taxpayers money*.

(APPLAUSE)
(Interruption)

MR SPEAKER

Aret en moman. Aret en moman. Onorab ou'n komans servi ankor bann mo ki pa tro byen dan langaz Sesel. E mon'n fek ganny en lensidan lo la avan, e mon oule *remind* zot tou annou envite silvouple. Akoz si enn i komans servi, i vin en labitud i pou vreman vilenn pou Lasanble. Onorab Silvouple.

HON DOYACE PORICE

Sa zot pa koz lo la ditou. Mon vwar i drol Mr Speaker, ki dimoun La Digue i lafen. Me zot pa ganny lafengal pou al

ranpli sa lopital Digwa. Digwa i vreman an bonn sante.

Me li sa dokter naryen fer, ki napa naryen pou dir, alor zis ki i kapab dir se son leker i fermal ler i vwar sa gran, zoli lopital vid.

Zot o, ase fer nou krwar lizour pou aswar. Seselwa pe note pou 2025. Sa bann lalang ki zot pe dir, zis parey zot sanson Pinocchio ki zot ti sante La Digue Dimans le 5 Novanm dan zot pti *rally minoriter*.

Mr Speaker, les sa. Byento Praslin pou benefisyé avek en nouveau stasyon teste transport kot nou'n fini met premye pyer. Menm si MNA Elekte i dir ki li ki'n anmenn sa proze devan, me son Gouvernman pa ti tann li sa letan. Fer lapen, granmersi Gouvernman LDS in vin o pouvwar.

SPTC pou ganny son nouveau later kot zot pou delivre zot travay. Kiosk pou drayver Taxi kot lasose Ero. Pou osi annan dezyenm faz distribisyon later Ile Eve pou pti biznes. *Rock hammering* kot lafanmir Moosa, kot i annan plis ki 20 an zot pe espere. Kordgard pe al ganny renouvre. Plizer nouvo semen segonder pe al ganny fer, semen Anse la Blague pe kontinyen ganny negosye, apre plizer lannen zabitan pe

espere. Plizer lezot proze pou vini ankor lo nou pti zil.

E pour sa Mr Speaker nou dir en gro mersi nou Bondye Papa, pour sa ki nou pe gannyen lo zil. Mersi sa Gouvernman LDS atraver Minis Hassan ek son lekip ki pa'n dekoraze apre sa dezord total ki ti annan dan finans pei, avan 2020. En Bidze pei pa nenport ki dimoun ki kapab prepare, sirtou ler ou pran en pei ki ti'n preski faid, par en group dan Gouvernman oparavan.

Zot ti'n pran preski tou, akoz zot ti krwar sa pei ti zis pou zot. E zot ti mazin zis zot lekor parey zot per fondateur ti dir zot avan i kit sa later. Son nanm devan *Dieu*. Mon vreman apresye ki Minis Finans pa'n les tonbe nou pep Seselwa e pei Sesel, in anmenn bann zenn profesyonnel, egzanpler ki kapab ede prepar Bidze nou pei.

Kot sa bann profesyonnel in fer sir ki tou travayer i ganny zot lapey, ganny zot trezyenm mwan saler. Ganny zot 10 poursan, lasistans ek PUC, pansyoner i ganny R500. Pa parey avan ki pansyoner i ganny par R50 tou le-z-an ler Prezidan i ganny son laniverser. Lopozisyon minoriter i bliy vitman.

Mr Speaker, mon distrik Baie Ste Anne pa'n ganny

eparnye dan sa travay ki sa bann zenn profesyonnel in fer pou sa pei Sesel. Ler mon get sirtou bann proze ki ti'n zis dormi dan lapousyer pou en ta letan anba latab serten lofis, dan ansyen Gouvernman. Toultan fodre nou fer zot mazinen sa Mr Speaker. E avek sa Gouvernman *LDS* ki pa krwar dan les travay dormi dan lapousyer, Sa bann profesyonnel in tire, e ede pou vwar larzan pou fer sa bann zoli proze, ki vreman sanz Distrik Baie Ste Anne konpletman. E nou war labote nou pti distrik, kot mon toultan pouse pou arive.

Nou pa bliy osi nou Gouverner Labank Santral, Ms Caroline Abel ek son lekip ki pe vreman kontrole zot osi. Pou ed al pli devan pou ed sa pei al pli devan ek son devlopman. Si tou travayer dan sekter piblik ti osi travay parey, zot pa ti trenn lipye nou ti pou pli lwen an term travay e servis piblik pou nou pep.

Atraver sa bann kontrol ki Gouvernman *LDS* pe fer Mr Speaker, i annan parti politik sirtou sa parti minoriter ki dan Lasanble ki pa dakor avek sa, akoz zot annan lespri koripsyon, vole, visye. Zot krwar ki Gouvernman *LDS* i parey zot, ki ti zis lese fer. Zot anvi ki sa pei i fel e napa kontrol pou zot ganny pwen e bat lanmen lo nou. Me nou

bezwen fer zot konnen ki Gouvernman *LDS* pa pou zanmen les tonbe son pep e son pei.

Me non Mr Speaker, kot i konsern koripsyon nou Gouvernman pa krwar ladan. Koz lalang e bat latet...

(Interruption)

MR SPEAKER

Onorab, esper mwan en pti moman, ler ou koz lo koripsyon, i enportan ki ou pa akiz Manm ki dan Lasanble. Dan ou dernyen remark i annan en sizesyon ki ou pe akiz bann Manm la. Koz koripsyon i *ok*, e i rol Lasanble pou lager kont koripsyon. Me selman evite fer lakizasyon lo bann Manm ki dan sa Lasanble. Mersi. Onorab kontinyen.

HON DOYACE PORICE

Ok.

MR SPEAKER

E mon fer sa remark pou tou dimoun obzerv sa lareg silvouple. Mersi. Kontinyen *please*.

HON DOYACE PORICE

Me nou bezwen fer zot konnen ki Gouvernman *LDS* pa pou zanmen les tonbe son pep e son pei.

Me non Mr Speaker, kot i konsern koripsyon nou

Gouvernman pa krwar ladan. Koz lalang e bat latet Seselwa nou pa krwar ladan. Vol *taxpayers money* nou pa krwar ladan. Vol bann don ki nou gannyen avek lezot pei, nou pa krwar ladan.

Sa Gouvernman *LDS* i krwar dan annan respe, kontrol, travay dir, balanse pou nou tou benefisye. E nou krwar dan ler nou pei zanmi e lezot pei enternasyonal i krwar dan nou Gouvernman e pare pou anmenn zot sipor total anver nou Gouvernman, kot i tap laport zot reponn. E ler nou a resevwar plis ankor, Minis Finans pa pou ezite pou li partaz ankor plis ek nou travayer, e osi organiz nou pri lavi. Sirtou pou bann zabitan lo Praslin e zil pros.

Mr Speaker kot nou, nou kapab manz plis kanmaron ki ganny prodwi Sesel, me pa pou fer nou mars an aryer parey parti minoriter dan sa Lasamble pe sey fer nou krwar. Me zot blye ki dan zot letan zot ti sonny kanmaron. Me Seselwa pa ti ganny sans manz parey zot ti ava anvi. Akoz zot ti les abandonnen e partaz antre zot. Ni larzan, ni kanmaron nou pa'n zanmen vwar ankor, ziska sa lannen.

Se sa. Se sa ki sa letan Seselwa ti vvar ki sa Gouvernman *SPPF*, Lepep e *US* ti pe mars an aryer parey kanmaron e Seselwa ti

komans dekil zot. Akoz seselwa ti santi ki sa Gouvernman ki ti o pouvwar pa ti pe zer zot larzan byen, pa pe les Seselwa travay, zis fer zot viv anba servis sosyal, pou ganny vot. Koriz mwan Minis Finans.

Mr Speaker, degre lopozisyon minoriter in fini andoy zot lekor e ganny fobya avek sa ki'n arive letan zot Gouvernman ti o pouvwar, zot zis prezan mefyan, mefyan sa ki la o pouvwar. Tou sa ki Gouvernman *LDS* i anmennen, menm Bidze pei zot mefyan. Pourtan sa bann menm travayer ki pe travay. An plis ki sa nou annan bann zenn ki pe fer sa travayer a kote Minis.

Tousala Mr Speaker, parti minoriter pe zis fer Seselwa krwar lizour pou aswar, kot napa naryen ki Gouvernman aktyel pe fer ki byen. Menm si Minis pou dir ki nou'n ganny en balo larzan an plis zot pa pou krwar. Akoz zot toultan negative e pa pou aksepte larealite. Zot ti krwar ki Gouvernman pou fel apre ki zot ti'n pran tou sa ki pei ti annan Septanm 2020. E zot ti donn Minis Hassan en kof vid.

Minis Finans in anmenn devan nou en Bidze dapre sa ki pei i annan pou servi. Non pa en Bidze ki pou fer faid pei, en Bidze ki tou Seselwa i vvar li ladan. Atraver zot saler lafen

dimwan, zot lasante, ledikasyon pou zanfan, e plizyer keksoz ki konsern lavi Seselwa e pei li menm. I pa'n anmenn en Bidze ki pou konsern zis en pti group Seselwa.

Mr Speaker, mon ti a kontan ki avan mon vot lo sa Bidze, Minis Finans i dir nou kote ki ekri ki Sesel i premye dan koripsyon, premye dan koz lalang, premye dan vole.

Akoz mon pe demann sa kestyon? Se akoz i annan en santer popiler naryen fer dan parti US, ki ti'n fer en sanson lo sa bann parol ki mon'n repeete.

Me Mr Speaker, mon kapab krwar akoz sa santer in sant sa kalite sanson. Gouvernman lepase son priyrite pou ganny vot, se donn bann santer bokou larzan. E menm donn *loan* ki pa'n zanmen ganny rann. Donn zot later, lakaz menm si zot annan enn. E Minister Finans sa letan ti *ok* ek tousala, zis pou zot reste o pouvwar.

Ozordi zot pa pe gannyen ek sa Gouvernman ki la o pouvwar, alor i pa'n dan son faver. Sa bann manboulouk ki zot Gouvernman ti fer, ti vreman mal. Mr Speaker, Nou Gouvernman ek Minis Finans i krwar dan lazistis, dan *accountability*, dan en travay zis, akoz i *taxpayers money* ki

nou pe koz lo la. Sa santer i ankor pe reve, i ankor pe rev 0ktob 2020. E i ankor pe mazin lo tou sa ki i ti benefisyé sa letan, kot lezot santer pa ti pe benefisyé.

Zot ti bezwen kontinyen trimouse pou zot met en *CD* deor, ouswa rod en bout pou met avek en lot bout pou zot aste en bout lenstriman lanmizik. E sa ki mizisyen ou santer Praslinoise pe pas ladan, e zot in rakont mwan. Alor mon pou demann Minis pou get dan Bidze si napa en pti granm pou bann santer ki pa'n benefisyé avek sa Gouvernman oparavan, pou zot osi organiz zot. Espesyalman bann santer e mizisyen lo Praslin e Zil Pros.

Bokou Seselwa i konn tre byen ki ti pase dan nou pti pei Sesel par sa Gouvernman oparavan. Tou sa bann dezord dan larzan Lepep Seselwa, prezan zot fer krwar zot pa konn naryen, e naryen.

Seselwa i konn byen sa bann dezord ki zot in fer, zis parey kit bokou lenfrastriktir sportif abandonnen, espesyalman sa laplenn La Digue, ki Onorab Rocky Uranie, atraver ou Mr Speaker. Ozordi i ganny kouraz pou dir Minis demisyonnen. Kan zot Gouvernman ki'n les bann sportsmen La Digue fel. E li ki devret demisyonnen Mr

Speaker, akoz li osi in fel bann *sportsmen* digwa.

(APPLAUSE)

HON DOYACE PORICE

Ki pa'n zanmen ganny gete par son Gouvernman. Praslin osi pa'n ganny eparnyen kot i konsern *sports*. Minis demisyonnen akoz *sportsmen* pa'n anmenn ase meday lor pandan Zwe de Zil, sa lannen? Mr Speaker, konmsi Minis ki ti al fer *sport*, pou parti Lopozisyon minoriter. I paret ki meday larzan ek bronz pa ti enportan pou zot. Les mwan dir zot ki sa bann *sportsmen* ki ti anmenn meday larzan ek meday bronz i osi enportan parey en ki'n ganny meday lor. E zot osi zot ganny zot pti konpansasyon.

Ou war Mr Speaker, kot zot vreman negative e pe toulstan mazin an ayer. Enkrwayab. Tou fason *sportsmen* pe note e pe get zot de pre. E mwan mon pou demann Minis Finans ki ler i ganny en pti larzan anplis pou kontinyen get nou *sportsmen*. Sirtou atraver lenfrastriktir, lekipman, espesyalman bann *sportsmen* ki sorti lo nou zil Praslin e Zil Pros. Akoz nou zenn lo Praslin in ganny bokou neglize dan lepase.

Sa Gouvernman LDS atraver nou Prezidan Wavel Ramkalawan, son *Cabinet*

Minis, Labank Santral pandan sa 3 an in toulstan met sa pep e pei premye. Menm si pei ti dan problem zot pa'n les tonbe. Zot in kontinyen apiye pou le mye, zot pa'n les personn dir zot ki pou fer. Zot in kontinyen anbeli sa pei. Mr Speaker, non pa parey sa parti minoriter ki krwar ki zot ki la, zot krwar ki zot ki ti pe fer pli byen, kan zot Gouvernman in fatige koz mansonz, soutir koripsyon.

Vol later, partaz larzan antre zot dan kasyet, zis parey larzan *forgo* ki annan serten Onorab...

MR SPEAKER

30 minit-30 minit Onorab. Terminen silvouple.

HON DOYACE PORICE

Be Mr Speaker, ou'n pran en pti pe letan pou mwan.

forgo ki ti annan serten Onorab dan setyenm Lasanble ki ti Minis ki ti pran son gro sonm. San mazinen si i ti annan Seselwa ki lafen parey zot toulstan vin dir nou dan sa Lasanble.

Degre ki zot in anmenn sa pei, ziska laprev in montre devan Lakour Ile du Port, kot i annan zot dalon ki ankor pe rimann, tousala pep Seselwa in note. E in tir zot o pouvwar 2020. *100 ans pour le voleur un jour pour le maître*, parey toulstan gramoun in dir. E se

nou Bondye Papa ki'n met lanmen lo nou pti pei Sesel. E in dir, *enough is enough!* Bondye in met dan lanmen en zom ki krwar dan li, e pa krwar dan *voodoo*. E sa pa lot ki Prezidan Wavel John Charles Ramkalawan.

(APPLAUSE)

HON DOYACE PORICE

Prezidan Wavel Ramkalawan ek son Gouvernman in netway sa semen pikan, pou sov nou pep ek nou pei Sesel, e tir li anba en ladministrasyon SPUP, SPPF, Lepep e la i US. *Use Shit* pou tou sa bann pese, ki zot in fer pandan sa 43zan.

MR SPEAKER

Onorab, konklir silvouple. Konklir. Onorab Konklir silvouple.

HON DOYACE PORICE

Minis Finans, mon ti a kontan konnen si dan sa Bidze i annan gro logmantasyon saler pou Prezidan, Vis-Prezidan, bann Minis, MNAS, bann ziz ki pe petet mon pa'n get byen. Akoz sa, akoz mon demann sa? Mr Speaker, se akoz *Leader Lopozisyon* avek son parti minoriter, i ankor pe fer politik bon marse. E kontinyen repete menm dan son repons lo Bidze in dir.

Pou terminen Mr Speaker, mon pou remersi

mon Clerk Ina Espanon ki'n ed mwan bokou kot i konsern travay dan distrik. Mon remersi *ex DA* Baie Ste Anne, Denis Antat pou son sipor e ki i ankor pe donn mwan atraver son nouvo pos dan *PUC*.

Mon remersi nouvo *DA* Bertie Cedras pou son sipor pandan sa 3 mwan, ki la avek son *staff*. Mon osi remersi tou biznesmenn ki'n siport mwan ek Gouvernman. Mersi bann ners, dokter, dantis e tou travayer ki pe fer bann bon travay dan lopital Praslin. En remersiman i al pou tou mon bann aktivis *LDS* e tou bann zabitan Baie Ste Anne pou zot sipor.

MR SPEAKER

Mersi Onorab.

HON DOYACE PORICE

E konsiltasyon ki zot in fer avek mwan.

MR SPEAKER

Mersi Onorab. Mersi.

(laughter)

(APPLAUSE)

MR SPEAKER

Laparol pou Onorab Philip Arissol.

HON PHILIP ARISSOL

Mersi Mr Speaker. Bonzour Mr Speaker. Bonzour Minis. Tou

koleg onorab. Tou dimoun ki pe swiv nou spesyalman tou zabitant Anse Boileau.

Mr Speaker, i avek en gran sans lafyerte ki mon pe eksprim mon sipor pou Bidze 2024 prezante par Minis Hassan. En Bidze ki'n ganny konsevwar pou deservi lentre tou zabitant Anse Boileau e osi tou Seselwa. En travay ki'n komanse depi Oktob 2020 ler ki Ladministrasyon *LDS* ti vin o pouvwar e pe diriz sa pei.

Mr Speaker, sa Bidze i reprezent en plan konplet ki vize abord defi ki pli irzan nou nasyon, e an menm tan ankouraz devlopman dirab ek krwasans ekonomik. I konsider bann diferan bezwen nou pep e fer zefor pou kree en meyer lavenir pour tou Seselwa.

En pilye kle sa Bidze se revitalizasyon lekonomi. Propozisyon Minis Hassan i konsantre lo atir lenvestisman, ankouraz lantreprenarya e diversifye nou lekonomi.

Mr Speaker, stratezi pou transform e diversifye nou lekonomi i enn ki pou a lonterm. Pour sa stratezi reisi, nou pou bezwen bokou lenvestisman, devlopman lenfrastriktir, e pli enportan en sanzman latitud ver nouvo model pou biznes. Tro souvan, nou pri dan bann vye fason fer

biznes e nou pa adapte ou evolye.

Mr Speaker, avek evolisyon dan nou fason fer biznes nou kapab kree nouveau loportinite travay e redwi to somaz, sirtou parmi nou bann zenn.

Egalman enportan se langazman Gouvernman dan byennet sosyal. Bidze 2024, in met resours pou ranforsi nou sistenm swen lasante, pou asir bon kalite servis medikal aksesib pou tout sitwayen. In met laksan osi lo lavansman ledikasyon nou bann zanfan par donn zot zouti ki zot bezwen pou reisi dan sa lemonn ki pe sanze rapidman.

Ler nou envesti dan swen lasante e ledikasyon, nou pe envesti dan lavenir nou nasyon, e nou bann zanfan. An plis ki sa Mr Speaker, devlopman dirab i osi bann plan sa Bidze. Sanzman klimatik pe kontinyen poz menas enportan pou nou lanvironnman, nou lekonomi, e nou fason viv. Par konsekans, mon kontan pou konstate ki dan sa Bidze Minis pe ankouraz plis lenvestisman dan bann proze lenerzi renouvlab. E ki Gouvernman pou bezwen antre plis dan partenaria piblik prive, anvi ki tou sa bann lenvestisman dan sa sekter i koute.

Mr Speaker, pou ankouraz plis lenvestisman

par sekter prive dan sekter prodksyon lenerzi renouvlab, Minis in anonse ki ankor 5 an adisyonnell in ganny mete pour sa bann lakonpannyen kapab *carry forward losses*. Alor sa i a vin en total 10 an. Sa ladministrasyon i rekonneta lenportans lenfrastriktir solid dan kondwir krwasans ekonomik. Se pour sa i en porsyon enportan dan Bidze i vize ver devlopman lenfrastriktir. Tel ki konstriksyon semen, pon, por. Sa bann lenvestisman se pou asir konneksyon san problemm atraver pei.

Fasilit komers. I osi annan en porsyon pou devlopman lenfrastriktir lasante, ledikasyon e sportif. Pandan sa 3 dernyen lannen, sa Gouvernman pe kontinyen envestir pou remet bann lenfrastriktir sportif ki'n tonm an rin lo en nivo akseptab. En sonm R48.3 milyon in ganny mete dan Bidze pou sa. E depans pou renovasyon Stad Linite pe kout pei R5.5 milyon.

Kontinyasyon travay renovasyon *Palais des Sports*, R7 milyon. Renovasyon basen naze Roche Caiman, R 1.5 milyon. Renovasyon lezot lenfrastriktir sportif, R 1.5 milyon. Renovasyon *flooring* kot *Victoria gymnasium*, R 1.5 milyon.

Mr Speaker, avek bi pou desantraliz aktivite sportif dan

Bidze 2024, i annan en sonm R4.5 milyon pou renovasyon *Complex Sportif Anse Royale*. R15 milyon pou konstriksyon *indoor court* Anse Royale e renovasyon *sport complex*, La Digue sa pou kout R1 milyon. En sonm adisyonnell R10 milyon in ganny bidzete pou siport lezot travay renovasyon lo bann lezot fasilite sportif.

En sonm R 4.3 milyon in osi ganny mete pou renovasyon bann lezot lenfrastriktir sportif dan bann distrik. E Mr Speaker, mon swete ki bann lenfrastriktir sportif dan mon distrik Anse Boileau i ganny enkli.

Mr Speaker, ladministrasyon LDS koman en Government serye e senser i reste angaze pou soulaz bann dimoun ki pli vilnerab dan sosyete. Program proteksyon sosyal e *welfare* in ranforsi e elarzi. R868 milyon in ganny bidzete pou sa bann benefis. Gouvernman pe osi azout en nouvo benefis anba *statutory benefits*. Sa i pour bann manman ki donn nesans plis ki en baba a la fwa.

Pour sa nouvo benefis paran pou ganny en sonm R3,134 pour sak zanfan adisyonnell ziska en maksimonm R6,635. Mr Speaker i osi annan revizyon dan bann lezot benefis tel ki benefis maternite/paternite ki pou sorti R2,480 pou vin

R6,633. Lalis i long lo sa bann benefis.

Mr Speaker, programm ki ti komanse an 2022 kot Gouvernman ti *top up* bann benefis pou pansyoner, dimoun avek dezabilite e envalidite ziska en maksimonm R500 pou kontinyen. Gouvernman pou kontinyen donn sipor sa group ki pli bezwen. E pe osi fer provizyon R310 milyon pou peyman bann *home carers* anba lazans *home care*.

Mr Speaker, dan swen lasante en sonm R3.1 milyon in bidzete an 2024, sa pou ranplas twatir sant lasante Anse Boileau. An se moman travay *maintenance* pe ganny fer. Sa i enkli penn e adres problemm elektrisite. Anmezir ki sa pe ganny fer, i annan lezot pti travay *maintenance* ki pe osi ganny fer.

Dan sa sonm, i osi enkli travay renovasyon Lakaz Dokter ki baze dan Distrik Anse Boileau sirplas Anse Boileau. Lo sa note mon ti a kontan osi rapel Minis pou enkli dan sa sonm, en pti larzan pou enstalasyon sa zenerater kot sant lasante, Anse Boileau.

Mr Speaker, Gouvernman pe investir bokou dan konbat kont fleo sosyal. Batay pou anpese ki drog ilegal i kontinyen antre dan pei, nou bezwen kontinyen aport sipor

pou sa group dimoun ki'n tonm dan labi drog ek lalkol.

Dan Bidze 2024, Gouvernman in fer provizyon 2 proze avek bi pou siport reabilitasyon pasyan avek adiksyon. En nouveau sant reabilitasyon pou sa bann pasyan pou ganny konstri English River e sa pou kout Gouvernman R 14.5 milyon. R3 milyon pou renovasyon sant Anse Bouden, Praslin. E la mon pe mazin en manman ki pe fer tou son posib pou ganny gerizon pou son garson.

Avek sa bann lenstitisyon, mon swete ki tou bann zenn i rod rekour kot sa bann lenstitisyon pou ki zot a geri, antre dan en lanplwa e ede kontribye pozitivman dan sisyote.

Mr Speaker, lalit kont labi drog ek lalkol i pa en zafer zis Gouvernman. I en zafer ki konsern nou tou. Alors, mon pe demann nou tou Seselwa annou fer nou kontribisyon pou lager kont sa bann fleo.

Mr Speaker, en sonm R142.1 milyon in ganny bidzete pou 2024 pou bann proze kapital dan sekter ledikasyon. E Anse Boileau pou benefisyé avek travay renovasyon lekol segonder ki pou kout R3 milyon. An menm tan Mr Speaker, mon ti a kontan demann Minis pou osi konsider lekol primer Anse Boileau, enn parmi bann pli

veye lekol dan pei. Laba osi i annan bokou travay pou fer.

Mr Speaker, sa lannen i fer katriyem Bidze Nasyonal ki ladministrasyon LDS i prepare pou devlopman nou pei e devlopman nou bann distrik. Menm avek resours limite, Minis Finans e Gouvernman pe debourye pou amelyor lavi nou bann zabitant. Mon distrik i enn parmi bann premye ki'n komans benefisyé atraver proze distrik zis apre ki LDS ti ganny elekte pou diriz sa pei. Prezidan Ramkalawan in personnelman enplike dan rezourd sa problem drenaz ki ti pe afekte Anse Boileau, sirtou nou bann zanfan lekol.

Mr Speaker, Gouvernman in antreprann proze konstriksyon pon e drenaz apropriye lo larezyon lakot, avek bi redwir risk linondasyon ki afekte rezidan, fermye, nou lekol primer e osi lekol segonder. Ler ki Gouvernman in investir dan konstriksyon pon, nou'n reisi anmenn plis sekirite dan sirkilasyon transpor e pyeton dan nou distrik, sirtou pou bann zenn etidyan lekol primer.

Nou bann zanfan nepli bezwen absant lekol pandan sezon gro lapli avek lafreyer linondasyon. Sa i asire ki ledikasyon nou bann zanfan i reste san enteripsyon. E ki zot

annan en lanvironnman ki sen e an sekirite pou laprantisaz. An plis, enplimantasyon dan sa sistem drenaz apropriye in bes bokou lenpak linondasyon dan rezyon agrikol. Nou bann fermye ki ti soufer bokou pert akoz linondasyon lo laferme rekolt andomaze.

Avek sa facilite drenaz ki'n amelyore, nou'n reisi asir zot pli bon proteksyon. Eskiz mwan. Avek lenfrastruktur drenaz ki'n amelyore, nou'n reisi asir zot pli bon proteksyon kont linondasyon, e asir soutenabilite zot biznes. Sa pa selman ranforsi nou lekonomi lokal, me osi sofgard nou sekirite alimanter.

Pou premye fwa Mr Speaker, mon bann zabitant ki reste dan plato e dan rezyon santral e menm nou bann fermye zot kapab dormi anpe.

Enn bann benefis mazer ki mon fyer mon'n anmennen se re sirfas nou bann semen. Zabitant in soufer bokou e zot transport in ganny andomaze pandan plizyer lannen. Aprezan zot pe komans soulaze. Letan mon pe koz lo re sirfas semen, mon pe demann ek Minis pou osi konsider re sirfas semen Anse Louis/Mont Plaisir ki bokou nou i konsider koman en semen segonder me ki annefe i en semen primer. Mr Speaker, sa semen i vreman dan mal.

Menm si mon satisfe avek realizasyon sa bann proze, ki nou'n reisi fer pandan sa 3 dernyen lannen, i ankor reste touzour bokou plis travay pou akonplir dan nou distrik. Enn bann problem irzan ki demann latansyon imedyat se mank akse semen apropriye dan serten sou distrik, tel ki Caiman Estates, Anse Louis, Cap Ste Marie, Hermitage e Montagne Posee.

Sa bann problem i koz bokou lenkonvenyans pou nou bann dimoun aze, parey Madanm Faure, Msye Pillay, Madanm Labiche, Madanm Louis e bokou lezot ki depann bokou lo servi lanbilans regilye.

I enportan pou nou priyoritz konstriksyon semen apropriye dan sa bann sou distrik, pou asir servis medikal irzans dimoun aze nou distrik, e osi rezidan an zeneral. Par adrese sa bann bezwen, nou pou kapab ofer en lanvironnman ki pli an sekirite e pli aksesib pour tou rezidan sirtou nou bann dimoun ki pli aze.

Mr Speaker, an plis ki sa nou osi bezwen konsantre lo renovasyon bann lakaz administre par *PMC* dan distrik Anse Boileau, tel ki Caiman Estate e Lesperance Estate. Sa bann lakaz i date en pe letan e travay renovasyon i neseser.

Ex-Cable and wireless Estates laba i annan demann en letid serye pou vwar ki fason nou kapab rezourd problem basen ki plase dan plafon e souvandfwa pe *overflow* ouswa bann dren ki bloke. Mr Speaker sa i en lenkonvenyan pou bann zabitan.

Mr Speaker, konman *MNA* Anse Boileau mon'n lager for pou amelyor kalite lavi nou bann peser, e mon ankor pe lager. Menm si nou pa ankor ganny tou sa ki nou'n demande, mon satisfe ki en gran zefor in ganny fer pou bann peser Anse Boileau ki operate dan rezyon Anse la Mouche.

Apre ki lapas in ganny aranze, i annan aprezan en proze mazer pou konstri en lenfrastriktir, en fasilite modern dan sa sou distrik e mon annan konfyans ki avek devlopman lotel dan sa landrwa, nou bann peser, fermye e lezot zabitan pou benefisyen kantite. Mon ti a kontan remersye lasosyasyon peser, dirize par Msye Randolph Valmont, ki pe akonpanny sa devlopman e ki pe donn bokou sipor nou kominate. Mon pe kontinyen koz avek *SFA* ek Minister Lapes pou reponn lapel nou bann zabitan.

Pour Anse Boileau santral, nou pe finaliz bann

detay pou en partenarya avek enn nou zabitan ki osi en biznesmenn, pou konstri en fasilite ki pou ofer servis en laboutik spesyalize dan pwason e bann prodwi lanmer. Mon pe swete ki pou osi annan fasilite pou lavant legim.

Pou mon bann zabitan ki pe fer zot biznes lavant legim dan kontour pros avek Ladministrasyon Distrik, mon kapab dir zot ki nou pe finalman trouv en laranzman avek Gouvernman Lokal pou ki zot ganny en fasilite ki apropriye pou zot kapab fer zot aktivite.

Tou sa bann proze i pran letan akoz nou bezwen fer li byen e dapre Lalwa. Konmela pa parey lontan kot zis ou vini, ou pran later dimoun, ou fer sa ki ou anvi avek. Tou Lalwa i bezwen ganny swiv e souvandfwa sa i pran letan. Antretan, bann gran e pti proze dan distrik pe entansifye. Lannen 2024, zabitan pou vwar en diferans.

Mr Speaker, en sonm ki pe reprezent 22.5 poursan Bidze total kapital an 2024 pe ganny bidzeter dan sekter lakaz e alter. Gouvernman pe kontinyen rod finansman neseser ki pou ed li envestir dan bann proze lakaz ki pou an retour ed nou popilasyon ganny zot prop lakaz.

Mr Speaker, mon fyer pou dir ki dan Bidze en sonm

R335.4 milyon, R12 milyon in ganny bidzete pou proze 24-unit *ex-Zelia* Anse Boileau. Sa pou benefisyé 24 fanmir dan mon distrik ki pou lontan pe espere pou ganny zot prop lakour.

Lo kote *land bank* en sonm R4.5 milyon i'n ganny propoze dan Bidze, pou proze *land bank* Cap St Marie. E mon ti a kontan lo sa note Mr Speaker pou remersye lafanmir Servina e Antat e tou lezot ki'n donn *way leave* pou ki sa proze a finalman kapab demare. Kot ankor 11 fanmir a benefisyé avek zot kare later pou zot kapab fer konstriksyon zot lakour.

An konklizyon Mr Speaker. Mon pe aport mon sipor pou sa katriyenm Bidze prezante par Minis Hassan. Akoz mon vvar Anse Boileau ladan, e osi tou Seselwa. Sa i reflekte laspirasyon e promes Gouvernman *LDS*, anmezir ki nou kontinyen travay anver en sossyete prosper e zis. Mon oule felisit Minis Finans e son zenn lekip dan planifikasyon, previzyon e devouman pou deservi nou nasyon. Ansanm, annou ini pou siport sa Bidze e travay san ses pou realiz nou lobzektif.

Mr Speaker, mon ti a kontan fer note ki pandan bann diskour par bann dirizan *SPUP*, *SPPF*, Lepep, US nou ti souvan antann zot dir

“Seselwa, ser sang”. Mr Speaker, wi, nou ti sere sang, e sa letan zot, zot ti pe mars labraget ouver. Mersi. Mersi Mr Speaker.

(laughter)
(APPLAUSE)

MR SPEAKER

Onorab, mon pa konpran sa dernyen fraz ki ou'n servi. Mon pa konpran akfer ou'n servi li. Mon sizere ki sa kalite limaz ki nou pa anvi tande dan Lasanble. Mersi. Laparol pou Onorab Gabriel.

(APPLAUSE)

HON CONRAD GABRIEL

Mr Speaker. Bonzour tou dimoun a lekout. Spesyalman zabitan Point Larue. Dabor Mr Speaker, mon a zis met lo rikord ki Bondye i pou nou tou. E Bondye i dan kote nou tou, pa zis lo kote *LDS*. Mersi.

Mr Speaker, Minis in ouver diskour Bidze 2024 par refer resorti ankor ki ladministrasyon *LDS* in vin o pouvwar dan en moman ekonomik pli difisil dan listwar pei. E kot zot in kapab vir sityasyon potansyelman katastrofik e retourn pei a son normalite e menm fer li pli byen ki avan sa kriz ekonomik.

Me ki Minis in blyie mansyonnen parey son

labitid, se ki ti Gouvernman US depi komansman 2020 ler pandemik *COVID-19* ti pe komans propaze partou dan lemonn e osi komans afekte nou pei, i ti met tou bann sof gard e Polisi neseser an plas pou protez nou lekonomi e tou nou sitwayen.

Sete nou an Avril 2020, ki ti vin avek en lamannman Bidze pou lannen 2020, ki ler nou ti prezant devan Lasanble zot ti refize aksepte lo komansman. Kot nou bezwen fer en nouveau Bidze pou lannen 2020, ki ti pou met an plas tou bann mezir striktirel pou protez nou lekonomi pandan bann peryod *lockdown* global e kontinyelman pandan lannen.

Nou bi sete pou asire ki bann biznes pa *faid* e bann travayer pa perdi zot mwayen viv, pou ki ler pei i reouver tou nou bann servis, biznes e travayer i an plas pou kapab rekonomik nou bann aktivite ekonomik. O kontrer ki zot ti fer? Zot ti pou Minis Finans dan Lasanble sa letan e Gouvernman US ti bezwen lager pou asire ki Bidze 2020 i ganny amande e ganny pase dan Lasanble pou anpes en tel sityasyon potansyelman katastrofik ki zot pe koz lo la ozordi.

An Oktob 2020, *LDS* in zis kontinyen avek sa plandakson e i menm oubliye ki se zot an Zanvye 2021 ki ti

re ferm pei pou en dezyenm fwa. Me apre zot sey rod laglwar e sey konfiz pep Seselwa, par dir ki se gras a zot ki zot ti reouver pei an Mars 2021 pou kapab redres pei. Be Mr Speaker, i toutafe normal pou *LDS* reouver pei, akoz sete zot menm ki ti ferm pei e pa nou.

Minis Finans in osi fer resorti ki Sesel ozordi pe vwar sikse ekonomik lo nivo mondal e sa i gras a zot travay formidab pandan sa 3 an. Ankor enn fwa Mr Speaker, sa i montre ou ki mannyer sa ladministrasyon i kontan re-ekrir listwar e mars par senm fo propagann pou ganny siporter. Siporter osi pe konmans konpran en.

Mr Speaker, avan ki pandemik *COVID-19* ti tap nou, nou pei ti deza lo en leta progre soutenab a stab. E Sesel ti deza pe ganny felisite lo nivo mondal e nou bann lendeks devlopman e ekonomik ti deza enpresyonan e ti pe kontinyelman amelyore. Nou ti pe fer sirplis fiskal par lao 2.5poursan tou le lannen depi reform ekonomik 2008. E nou ti menm lo semen pou fer nou det desann pou vin 50poursan nou *GDP*.

Alor Mr Speaker, in ler pou nou aret koz lalang. *LDS* fodre ganny li kler ki se pa an Oktob 2020 ki Sesel in ganny libere. Se pa zot ki'n liber nou.

I pa an Oktob 2020 ki nou'n komans fer semen, lakaz, lopital, por e lezot lenfrastriktir. In pran nou 43 an pou batir e zot pe pran zis 3 an pou detri.

(APPLAUSE)

HON CONRAD GABRIEL

I zis bann propagann pou anbet pep Seselwa ki progre in zis pandan sa 3 an ki zot in o pouvwar. *No way*, Seselwa lizye in ouver. Zis get Dimans pase, La Digue. Mon a sezi loportinite pou remersye tou Digwa, Pralinwa e lezot dimoun sorti Mahe. Mersi pou zot sipor. *Rally minoriter*, ti fer Sanmdi Marie-Jeanne Estate, Onorab Porice.

(APPLAUSE)

HON CONRAD GABRIEL

Fer renovasyon oubyen kontinyen enplimant bann plan devlopman, parey *Victoria Waterfront*, Beau Vallon Waterfront, Zil Eve. Por Praslin, proze reklanmasyon, e zot ti deza dan plan. Tousala ti deza dan plan Vizyon 2033. Nou Gouvernman pa zot ki'n vizyonnen. Nou Gouvernman ki'n vizyonnen. Onorab Gill in fer sa resorti tre byen kler yer. O kontrer zot in mal fer li, pa li sa plan ki ti annan. Tou fason 2025 pa lwen.

LDS in erit tou plan pou li zis kopi e enplimante, apre zot le ganny felisite e apel sa zot lakonplisman. Sanmenm sa nou apel zot en Gouvernman koup riban.

Alor Mr Speaker, mon dezyenm kestyion se oli zot bann prop vizyon? Pli siperyer ki zot ti swadizan annan. Ti sipoze pe vin fer pli byen. Wi, Onorab Samynadin nou bezwen dir zot, zot sipoze vin fer pli byen. Kontan pa kontan.

Bidze 2024 i montre ou ki mannyer sa Gouvernman i fatige e pa kapab adres bann defi dizour. Nou'n menm vwar ki mannyer sa Bidze in ganny delivre par Minis Finans. Ki menm bann Manm Onorab *LDS* ti dan sok e menm pa'n kapab donn en laplodisman ki merit ganny donnez ler en Bidze efikas e balanse i ganny prezante.

(APPLAUSE)

HON CONRAD GABRIEL

Konmdir Onorab, byen pize, byen bennyen.

Nou ava rapel ki mannyer Prezidan Larepublik in sey fer nou krwar ki in erit en kales kase an Oktob 2020. Me o kontrer, nou'n vwar ki mannyer sa Bidze 2024 in ganny delivre lo zot prop kales kase ki zot pe batir pou nou pei lo la. Mon dir sa,

senpleman akoz napa okenn mezir serye dan sa Bidze pou adres nou bann defi ekonomik e soulaz nou popilasyon, sirtou bann ki pe pli ganny afekte avek sa transformasyon radikal.

Mr Speaker, *LDS* pe koz lo sikse ki zot pe fer. Me par kont ki nou vwar, se zesyon finans piblik anba *LDS* ki pe deteryore.

Pou premye fwa depi reform ekonomik 2008, nou pou vwar ki mannyer Gouvernman pa pou atenn target fiskal ki'n ganny bidzete. Bidze 2023 ti ganny prezante avek en target sirplis fiskal 1.1poursan.

Bidze 2023 nou a rapel i enn pli kontroversyal, kot Gouvernman in le depans plis larzan ki i annan san konsidere ki nou lekonomi ankor pe rekipere e met fardo lo sekter tourizm pou pey tax adisyonnal ki pa efikas. Pou li kapab finans son Bidze kanpanny par konpromi nou bann baz ekonomik ki deza sansib.

Legzanp kler Mr Speaker, sa prizon ki zot pe lager pou met zil Marie-Louise. Annou pa ouver en laport ki nou pa pou kapab fermen. Annou fer byen atansyon, pa les pouvwar mont dan zot latet. Pou kontinyen, ki nou pe vwar pe arive ozordi?

Mr Speaker, Minis Finans in vin dir nou ki nou pa pou fer en sirplis fiskal 2023. Me o kontrer nou pou annan en defisit fiskal R2.4 milyon. Sa i fer premye fwa ki target fiskal pa ganny atenn par Gouvernman depi reform ekonomik 2008.

Par kont, mon ava fer remarke, ki menm ler nou Gouvernman ti prezant lamannman Bidze 2020, kot nou sityasyon ekonomik ti'n ekspekte deteryore, nou bann prozeksyon ki nou ti fer ti a la oter. E nou ti vwar ki nou bann prozeksyon ti materialize ek presizyon. Sa i montre ou ki planifikasyon Bidze e bann prozeksyon makro ekonomik pa'n a la oter dan sa Bidze 2023. E la mon le fer resorti ki dan planifikasyon en Bidze, ou touzour get ou Bidze orizinal pou ou fer analiz.

Mr Speaker, Gouvernman *LDS* in fel nou. Menm zesyon finans piblik zot pa pe kapab zere e la nou vwar ki mannyer pou lannen 2023 prozeksyon fiskal pa pou ganny realize.

Mr Speaker, pli enkyetan ankor se ler Minis i dir nou ki rezon performans 2023 i koumsa, e la mon sit prop mo Minis, "Sa in akoz nou'n anmas plis reveni ki ti'n prevwar e in annan en pti rediksyon dan depans" fen sitasyon. Me par kont, ler ou

get liv Bidze nou vwar le kontrer.

Mr Speaker, reveni *tax* ki ti ganny prevwar pou lannen 2023 ti R9.2 bilyon, me reveni *Revised End of Year* i aprezan R8.4 bilyon. Sa i reprezent en sonm aepre R778 milyon dan koleksyon *tax* an mwens ki pa pou materialize.

Bidze ki ti'n prozekte, reveni total ki ti enkli don pou 2023 ti R10.6 bilyon e *Revised End of Year* pou reveni total, enkli bann don ki'n ganny donne i R9.9 bilyon. E alor, ki sa kalite nivo analiz ki Minis pe donn nou Lasanble Mr Speaker?

I kler ki target 2023 ki ti'n ganny prozekte pa pou materyalize senpleman akoz reveni i pli ba, me non pa plis parey Minis in dir e pe sey nou krwar. Reveni pa'n antre espesyalman *excise tax, value added tax e business tax* ler ou get prozeksyon ki'n ganny revize konpare ek Bidze 2023.

Pli pir ankor ki Gouvernman pa oule aksepte, se ler nou dir ki *tourism* in ganny afekte sa lannen. Laprev i devan nou kot nou vwar ki Bidze koleksyon *tax* 2023 pou VAT lo *tourism* ti R1.07 bilyon. Me par kont sa in ganny revize pou aprezan vin selman R855 milyon ouswa en sonm R215 milyon an mwens konpare avek Bidze 2023.

Dokiman Bidze i menm site ki *growth* dan *tourizm* pou 10poursan pli ba ki Bidze 2023. E sa dapre zot i apel en *cool down in the recovery of tourism demand*. Koleksyon VAT lo *tourism* i menm 7poursan pli ba pou peryod ziska Septanm 2023 konpare avek menm period an 2022.

Mon lot kestyon alor se, ki pe arive ki Minis Finans pa pe donn menm, pa pe menm donn nou lenformasyon korek lo performans Bidze 2023.

E Gouvernman enkli menm Prezidan i kontinyelman pa le admet bann move performans anba son ladministrasyon ki apre nou dan US nou bezwen kontinyelman prouve avek bann sif ouswa avek lenformasyon presiz, parey nou pe fer la.

Pou kontinyen Mr Speaker, Minis in fer analiz lo reveni *tax*, par konpar koleksyon *tax* pou lannen 2023 avek koleksyon 2019. Be Minis, ou koleksyon *tax* pou 2023 i normal pou li pli o ki 2019, vi ki ou pa pe konpar menm kondisyon dan Polisi *tax*. An 2023, ou'n fer entrodwir de nouveau *tax* kontrovers lo sekter tourizm e osi lo bann *securities dealers*.

Alor i normal pou koleksyon monte. Pou nou konnen si ou koleksyon *tax* in vreman monte anliny avek

lagrandisman krwasans oubyen lekonomi en pei ou bezwen konpar li en kondisyon ki Polisi lo *tax* i parey, e ou tir bann novo Polisi ki'n ganny entrodwir ki naturelman pou fer koleksyon monte.

Zis par get logmantasyon dan *tax* dan sa ki nou apel *absolute terms* parey Minis Finans in fer, pa pe raport lo vre efikasite potansyel koleksyon performans *tax*. E alors Mr Speaker, si nou tir sa bann novo *tax*, possibleman ki nou koleksyon *tax* pa pe neseserman ogmante anliny ek krwasans pei.

Avek en tel defayans, sa i montre ou ki mannyer Gouvernman pe fel pou zer nou lekonomi. E se selman zot efikasite lo senm propagann ki fer zot ganny pouvwar. Parey nou'n vvar avan 2020 pou zot ganny elekson, ler LDS ti fer zot kanpanny lo fer desann pri lavi. LDS in touzour bon lo zis konplent, fer gran diskour e anpes pei fer progre par blok preske tou Polisi e plan ki Gouvernman sa letan ti vin avek. E sa ti arriv atraver peryod 15 lo 10.

E la pandan zot ladministrasyon eski LDS in fer desann pri lavi? Eski LDS in fer desann pri lavi? Larepons i non.

US MEMBERS

Non!

HON CONRAD GABRIEL

Minis Finans menm ti admet ki pri lavi pa pou desann Sesel, e sa ti zis mannev son *Leader* pour li ganny eleksyon telman i ti swaf pouvwar.

Sa Bidze 2024 pa'n vin okenn mezir pou adres pri lavi ki swadizan *LDS* ti annan solisyon ler i ti dan Lopozisyon, e ki i ti servi pou konvenk pep Seselwa pou vot pou zot.

Pandan sa 3 an nou'n vvar ki sa ti selman en taktik parmi lezot tel parey sa fame *TRNUC*, zis pou zot ganny pouvwar. E la ler zot o pouvwar, nou vvar ki *LDS* pa'n zanmen annan solisyon, sirtou la ler i pe fer fas ek bann novo defi ki i pa kapab kopi lo bann Polisi *US*. Ti fasil pou anmenn en kanpanny fer desann pri lavi avan 2020, menm si sa bann letan kot Seselwa ti dan pli gran konfor. E Gouvernman *US* ti annan bann mezir an plas pou protez tou kous nou lasosyete.

Ler Gouvernman *LDS* ti pran pei, zot in zis kontinyen enplimant mezir ki zot in vin zwenn la. Zot pa'n zanmen annan lot solisyon. A bokou repriz konmela *LDS* i dir zot in adres pri lavi par fer desann pri karbiran, fer desann pri elektrisite e fer logmantasyon

saler pou travayer Gouvernman.

Be Mr Speaker, sa bann mezir pa nanryen nouvo. I pa fer premye fwa ki bann tel mezir in ganny fer. Akoz dan lepase ler *US* ti o pouvwar sa bann mezir ti ganny servi pou efektivman adres lenpak pri eleve lo popilasyon kan ti neseser.

Alors mon kestyon, se oli zot prop solisyon pou zot menm, ki zot ti annan pou adres pri lavi? Larepons i tre senp. Ser e frer pep Seselwa, zot napa. *LDS* in montre nou ki mannyer zot pa'n kapab adapte ler in annan novo defi, akoz zot napa leksperyans pou zer en pei.

E la mon oule demann Gouvernman si eski zot solisyon pou fer desann pri lavi, se par fer desann *tax* lo *twin cab*. Come on Minis, ase pran Seselwa pou boufon.

Akoz ou pa fer desann pri bis? Kestyon. Bidze 2024 alor pa'n adresse ki mannyer Gouvernman pou amelyor kondisyon pep Seselwa.

Mr Speaker, parey mon'n toulstan fer resorti, Seselwa pe kriye la deor. Pri komodite pe pet plafon. Pri komodite dan bokou ka, in mont par lao 50poursan pri ki i ti ete avan 2020. Menm si lenflasyon dapre Minis i ba pour lannen 2023. Malerezman pri lo letazer i o, e i pa pe desann.

E pou lannen 2023 lenflasyon dan pei i ba akoz Seselwa i senpleman napa larzan pou depanse. E pe senpleman sirviv pou aste son bann komodite debaz ki menm tro ser pou bokou lakour. Sa Mr Speaker, i demontre ou ki mannyer Gouvernman i dekonekte ek problem Seselwa ordiner la deor. Ideolozi sa Gouvernman kapitalis liberal pa pe pran kont soufrans pep Seselwa. Bef dan disab, sakenn vey son lizye.

Pou demontre ankor ki mannyer Gouvernman pa pe get soufrans pri lavi sa pep. Zis gete konbyen *dividend* Gouvernman pe prevwar avek SEYPEC. Pou lannen 2023 en *dividend* R245 milyon pou ganny peye ek Gouvernman e pou lannen 2024, en sonm R250 milyon. SEYPEC i en lakonpannyen Gouvernman ki ekspekte fer pli gro profi konpare avek tou lezot konpannyen paraetatik pou sa 2 lannen ki pe vini.

Pou lannen 2023, SEYPEC i ekspekte fer en profi R252.2 milyon, e 2024 en profi R262.9 milyon. Ozordi pri karbiran lo laponp in monte. Ler ou annan en pri karbiran ki o koumsa, sa i osi fer ki pri komodite e kou biznes i monte akoz bann biznes i pas sa logmantasyon direkteman lo son konsonmater.

Alors Mr Speaker, menm si pri karbiran pe monte lo marse enternasyonal, SEYPEC pe kapab kontinyen kouver tou son loperasyon e menm fer profi lo en nivo ki nou apel *super normal profits*, anvi son monopoli ki i annan dan sa sekter.

Mr Speaker, SEYPEC pe fer en profi siperyer ki fer alors ki Gouvernman ti kapab sey abzorb en pe sa logmantasyon dan pri karbiran san ki i fer pert. Me o kontrer, nou annan nou en Gouvernman kapitalis ki napa okenn konpasyon pou pep Seselwa la deor, ki pe fer kriye avek pri ki nepli abordab.

Mr Speaker, Bidze 2024 i plen ek zis liste keksoz, me san donn detay lo ki mannyer sa bann Polisi pou ganny enplimante ouswa prodwir bann analiz ki zistifye bann tel propozisyon.

Sa i fer nou rapel gran lafanfar ki'n ganny fer lo plan pou diversifikasyon nou lekonomi, pou nou pa kontinyen zis depan lo *tourism*. Me selman nou ankor pe vwar ki Gouvernman pe ankor profit lo krwasans dan sekter tourizm, e pa pe kapab delivre lo son swadizan plan diversifikasyon.

Pour donn legzanp Mr Speaker, nou nepli tann koz lo bat kannel pou diversifie lekonomi. Pourtan ti annan

gro koze lo la. Zis parey *LDS* prezan in pran laglwar lo promouwvar lekonomi ble. Selman pou li ganny eleksyon zot ti sante e pile "Nou pa plant pwason". Ozordi par kont, zot pe plante pwason.

(APPLAUSE)

HON CONRAD GABIREL

E sanson "Pile" in ganny re konpoze.

Ozordi zot pe menm ouver bann diferan lizin ouswa biznes dan sa sekter lekonomi ble. Plis ankor, ozordi nou vvar Gouvernman pe aksepte lakonplisman *IECD* ki'n ganny mete dan dezyenm kategori pou bann sant Pti Anfans avek *UNESCO*. Sa i sa menm *IECD* ki zot ti apel *pet project* Prezidan Faure. Mr Speaker, avek *LDS* napa prensip e pider.

Mr Speaker, Gouvernman in dir ki i ekspekte ki nou krwasans ekonomik pou 2024 pou ogmant par 4 poursan. Sekter tourizm dapre Gouvernman i ekspekte pli gran fakter pou kontribye dan krwasans total pou lannen 2024. Alor, i ekspekte ki pou lannen 2024, pou annan en logmantasyon dan demann pou lenportasyon.

Sa i vedir ki demann pou deviz etranzer pou osi monte, e pou fer ki nou Roupi pou

eksepte deprese. Sa i vedir ki nou pou bezwen plis Roupi pou aste \$1.

Pri karbiran in osi ogmante an 2024, anvi sirkonstans global avek bann pei *OPEC*. Nou alor ekspekte lenflasyon pou monte an 2024.

E alor Mr Speaker, mon pe demande ki mezir ki Gouvernman pou met an plas pou adres sa bann sityasyon ekonomik ki pou enpakte lo nou popilasyon severman lannen prosenn?

Ki zot plan pou adres pri lavi ki deza o Mr Speaker? Bidze 2024 in *fel* pou adres e aport soutyen pou pep Seselwa.

Mr Speaker, dan son bann Bidze oparavan, e osi dan bann diferan lokazyon Gouvernman in fer resorti ki kad ladministrasyon saler dan Gouvernman i dezord e fodre ganny re vizite.

An 2023 Gouvernman ti konsolid 4 *allowance* pou li swadizan met lord dan sa dezord ki ti dir i annan. Zot ti vvar ki ti annan tro bokou *schemes*. Me la pou Bidze 2024, nou pe vvar ki plizyer *scheme* pou al ganny amande. Mon fer kler ki nou lo kote *US* nou'n toultan siport bann kondisyon favorab pou bann travayer kan in permet e sa in enn nou bann gran

lakonplisman pandan ler nou ladministrasyon ti o pouvwar.

Me kwa ki pa kler aprezan, se ki plan Gouvernman lo zeson saler bann travayer piblik? En zour zot dir *scheme* pa bon, tro bokou *scheme*, en lot zour zot amann *scheme* tel parey ki nou ti vvar kot Minister Lasante. I annan en dezord total. Sa i montre ou ki mannyer Gouvernman napa en plan lo ladministrasyon piblik.

Oli sa reform dan *DPA* ki'n zis sanz non aprezan i apel *PSB*, me ki ankor pe fer menm keksoz ki i ti dir pa bon dan lepase? Mrs Mohideen pa reste lontan pou dir zot mersi, *bye, bye* mon pe ale. Tou sa ki i met devan, i ganny fou kalot ladan. *LDS* i bon lo la. Zot servi lentelizans en travayer piblik apre ridikiliz li.

Mr Speaker, sa Gouvernman ki ti pou met larzan dan pos Seselwa in aprezan retir *long service allowance* bann travayer sekter piblik. Nou dir sa Gouvernman rann sa bann travayer zot *allowance*. Sa *scheme* ti ganny entrodwir pou amelyor kondisyon e retenir travayer Gouvernman.

Nou tou nou konnen ki *skill* travayer i *marketable*. E sa ti komansman en plan reminerasyon pou sirtou nou

bann travayer ki pa lo kontra benefisy'e avek.

Prezidan e son bann Minis i benefisy'e ek zot gratwite lafen lannen, selman zot vvar li difisil pou donn R500 pou sak 5 an ki en travayer i konplete dan servis piblik. Eski sanmenm sa annan zentere Seselwa a ker? Par kont, ki nou vvar Minis Finans fer, se reviz *tax* lo *bonus* koman son priyорite. Sa revizyon *tax* lo *bonus* i parey lentrodiksyon sa move *levy* lo sekter tourizm kot Gouvernman pa pe kapab met bann Polisi *tax* an plas ki modern e egal.

Sa rediksyon *tax* lo *bonus* pa pou neseserman benefisy'e bokou sekter. Se plizoumwen bann Sekter Banker, kot Minis depi ler in ganny apwente koman Minister Finans pa'n kapab separ son rol avek sa ki i ti annan Labank Santral.

(APPLAUSE)

HON CONRAD GABRIEL

Mr Speaker, mon le asir tou travayer sekter piblik ki an 2025 ler *United Seychelles* pou ganny eleksyon, ki nou pou fer retournen zot bann *allowance long service*, pey zot, zot trezyenm mwan lapey e retir tou sa bann lezot fardo ki zot in met lo ledo malere.

(APPLAUSE)

HON CONRAD GABRIEL

E sa i konpri sa laz retret ki'n monte pou vin 65 an. Sa group dimoun in travay vreman dir tou dilon zot lavi.

Mr Speaker, pou demonstre sa plis, sa Gouvernman *LDS* i enn ozordi ki napa prensip bonn gouvernans e latransparans. Proze kapital i ganny fer konmela san swiv prosedir e lotorizasyon *procurement* e *National Tender Board*. E pou zot sa i paret ok.

Ler ou tande ki Prezidan *i call* en endividé e demann li pou *design* en plan, eski sa pa i apel koripsyon? E sa pa i aple koripsyon e nepotism? Konbyen lezot proze ki zot pe zis *call* dalon pou fer.

Ler bann proze parey lopital e por La Digue i ganny fer san laprouvassyón *procurement* eski sa pa i apel move gouvernans ki zot ti pe swadizan promote dan 15 lo 10 pou zot ganny pouvwar?

Mr Speaker en odit i bezwen ganny fer deswit lo zeson proze kapital dan Gouvernman. Akoz i kler ki Gouvernman pa pe swiv prosedir *procurement*.

En lot defayans sa Gouvernman se lo fer analiz apropiye. Prezidan in deklare ki nou pe fer en nouveau Lopital Sesel ki pou kout aepre R1 bilyon. E la nou'n vwar Minis

pe kontinyelman demann tou Seselwa pou kontribye dan finansman nouveau lopital.

Mon oule demann Minis si i reste Sesel? Seselwa pe rente pou li azout enn ek enn, e la zot pe demann Seselwa ordiner pou kontribye dan nouveau lopital? Pli konsernen se ki napa okenn dokiman ki'n ganny prodwir pou demonstre : Enn, eski i annan en analiz apropiye ki'n ganny fer pou demonstre ki i pli efektiv pou konstrir en nouveau lopital?

Eski i annan en analiz ki'n *update* oubyen reviz *Seychelles Hospital Master Plan* ki ti ganny inisyé an 2015 pou aprezan zistifye sa nouveau lopital?

Klarifye si sa i pou en nouveau lopital ki pou annan tou servis anba en sel twa. Oubyen zis serten servis ki pou ladan. E ki sa bann lenfrastruktir ki deza la pou egziste.

Mr Speaker, devlopman proze kapital sirtou lo sa lentansite i nesesit fer bann *project appraisal* e en *feasibility assessment* ki demonstre benefis en nouveau proze e analiz kou finansyel, ekonomik. E enkorpor bann risk pou kapab determinen si en tel proze i merit ganny fer. E permet Gouvernman pran kont tou bann risk e mezir an plas avan ki i tay ek en proze.

Nou alor demann Gouvernman pou prodwir en

project appraisal lo sa nouveau lopital avan ki i kontinyen avek sa proze. Nou pe osi enplor Gouvernman pou imedyatman redwir depans ki i pe fer. Gouvernman pe angaz li lo tro bokou depans dan bann proze kapital ki pa pe fer nou pei dibyen.

Mr Speaker, bon zesyon finans piblik i dir ou ki ler ou annan bann defayans dan ou lekonomi parey nou ladan, ou bezwen kontrol ou bann depans lo bann proze kapital. Sa i espesyalman neseser vi ki nou vvar ki Gouvernman pa pe kapab kolekte reveni ki ti'n prozekte e atenn target fiskal parey le ka 2023.

Alors Mr Speaker, nou san dout e nou asire ki sa Gouvernman pa pou *attend* son target, fer en sirplis an 2024. Parske zot in demontre nou ki zot planifikasyon Bidze pa bon. An sa ki konsern nou sityasyon sosyal ki'n pli deteryore pandan sa 3 dernyen lannen.

Ozordi nou pa kapab marse lo semen san ki en zenn pa enteronp ou pou demann en pti zafer, en pti limonnad, en pti bwat manze, en pti R10, en pti keksoz. Sa i realite lavi dan nou pti pei. I tris akoz si Minis ti serye, i ti a rekonnet sa bann ka povrete dan nou sisyete.

MR SPEAKER

30 minit Onorab. 30 minit, silvouple, konklir.

HON CONRAD GABRIEL

Sa bann soufrans lafen ki pe tap en ta kategori zenn dan nou pei.

Mon le dir ou Minis ki sa bann dimoun i form parti nou nasyon malgre ki zot napa larzan dan pos pou aste manze.

Mr Speaker, avek Nwel ki pe aprose, nou pep ti espekte en souriy lo zot figir. Pour la katriyem fwa, sa pa pou leka. Sa pep in ganny let *down* espesyalman bann dimoun aze ki ankor pe esper zot 10 mil. E tou lendikasyon i montre ki zot bezwen esper sa gran dat an 2025 ler sa vre souriy i a retournen.

Koman MNA Elekte pou Pointe Larue, mon pou fer sir ki distribisyon nou larises i ganny fer byen san diskriminasyon oubyen malis. Fer sir ki sa ki merit ganny lasistans i gannyen e dan en dele letan pli kourt.

An terminan Mr Speaker, ou'n deza *remind* mon letan. Selman i difisil ek sa ta problem. Minis in donn 2erdtan, dan 30 minit i pa fasil pou nou rezourd tousala.

An terminan mon oule senserman remersye Greg Leon ki ti DA dan distrik Point Larue. Pandan sa kourt dele letan ki nou'n ganny sans

travay ansanm, ou'n demontre ki ou fran, kapab e kosto. Me malerezman, Egzekitiv pa kontan letan distrik i fer progre e sirtou kot i annan en MNA US. E osi lo sa not, mon ti a kontan remersi mon fanmir, zanmi, mon *clerk*. Mon bann Mann lo mon Komite Egzekitiv, e tou dimoun mon distrik Pointe Larue ki'n donn mwan sa sipor pandan sa 3 an.

Nou'n annan tou rezon pou selebre. Atraver ou Mr Speaker, *LGB* in dir i pe al pran tou le 26 distrik. Atansyon, lalang napa lezo and *talk is cheap*. Ki Bondye i beni zot tou e donn lafors e kouraz pou nou kontinyen sa lalit ver plis progre ek prosperite. *Fearless in dignity*. Mersi.

(APPLAUSE)

MR SPEAKER

Bon, nou a pran nou poz labitud la. E nou a regran deba 2er. Mersi.

(BREAK)

MR SPEAKER

Bonn apre midi tou dimoun. Nou a regran deba avek Onorab Terrence Mondon. Ou annan laparol.

HON TERENCE MONDON

Mersi Mr Speaker. Minis, koleg Onorab, zabitant mon distrik Takamaka e tou dimoun ki pe ekout nou bonn apre midi.

Mr Speaker, i en gran plezir pou mwan donn mon reaksyon lo Bidze 2024, prezante par Minis Hassan Vandredi le 4 Novanm. Dan son diskour, Minis i donn nou en bon apersi lo plandakson Gouvernman anliny avek zot stratezi priyorer pou lannen 2024.

Bidze 2024 i en Bidze ki pe met lanfaz lo kontinyasyon sa plan travay. En Bidze ki konsistan avek prosesis transformasyon e fer provizyon pou plizyer lenvestisman sibstansyel dan lenfrastriktir batiman ek teknolozi.

Nou dan LDS, nou konpran stratezi Gouvernman me pli enportan, nou annan tou konfidans dan travay ki pe ganny fer. Sa ki kler Mr Speaker, Seselwa i konnen ki son resours i dan bon lanmen e zot annan tou konfyans ki Bidze pei pou ganny zere avek pridans e disiplin neseser.

Wi Mr Speaker, i annan en diferans fondamental ant Bidze Gouvernman LDS e Bidze ansyen administrasyon US. Dan Bidze US ti annan plizyer milyon larzan pos pou en pti group dimoun, ki zot ti kasyet anba Bidze SPDF sa

letan. Dan sizyem Lasanble, FPAC ti dekouver zot trik. E ser koleg, les mwan dir zot pa krwar ki Seselwa in oubliy zot.

(APPLAUSE)

HON TERENCE MONDON

Par kont Bidze LDS napa larzan pos pou personn. Se sa ladiferans Mr Speaker.

Mr Speaker, permet mwan adres size petisyon ki Onorab Rocky Uranie in fer referans avek dan son lentervansyon yer, an vi ki in mansyonn mon non. Diferans Onorab, atraver ou Mr Speaker, petisyon zabitan Lentandans ti pe demann SPTC pou rewvar *schedule* bis lo sa larout. En demann avek bon lentansyon. Mon zabitan ti reganny zot servis e tou dimoun i byen satisfe.

(APPLAUSE)

HON TERENCE MONDON

Tandis ki petisyon Onorab Uranie ti pe demann pou pa fer sa lopital, en facilite ki lakominote Digwa in espere pou plizyer lannen.

Alor Mr Speaker, petisyon mon zabitan ti en demann pozitiv tandis ki petisyon Onorab Uranie ti en demann negativ.

(APPLAUSE)

HON TERENCE MONDON

2 sityasyon diferan e parey nou pe vwar dan sa deba Bidze, lo nou kote nou pozitiv e lo lot kote zot tou i negativ.

Mr Speaker, Minis in dir nou, nou bezwen diversifye nou lekonomi. Pou bokou lannen, lekonomi Sessel in plito depaan lo sekter tourizm ek lapes. Sa nivo depandans i fer ki nou pei i reste vilnerab kont sok eksteryer. Alor i neseser pou nou diversifye nou lekonomi.

Mr Speaker, Gouvernman pe travay pou form en lekonomi kot i annan lentegrasyon Sekter Tourizm, Lapes avek lezot sekter. Sa i vedir, ki nou pe kre en lanvironnman ki ava permet plis aktivite biznes dan diferan sekter lekonomi. Rezulta plis sours reveni pou nou pei e en lekonomi bokou pli rezilyan.

Mr Speaker, Minis i rekonnéti ki i annan ankor bokou travay pou fer pou transform nou lekonomi. Mon apresye vwar ki travay in deza komanse pou regard sa sityasyon *ease of doing business* dan Sesel.

Mr Speaker, Gouvernman i angaze pou retir baryer ki egziste otour bann servis, ki sekter piblik i donn Lepep Seselwa. Mon ekspekte ki atraver sa seri diskisyon e konsiltasyon ki Gouvernman pe antreprann,

nou pou kapab vwar lenplimantasyon en reform trans formativ dan tou Minister, departman e lazans piblik.

Mon ekspekte ki sa reform i ava redwir letan, kou e prosedir an relasyon avek servis ki Gouvernman i donn kominate biznes e Lepep Seselwa an zeneral.

Mr Speaker, kolaborasyon ant Gouvernman e sekter prive i primordyal. En loportinite pou revwar regilasyon kot i apropriye, neseser e ki reponn a bann bezwen modern pou fer biznes.

Minis in anons serten mezir ki Gouvernman in pran pou fer *SIB* vin sa *one-stop shop*. E in demann bann lazans konsernen pou fer sanzman neseser dan Lalwa pou fer ki Sesel i vin en landrwa kot i fasil e konvenab pou fer biznes.

Wi Mr Speaker, nou bezwen adopte meyer fason fer pou atrakte plis lenvestisman dan lekonomi. E permet en devlopman enklisiv dan nou pep. Mon agree avek Minis, ler i dir ki Labank Devlopman *DBS* bezwen reformen, pou reste relevan avek sa transformasyon ekonomik ki nou pe anvizaze pou nou pei.

Anliny avek sa 3 lobzektif ki Minis in mansyonnen, *DBS* i bezwen osi met prosedir ki

permet en dimoun konnen si i pou kalifye pou en *loan* avan ki i fer gran depans.

Mr Speaker, mon'n resevwar plizyer ka kot dimoun i vwar zot pe fer bokou depans pou pli tar aprann ki zot *loan* pa'n ganny aprouve. Alor, mon demande ki *DBS* i met an plas en mekanizm pou evalye aplikasyon avan ki en dimoun i fer okenn depans.

Minis, i osi neseser pou Minister responsab pou Later, Lenvestisman e Lanvironnman pou revwar e armoniz zot prosedir administrativ an relasyon avek bann gro proze devlopman. Prosedir i bezwen kler e transparan pou tou envestiser.

Mr Speaker, ler nou koz lo *ease of doing business*, nou bezwen fer referans avek biro anrezistreman kot tou tranzaksyon i bezwen pas atraver. Mon rekonnet ki sa biro i deza deborde avek travay e mon soulaze pou vwar ki provizyon neseser in ganny fer, pou entrodwir en novo platform pou donn servis *online*.

Plis lefikasite dan bann servis ki biro anrezistreman i ofer piblik pou anmenn en gran amelyorasyon dan *ease of doing business*.

Mr Speaker, mon dernyen pwen lo sa size i konsern nou tou koman

travayer Seselwa. I kler ki nou kiltir anver travay i pa alaoter zeneralman e nou bezwen amelyore.

Mon profite pou demann tou lorganizasyon Sesel, piblik, prive e sisyete civil pou envestir dan bann programm devlopman kapasite avek bi enkilke bann bon valer travay dan nou pep. Mon pe koz lo lonnekte, disciplin e profesyonnalism. E nou kapab zis mazinen, ki diferans sa i ava fer pou nou fitir zenerasyon.

Mr Speaker, lenvestisman dan sistem nimerik i en priyrite nou Gouvernman. E depi ki *LDS* in pran lofis an Oktob 2020, nou'n envestir plizyer santenn milyon Roupi dan lenfrastruktir teknolozi.

An 2024, Gouvernman pou kontinyen envestir dan sistem nimerik e lezot lenfrastruktir teknolozi. Nou Gouvernman i konsistan avek son stratezi transformasyon nimerik. Dan son premye diskour Bidze, Minis Hassan ti pronons direksyon stratezik ladministrasyon *LDS*, pou devlop sistem peyman nimerik dan sekter finansyel.

En stratezi pou transform biznes dan tou sekter lekonomi atraver plis lefikasite dan servis e anmenn rediksyon dan kou tranzaksyon biznes.

Mr Speaker, labi sibstans drog ek lalkol i reste sa pli gran defi nou sisyete. Minis in dir nou pou Sesel kree plis larises pour son zanfan, Sesel i bezwen kapab depan lo tou son zanfan.

Mr Speaker, mon vreman atriste pou vvar sa en logmantasyon dan lakantite zenn enkli adolesan ki pe servi drog dan mon distrik Takamaka. Sa i vedir ki nou zanfan i tro vilnerab e pe sibir bokou presyon zot bann koleg pou eksperiment avek drog ek lalkol. Sa i osi vedir ki zot *self-esteem* i vreman ba. Nou bezwen develop programm ki pou ed nou zanfan elev zot *self-esteem*.

Mr Speaker, bokou plis pou bezwen ganny fer avek partisipasyon lezot akter dan sisyete. Nou bezwen kontinyen edik nou lazene atraver programm prevansyon. Nou bezwen kontinyen mobiliz resours avek plis partisipasyon kominate. Bidze 2024 i reflekte komitman nou Gouvernman pou entansifye lalit kont drog, akoz lenpak sa bann sibstans i destriktif pou nou tou, pou sa lendividu, son fanmir, lakominote e sisyete an zeneral.

Provizyon dan Bidze in ganny fer pou siport plis programm sosyal. I enportan ki nou zenn i ganny gidans neseser e annan plis posibilite

pou angaz zot dan bann aktivite ki pou ed zot organiz zot lavi e fer zot lavi annan plis sans e valer.

Nou bezwen osi rewvar sa bann programm prevansyon e develop nouveau model kot i neseser. Nou bezwen evalye lenplimantasyon bann programm e vvar kote nou bezwen ranforsi. Bidze i met lanfaz lo devlopman e partisipasyon lazenes dan spor. Sa ti neseser.

Alor mon pa ekspekte okenn leskiz sorti NSC, pa kapab aranz lalimyer lo laplenn foutbol Takamaka, pou ki nou zenn i kapab *practice zot sport*. Lo sa not, mon demann nouveau CEO NSC pou met en lord dan sa lorganizasyon. Koman en zenn dinamik ou annan sa kapasite pou fer en diferans pozitiv pou spor dan Sesel e nou pe kont lo ou.

(APPLAUSE)

HON TERENCE MONDON

Mon demann lazenes Seselwa pou anpes zot tonm dan bann lenfliyans ki kapab detri zot zenes. *LDS* pou kontinyen lager pou protez zot kont sa fleo akoz nou bezwen zot pou fer marse sa pei ler nou ki la ozordi pou bezwen ale.

Ser, frer, annou met lanmen ansanm pou ed bann dimoun ki pe soufer avek

adiksyon drog ek lalkol. Mon demann tou parti prenon pou fer tou sa ki zot kapab pou adres sa problem. Annou kontribye pou anpese e redwir domaz koze par lalkol e labi sibstans afen ki nou kapab viv pli byen e an bonn sante.

Mon lans en lapel avek tou zabitant Takamaka pou reoran nou kominate avek sa bann trafikan. Annou debout pou protez nou zanfan.

Mr Speaker, travay pou bouz ver lenerzi renouvlab in pran en nouveau lelan dan sa 2 dernyen lannen. E pep Seselwa i ankouraze avek zefor ki pe ganny fer par Gouvernman e bann partner kle dan sa lendistri, pou realiz sa target 15poursan lenerzi renouvlab disi 2030.

Byensir avek sipor *LDS* dan sa Lasanble, nou'n ede retir serten baryer ki ti egziste o nivo lenstitisyon e osi avek regilasyon. Byento, pep Seselwa pou ganny plis opsyon pou servi lenerzi renouvlab.

Mr Speaker, mon oule lans en lapel avek etidyan *SIT*, pou profite devlop zot kapasite teknik pou zot kapab retir *maximum* benefis avek sa nouveau lendistri lenerzi renouvlab. Sa i en loportinite devlopman pou zot bann zenn.

Mr Speaker, mon rekonnnet ki bokou pe ganny fer pou ranforsi sekter

finansyel nou pei. Nou rezerv deviz i ozordi ekivalan 3.7 mwan lenportasyon. E avek en to lenflasyon byen kontrole, e sa in ariv atraver lenthervansyon monneter egzize par Labank Santral.

Pli boner sa lannen, Minis Hassan ti donn nou son langazman pou develop en kad legal pou *crypto currency*, ler ti pe reponn mon kestyon lo sa size. Minis in gard son parol e byento nou pou annan en lankadreman legal pou *virtual assets* e *virtual service providers* ki osi kouver *crypto currency*.

Nou Gouvernman i serye dan son langazman pou fer Sesel vin azour avek son bann obligasyon e komitman enternasyonal.

Mr Speaker, Seselwa i reste vulnerab kont bann *scam* e frod finansyel. Sa bann risk i reel. Menm bann dimoun avek konesans finansyel i tonm dan latrap bann *scammers*. Mon santi ki nou popilasyon e lazernes an partikilye, bezwen ganny pli ekspose avek developman dan sekter finansyel. Lemonn pe antre dan en revolisyon nimerik e mon kontan pou vvar ki bokou travay pe ganny fer pou ranforsi lenfrastriktir teknolozi finansyel nou pei, nou lanvironnman.

Mr Speaker, i annan en nouveau panse parmi bann

ekonomis ki pe dir ki model ekonomik ki lemonn pe servi pe kontribye pou destriksyon nou plannet. Akoz sa model i regard profi, larises materyel, lagrandisman lekonomi avan tou keksoz.

Mr Speaker, parey ou konnen *GDP* i sa endikater prensipal ler nou mezir sikse lekonomi en pei. Me kestyon ki bokou syantis e eksper ekonomis pe demande. Eski sa formil *GDP* i sifilan pou mezir byennet en nasyon? Pou nou Sesel, nou lanvironnman naturel i nou pli gran *asset*. Me i pa ganny reflekte dan nou formil pou mezir larises e byennet nou nasyon.

New Zealand par egzanp, in develop en model ki pran kont kontribusyon lanvironnman dan lekonomi e osi lenpak aktivite ekonomik lo lanvironnman. Minis in dir nou ki Gouvernman pe al entrodwir en nouveau sistem *tagging and tracking* pou bann depans relye avek sanzman klima.

Wi Mr Speaker, i neseser pou nou mezir kou ekonomik e fiskal sanzman klima lo nou pei. I enportan konnen konbyen Gouvernman pe investir dan sa program adaptasyon e mitigasyon sanzman klima. Sa metod pou anmenn plis latransparans e rankont dan finansman proze relye avek sanzman klima.

Mon swete ki sa i ava anmenn en novo leta lespri dan nou sisyete ki pli rekonesan anver lanatir. En leta lespri ki fer nou konpran nesesite pou protez e prezerv labote naturel nou pei, ki fer nou osi apresye son karakter frazil e vilnerab.

Mon salye tou bann dimoun ki pe fer travay ekstraordiner pou protez nou lanvironnman. E sirtou pou edik nou zanfan lo lenportans lanatir dan nou lavi toulezour. In ler pou nou mezir byennet en nasyon an relasyon avek leta sa lanvironnman kot i pe viv. Sa delo ki nou bwar. Ler ki nou respire, sa lanmer e later kot nou ganny nou nouritir. Ler mon pran kont tou sa bann keksoz, mon kapab dir avek senserite ki nou en pep ki ris e nou bezwen fer tou pou protez sours nou larises.

Mon distrik Takamaka. Mr Speaker, Takamaka pa'n akonpli bokou pandan lannen 2023 eksepte bann proze anba SLTA. Proze semen in retardé avek difikilte pou ganny *wayleave* neseser. Malgre bann difikilte, plan pou 3 semen in deza konplete.

E mon ekspekte ki nou bann proze i ava demare boner lannen prosenn. Sa i enkli Semen Jean-Louis Alcide, en proze ki tre pros avek mon leker anvi sityasyon difisil, ki sa bann fanmir ki pe reste dan

sa landrwa pe fer fas avek toulezour.

Dan Bougainville, nou'n fer demann avek SLTA pou zot fini sa proze elarzisman semen ziska Loter Bougainville. Mon pe ekspekte ki SLTA i ava reponn sa demann pandan lannen 2024.

Mr Speaker, mon fyer pou dir ki Takamaka i nepli dan fernwar. Sa seri lalimyer ki nou'n enstale en pe partou dan distrik i anmenn en novo souf dan kominote. Boner lannen prosenn, plis lalimyer i ava ganny enstale dan tou kwen nou distrik.

Mon oule profite pou remersye CEO SLTA avek son lekip, pou fasilit lenstalasyon sa bann lalimyer e bann *crash barriers* lo semen segonder. Topografi mon distrik i fer ki nou pou bezwen plis *crash barrier* pou fer nou bann semen segonder *safe* pou tou zabitan.

Proze lakaz. Mr Speaker, mon apresye ki sa proze lakaz lo ex-Desaubin pou demare lannen prosen. E provizyon in ganny fer dan Bidze pou en *mid-range condo*. Mon'n diskrit avek Minister konsernen pou regard posibilite fer en proze lakaz sosyal avan prenon kont kapasite finansyel sa group aplikant dan mon distrik.

Mr Speaker, sa proze lakaz i bezwen soulaz bann dimoun dan mon distrik avan

tou. Mon oule rapel sa Lasanble, ki dan alokasyon lakaz faz 1 *ex-Desaugin* ki ti ganny fer zis avan eleksyon 2020. 30poursan alokasyon ti bann dimoun sorti lezot distrik. Pandan ki plizyer aplikan merite dan mon distrik pa ti ganny konsidere.

Sa lenzistis anver bann aplikan ki ti pe pey zot lakaz pou plizyer lannen bezwen ganny korize. Minister in agree an prensip ki sa devlopman *mid-range condo* i ava ganny fer lo *ex-Desaugin*. *Ex-Mauritia*, (pardon) apre ki negosyasyon pou akse i konplete.

Semen Sid Was Mahe. Mr Speaker, faz 2 sa proze ki komans Maravi ziska *ex-Banyan Tree Resorts* i ankor dan en staz koleksyon *wayleave*, e sa prosesis pe mars tre byen. Mon oule profite pou remersye bann propriyeter ki'n fini donn permisyon. An menm tan, mon lans en lapel avek bann propriyeter ki pa ankor donn permisyon, pou zot fer li afen ki sa proze i kapab bouz dan faz lenplimantasyon san okenn dele. I en loportinite pou nou tou ganny en bon semen avek tou fasilitate neseser e fodre nou pa les sa sans pase.

Sa proze ki pou enkli trotwar, novo lalimyer, *bus stop* e *bin site* pou anmenn

konfor e *safety* pou tou dimoun. Mon vvar sa devlopman koman en loportinite inik pou reorganiz nou distrik e met li lo en pli o standar posib.

I osi loportinite pou atrakte plis viziter dan nou landrwa. Sa i vedir plis biznes pou bann letablisman touristik, *food outlet*, boutikye e lezot ankor.

Pou konkli Mr Speaker, dan sa dernyen 3 an, bokou in ganny akonplir e bokou plis pou ganny fer. LDS in vin travay e i pe travay pour tou Seselwa. Mon remersi ou Mr Speaker.

(APPLUSE)

MR SPEAKER

Laparol pou Onorab Naddy Zialor.

MR SPEAKER

Laparol pou Onorab Naddy Zialor.

HON NADDY ZIALOR

Mersi Mr Speaker. Minis, koleg Manm Lasanble. Ou ki devan ou legran, ou ki pe ekout nou atraver ou radyo. Ou ki pe swiv nou lo diferan platform medya sosyal. Ser, frer Lepep Seselwa, bonn apre midi.

Mon pran laparol apre midi, pou mwan koz lo merit

sa Bidze 2024. E dan mon deliberasyon Mr Speaker, mon pou fer tou mon posib pour mwan ilistre sa Bidze koman en sitwayen Seselwa. Koman en nasyon, koman en pep, pou nou regarde kote nou sorti, kote nou'n arrive e kote nou anvi ale. E mon pou ilistre li dan en fason pli senp posib dan en legzanp pli senp posib, Mr Speaker.

An 2020, nou ti ganny lakle sa pei, nou ti ganny lakle sa lakaz apele Sesel. E son *landlord* sete Lepep Seselwa li menm. Si nou rapel byen, si ou rapel byen nou ti antre dan en lakaz ki dezord. Kot sa ki ti'n ganny lagreman avan nou, pa ti pe mentenir sa lakaz oparavan. Zot ti krwar ki tou le 5 an zot ti pou fors kouto anba likou sa *landlord*. E fer sa *landlord* renouvele zot lagreman.

Zanmen en zour zot ti pe ekspekte ki zot lagreman ti pou *expired*, Mr Speaker. Ler nou, nou antre dan sa lakaz, tou vit ti'n grennen. Zerb ti'n arriv menm nivo avek balistrad. Gomon ti'n pouse lo miray, *tiles* ti'n dekoke, manze ti'n pouri dan *fridge*. Ni bil elektrik, ni bil delo pa ti'n peye. Plafon ti pe komans grennen. Fondasyon ki dapre zot ti'n solid pou plis ki 40 an, zot in fouy en tinel ladan e ti pe komans kabann par kote Mr Speaker.

Sa i fason pli senp ki mon kapab dekrir leta sa pei, letan ki nou ti pran li avek sa bann swadizan kler vwayan ki ti pe delivre nou pei, Mr Speaker. E la ankor enn fwa, mon anvi dir avek zot sa lakle. Sa lakle apele baro *State House*, e sa lakle apele lakaz Sesel zanmen pou retourn ankor dan zot lanmen Mr Speaker.

(APPLAUSE)

HON NADDY ZIALOR

Mr Speaker, mon'n dir mon pou sey mon mye pou mwan ilistre sa Bidze dan en fason senp. Dan mon tour lorizon koman en zenn, dan mon resers mon'n toultan ganny enspire avek bann parol ki kapab fer ou vin en sitwayen pli meyer.

E la mon mazin trannsenkyenm Prezidan Lanmerik, dan son inogirasyon i ti enspir pep Ameriken e enspir lemonn atraver en fraz. E sa fraz ti motiv nou pep, sa pep, e lemonn pou sanz nou *mindset*. I ti dir “ask not your country can do for you, asked what you can do for your country”. Pa demande ki ou pei i kapab fer pou ou, me demande ki ou kapab fer pou ou pei, Mr Speaker.

E an Oktob 2020, Prezidan Wavel, John, Charles Ramkalawan ti ganny konfye

sa lakle apele Sesel. E la sa zour i ti demann avek tou Seselwa, tou zanfan Sesel pou nou zwenn ansanm pou re batir nou pei. Pou sa bann ki ti kontan Sesel Mr Speaker, nou ti met nou lanmen ansanm, nou ti met nou lespri ansanm, nou ti met nou leker ansanm pou nou re batir nou pei.

Minis, Mr Speaker, ozordi i fer katriyenn Bidze ki mon adrese koman en Seselwa, koman en Manm Parlman. Nou'n met lanmen ansanm, nou'n travay ansanm, nou'n konstri ansanm akoz nou kontan nou pei. Nou'n netway nou lakaz, nou'n koup zerb, nou'n repar fondasyon sa lakaz.

Bann zom e fanm Sesel in met lanmen ansanm, zot in repenn sa lakaz anndan koman deor. Nou'n repar twatir ki ti koule. Nou'n tir bann vye sez ek bann vye latab ki'n kase. Sakenn nou, nou'n kontribye pou met en nouvo sez ek en nouvo latab dan sa lakaz. Nou'n travay ammas nou pti larzan met de kote e desann kot *PUC*, nou'n re pey koneksyon delo ek elektrik dan sa lakaz.

Se sa ki fer nou, se sa ki fer li enportan, e fer nou realize ki nou pe travay san ses pou nou kontinyen mentenir nou pei, Mr Speaker.

Se pandan i annan en pti group ki depi ler zot in ganny *eviction notice*, zot in katern dan lapay e rod tou fason pou tir nou. Menm si nou kontra i pou 5 an. Me zot krwar poudir ki nou kontra pa pou ganny renouvre. 2025 lepep pou renouvre kontra *LDS*, Mr Speaker.

(APPLAUSE)

MR SPEAKER

Pa blye ki zot ti donn nou, en iltimatomm 6 mwan. Zis apre *eleksyon* zot ti dir nou pou ale. 2023 nou ankor la, 2024 nou ankor la, 2025 nou pou la.

(APPLAUSE)

HON NADDY ZIALOR

Serten ti esey met bonm. En letan zot ti pe esey mansipe pou fer bann solda revolte kont Leta, an krwayan solda i vvar avek zot zorey parey lepase. Sa ki ti sey enstig bann travayer Seselwa pou desann lo semen pou fer revolt. Finalman ti desann zis 9 zot, Mr Speaker.

Letan ou dir zot laverite, zot sitan ofanse, zot oule swa gress ou ledan oubyen bat ou Mr Speaker. La resaman, dan en lesey dezespwar serten in al rod pouvwar fernwar pou fer sa gro nyaz nwar return ankor Mr Speaker. Tousala, zot in fel! Letan pouvwar

fernwar pe rap zot dibwa, mazorite Seselwa i lo zot zenou pe priy pou Sesel Mr Speaker.

(APPLAUSE)

HON NADDY ZIALOR

Letan lapay i sorti kot pa nonmen, i ganny brile Mr Speaker. Mazorite Seselwa pe bril zot labouzi pou demann lalimyer pou Sesel, Mr Speaker. Alors silvouple, les le mor parmi le mor.

Mr Speaker, 2020, 2021, 2021, 2022, 2023 e byento 2024. Nou'n travay e nou pou kontinyen travay pou Sesel.

Wi Minis, 4 an Bidze nou'n netwaye, nou'n aranze. Wi nou'n pirze. Wi, nou'n bennyen. Wi, i nepli annan pis Onorab Vidot atraver ou Mr Speaker.

(APPLAUSE)

HON NADDY ZIALOR

E depi yer zot pe rode, zot pe fouye, zot pe lave, zot in menm re zwe bann vye rikord e zot pou kontinyen zwe sa bann rikord, Mr Speaker.

Nou, nou pa pou fer Bidze fini midi pou nou al pet petar Moris. Me par kont si parey zot dir napa naryen dan sa Bidze, alors fer parey zot labitud kit zot lanmen ater, pa vote e *walk out* Mr Speaker.

(APPLAUSE)

HON NADDY ZIALOR

Nou, nou an mazorite. Nou pou vote pou sa Bidze, merit sa *Bill* pou pase Mr Speaker.

Alors, mon pou demann avek Lepep Seselwa ekout byen, ekout byen lekel ki realis. Ekout byen lekel ki annan vreman, vreman zot lentere a ker ouswa zot annan lentere pou retourn o pouvwar, Mr Speaker.

Mr Speaker, ler tou ou bann Manm, tou ou bann fonksyon imen i fonksyonnen 100 poursan. Me si ou, ou deside pou swazir pou ou get avek ou zorey e tann ek ou lizye. Menm si tou lendikasyon i pozitiv, zot pou kit ou dan fernwar Mr Speaker. Lopozisyon i senpleman anvi Sesel i retourn dan fernwar.

I annan keksoz pozitiv dan sa Bidze. Me Lopozisyon depi 2020, sak fwa nou'n met en Bidze devan Lepep Seselwa. Sa enn 2020, Lopozisyon pa ti vvar naryen. 2021 dapre zot ti pou en Bidze ki ti pou met Sesel dan presipis. 2022, pa ti bon menm pou zot. Selman nou'n vvar *Library* Nasional, nou'n vvar Por Praslin, nou'n vvar *Air Seychelles* ki'n rekipere. Toudmenm, pa ti bon menm pou zot.

La 2023, ler ti prezante ziska aprezan pou Lopozisyon napa naryen ki bon. Pou zot

Seselwa pa'n benefisyen, selman in annan logmantasyon. In annan trezyenm mwan saler.

Pou sa enn 2024, degre ou a krwar sa Bidze i tro bon, zot pe menm demann en *early election* Mr Speaker. Kisisa? Dir nou, lafous pe mir e preznan pou zot ou a krwar 2025 pe tro tarde?

Mon a dir zot en keksoz, sa lafous letan pou mir se Lepep Seselwa ki pou asiz anba sa pye, pa zot Mr Speaker.

(APPLAUSE)

HON NADDY ZIALOR

Zot pa kontan ler larises pei i ganny partaze dan en fason ki ekitab, e soutenab.

Yer zot ti dir avek nou, zot, zot pou donnen, zot in donnen e zot pou kontinyen donnen. Me selman zot dir napa naryen. Mon a dir zot ki mwan mon'n vvar, kot tou Seselwa i annan par dan sa Bidze Mr Speaker.

Premyerman, nou'n konstri. Nou annan en plan depi 2020 ziska ozordi. Nou'n partaz larises ler in annan mwayen e ou firanmezir.

Menm si Lopozisyon i anvi zwe lo ou moral, e fer krwar ki nou kapab donn tou keksoz en sel kou parey zot, zot ti fer pou zot reste o pouvwar. Yer, nou'n donn

logmantasyon saler, nou'n donn lapey trezyenm mwan. Nou'n donn sipor nou bann dimoun aze, bann dimoun dezabilite an azoute R500 lo zot benefis.

Nou bann etidyan in ganny goute, menm si ozordi zot ki pe reklanmen. Zot in ganny manze lekol, menm si i annan ki pe fer propagann lafengal. Enn ler ou a krwar sel lafen gal, se zot lafen pou zot retourn o pouvwar 2025.

(APPLAUSE)

HON NADDY ZIALOR

Dan baro *State House, no way!*
Dan baro *State House, never*
Mr Speaker!

2024, pou ou sa etidyan ki dan P4 e P5 ou pou ganny enkli dan *student laptop scheme*. Ou sa paran ki pe anmenn ou zanfan dan Lekol Gouvernman, apart ki kontinyen ganny en goute lanfaz pou ganny mete lo renovasyon bann lekol. Zis parey mon'n koz lo sa lakaz lo komansman. Deliberasyon ou zanfan, mon zanfan, nou zanfan i ava dan latmosfer pli ideal an 2024, Mr Speaker.

Ou sa zenn ki'n vin e ki anvi vvar en metod teknolozi adaptativ pou ki son biznes i agrandi, sirtou ou ki annan lentere dan lagrikiltir. Nou Gouvernman i anvi kre lespas pou ki sa nivo, e sa nouveau

adaptasyon teknolozi lagrikiltir i ganny mete an aplikasyon Mr Speaker.

Mr Speaker, ler mon antann reprezantan Zil Pros pe koz lo lopital La Digue *a haute voix*, en fwa zot in deza dir mwan mon engras. Me enn ler sanmenm sa ki mon apel engras, Mr Speaker. Ou fer petisyon, pou demande pou pa fer lopital. Apre ou menm ou kriye a *haute voix* ki ou oule en pli gro karo dan lopital. Me ki mannyer i apel sa, Mr Speaker.

Ou annan menm ladas pou ou konpar sa lopital avek en klinik. Nou, nou senpleman en Gouvernman ki annan vizyon. Zot rod tou sa ki napa, zot rod tou sa lipou zis pou zot tir negativite. Zot in menm vwar ki napa oubyen ki non Lopital La Digue pa pou ganny mete lo lopital. Enn ler ou a krwar i paret mwan bann non Sen pa kapab sorti dan zot labous.

Sa lopital i apel *St Mary's Hospital*, i la e i pou reste Mr Speaker. Mon lans en lapel avek zabitant Digwa e Zil Pros. Mon demann zot e mon dir avek zot debout fyier, zot promes lopital in ganny delivre. Zot pe al ganny zot en en nouveau terminal. Zot lekol pe al ganny rekonstri. E la lo non nou Gouvernman, mon envit ou sa Digwa. Mon envit zot pou donn en koudmen pou

batir zot pti zil. 2025, zet sa ki pe met zot retar anba, Mr Speaker.

(APPLAUSE)

HON NADDY ZIALOR

Permet mwan koz lo lazans proteksyon sosyal. Sa lazans in touzour seval batay pou SPPF. In sa frontyer ki Parti Lepep in kal lo la pou plizyer lannen, pou zot ganny eleksyon. E sa i en et, i kler ki Lopozisyon mon'n deza dir e ozordi mon pou repete. I kler ki Lopozisyon i anvi ou reste vilnerab.

Yer en Manm lo lot kote letab, in konfirmen. I ti dir 'oli problem si nou anvi donnen, donnen e donnen'. Menm nanm zot ti donnen Mr Speaker. Minis, lazans proteksyon sosyal ti enn sa lasanm dan sa lakaz ki ti an dezord. Ti en dezord total. Nou'n netwaye. Sa lasanm nou'n netway li e Lopozisyon i kontinyen zwe lo moral sa group dimoun ki pli vilnerab dan nou sorye.

Sepandan, nou konsyan ki i reste bokou travay pou fer. E la mon siport propozisyon Onorab Georges, ki nou bezwen annan en fason pli proaktiv pou rezourd sityasyon nou bann sitwayen ki pli feb. Me fodre zanmen, e zanmen sa latitud labi i retournen Mr Speaker.

Dan sa Bidze, mon redir parske tou bann Manm ki'n koze lot kote latab in repet sa. Zot in dir ki napa naryen, napa naryen dan Bidze.

Mwan, mon vwar plis ki 2000 mil dimoun ki pe viv ek dezabilite, zot pansyon e zot benefis i garanti 2024. Ler Lopozisyon pe dir avek nou ki napa naryen, mwan mon vwar ki nou bann dimoun aze zot sekirite sosyal i garanti dan sa Bidze 2024. Enkli sa R500 ki pou reste lo zot pansyon.

Pa blyie la i annan en nouveau labwet pouri ki zot pe anvoye. Zot pe dir avek ou 2025, zot ki pou donn ou R10 mil. Silvouple, pa bezwen manze sa labwet, pa manze.

Zot menm zot ki ti dir, ki pa pou soutenab Mr Speaker. Pandan ki Lopozisyon i kontinyelman dir ki zot pou donne, donne e donne, *LDS* pe fer keksoz lo baz merit. Ler ki Lopozisyon pe dir ki napa naryen.

Les mon a dir zot enn de keksoz, ki zot pe refize koz lo la e refize eksplik dimoun koman bann dirizan responsab. Maternite, paternite pou sorti R2 mil 480 pou vin R6,633.50, sa i apartir 2024. Dan sa Bidze ki *LDS* pe al vote Mr Speaker.

Semi orfelen aprezan, zot benefis pou vin R2,350 olye R1300, sa i dan sa Bidze ki

Lopozisyon in dir napa naryen Mr Speaker.

Orfelen oubyen bann zanfan abandonnen pou sorti R1500 pou mont R3,134. Sa i dan sa Bidze 2024 ki Lopozisyon pe dir avek ou napa naryen Mr Speaker.

Foster child pe monte pou vin R3,134 olye R1300. Sa i dan sa Bidze 2024 ki Lopozisyon pe dir avek ou napa naryen Mr Speaker.

I annan ankor lezot benefis. Me mon ava les mon bann koleg ki pou pran parol apre mwan koz lo la Mr Speaker. Permet mwan koz en pti kou lo lozman, lakaz e later.

Ozordi lakaz pe ganny donneen baze lo kriter e merit. Si nou fer konparezon dan lepase, fodre ou ti en aktivis pou ou vin en propriyeter e priyorite lo lalis lakaz. E la tyermenn brans ti donn en update avek komite santral pou gete lekel ou manman, lekel ou papa. Ki zot siporte, si zot ti al *rally*. E la apre ki desizyon ti ganny pran si ou pou ganny en lakaz oubyen non.

Land bank osi parey. Si ou ti en kandida, ou ti vin priyorite deswit pou ou ganny en later *land bank*. E si ou ti fidel, fidel anver parti menm si ou ti dan lakaz, apart ki dan lakaz ou ti osi ganny en bout *land bank* e ou ti pas devan

tou lezot dimoun, Mr Speaker. Sa pou donn ou sa privilez pou ou kontinyen *spy* lo lezot ou bann frer.

Pep Seselwa, ozordi kriter i kler, i an nwar e blan. Ou bezwen kontribye pou ou ganny en lakaz. Ou bezwen proaktiv e baze lo merit. Ankor enn fwa letan Lopozisyon pe dir ki napa naryen dan sa Bidze, Gouvernman *LDS* pe fer bann proze lakaz swivan, e Minis ou'n nonmen; Perseverance, Bel Ombre, Au Cap, Mont Fleuri, proze Anse Royale. E i menm annan bann lezot proze ki dan lepase si ti en distrik ki Lopozisyon ti pou'n gannyen, zot ti pou'n ganny pini.

Ozordi proze Anse Royale pe ganny fer. Proze Baie Ste Anne pe ganny fer, proze La Digue pe ganny fer. Roche Caiman i annan renovasyon ki pe ganny fer lo bann *sport Complex*. Pointe Larue i annan bann nouvo *lane* semen ki pe ganny fer Mr Speaker. Oule dir mwan napa naryen menm dan sa Bidze? *Arr...*

Mr Speaker, mon pa pou kapab termin mon kontribisyon lo merit sa *Bill* san ki mon fer en mansyon en group ki pros kot mon leker. E ozordi mon anvi koz dan en fason *être* fran. Depi ki mon'n antre da sa Lasanble, i annan plizyer mannev ki'n ganny fer e pou kontinyen ganny fer pou

derout mon larout e kre konfizyon vizavi sa group dimoun.

Akoz senpleman, zot in ganny servi dan diferan fason dan lepase. Ozordi mon pou repran sa loportinite pou mwan pas en mesaz pou Sesel, e pou tou mon bann frer ek ser. Mr Speaker, annan en dezabilite i en stil lavi, kot lemonn otour nou i bezwen adapte avek nou sityasyon.

Annefe, anba sa ladministrasyon bokou lanfaz pe ganny mete lo enklisivite. Ozordi bann ki annan mobilite, pe ganny *awareness* lo difikilte ki en dimoun ki dan en *wheelchair* i fer fas avek dan zot lavi toulezour. Sa pou ed nou dan nou bann plan, sa pou ed Sesel Mr Speaker. Se pou sa rezon ki toulstan mon dir, *be the change and make the change*, Mr Speaker.

Nou bezwen fer sir ki lezot dezabilite i ganny enklisivite dan *sport*. Malgre tou defi, nou group dimoun i kontinyelman fer Sesel fyier. E la a sa staz, mon anvi enform Minis ki letan i ariv lo Staz Komite mon pou annan detrwa kestyon an sa ki konsern sa size. An plis ki sa, i annan plis ki 2 an depi ki Sant Vokasyonnel i anba renovasyon.

Lopozisyon in fer sa size, in sezi tou loportinite pou fer politik lo sa size e senm

konfizyon. An 2024, i avek en gran lazwa ki nou'n ganny enformen, ki'n ganny konfirmen, ki sa sant pou reouver Mr Speaker. E pou annan en novo striktir ki pou ankadre sa group dimoun. Alors mon demande ki nou servi li byen, e servi li tre byen Mr Speaker.

Mon ankouraze, pou vwar ki i annan serten laspe akomodasyon enkliziv ki'n bouz anba *Vulnerable Home Repairs*. Tel koman met bann *ramps* kot lakour, *rails*, *extension*. E la mon mazin bann dimoun parey Kenny, Venida, Michael. Sa prosedir i ava en pti pe pli fasil pou zot e fer zot viv en lavi pli agreab kot lakour.

Se pandan Mr Speaker, anba *Disability Trust Fund* fodre ki mon fer resorti ki bann *adaptative aids* i reste en keksoz ki lo *high demand*, i kout bokou. Avek selman R400 mil, Departman Lafanmir pe fer tou pou zwenn bezwen e spesifisite sa bann dimoun. Se pour sa rezon ki mon pe demann avek Lasanble pou zwenn avek mwan pou fer en demann avek Minister Finans pour ki sa sonm apartir 2025 i ogmante sorti R400 mil pou vin R1 milyon.

Sa i ava ede, i ava ed plis sa group dimoun zwenn zot demann e an vi kou ki pe vin

avek sa bann lekipman Mr Speaker. *Nothing about us without us*. Nou bezwen bouz ver en lavi endepandan, enkliziv isi Sesel Mr Speaker.

An konklyzon, sa Bidze sakenn nou lo sa kote latab pou ilistre kote ki sak Seselwa i annan par ladan. Pa les zot ganny deroute. Lekspektasyon i o, me nou bezwen reste realis. Ankor enn fwa demande ki ou kapab fer pou ou pei e non pa ki ou pei i kapab fer pou ou, Mr Speaker. Sa i ava ed nou vin en pep pli rezilyan.

Dan mon parkour dan Sanmdi, mon'n pas Port Glaud, Grand Anse, Pointe Larue, Roche Caiman, Anse Royale e resaman mon ti Praslin. Sa pep dan son gran mazorite i apresye travay ki sa Gouvernman pe fer Mr Speaker.

E la mon mazin parol mon frer, enn mon frer ki gid nou, nou tim isi dan sa Lasanble. Onorab Sandy Arissol si ou permet mwan, ti pas en mesaz avek Lepep Seselwa, e ozordi mon ti a kontan repas sa mesaz avek nou pep. bann ki annan zot leker pou Sesel. Ou ki ti la an 2020, mersi. Mersi pou ki ou pa'n vann ou nanm avek en group ki zot annan en lespri fernwar Mr Speaker. Mersi ou pa'n vann ou nanm pou en fey tol ouswa pou R2 mil ouswa

pou en lavarang, ouswa pou en boutey *whisky*. Me ou'n stand strong pou en meyer Sesel.

Mwan malgre tou, mon reste for. Mon reste rezilyan, mon reste determinen pou mwan kontinyen travay pou mon pei. Mon reste en aktivis LDS. Wi Mr Speaker, wi Minis, wi Lepep Seselwa nou pa pou zanmen les tonbe! Mersi.

(APPLAUSE)

MR SPEAKER

Laparol i aprezan pou Onorab Sylvanne Lemiel.

HON SYLVANNE LEMIEL

Mersi Mr Speaker. Bonn apre midi Mr Speaker. Bonn apre midi tou mon bann koleg Manm Onorab e tou dimoun ki a lekout. Espesyalman zabitan Anse Royale.

Mr Speaker, avan mon pran mon diskour mon ti a kontan dir, mwan mon'n konn Onorab Zialor pou en kantite letan. Onorab Zialor ti dan menm parti ki mon'n ladan li, atraver ou Mr Speaker. Onorab Zialor in byen pase dan sa parti li. Onorab Zialor ti menm kot Prezidan Rene ou a krwar ti kot li.

Atraver ou Mr Speaker, mon'n voyaz avek Onorab Zialor mwan. Les mwan koze, zot a koze apre! Mr Speaker, mwan mon poudir ozordi i

vreman fer lapenn. Vre zomn dan lopilans i bliy son nesans, Mr Speaker.

(APPLAUSE)

HON SYLVANNE LEMIEL

E mwan mon pou dir wi, mon vwar Onorab Zialor i engral Mr Speaker. Mersi.

(APPLAUSE)

HON SYLVANNE LEMIEL

Mr Speaker, in ariv sa moman dan lannen kot Seselwa in ganny sans ekoute ki Gouvernman pe anmennen pou zot atraver Bidze Nasyonal pei. I sa moman osi kot i annan bokou leksitasyon e osi refleksyon lo kwa ki sa lannen 2024 pou anmennen pou sakenn de nou atraver sa Bidze ki Minis in vin prezante lo lapar son Gouvernman.

Le 3 Novanm 2023, nou'n ganny sans tann Minis fer lanons lo Bidze ki'n dir pres 2erdtan. Me pou la mazorite pep Seselwa in en dezapwentman total ki'n kit zot dan plis lensertitud.

Mr Speaker, in enn ou demann ki larepons bann Manm i konsantre lo konserne defi ki reste devan pep Seselwa o sant nou ladres. Mr Speaker ou bezwen konpran, pli gran defi pou la mazorite pep Seselwa ki pe sibir e viv dan difikilte ozordi se akoz

lafason ki sa Gouvernman e son ladministrasyon pe diriz sa pei.

Mr Speaker, Minis in koz lo lekonomi global ki paret enserten ozordi. In osi koz lo diferan eleman eksteryer ki enpakte lo nou lekonomi tel ki konfli militer ant bann pei e *COVID* parmi.

Mr Speaker, annou mazinen ki mannyer sa menm group dimoun ki ozordi i form sa Gouvernman ti ridikiliz Prezidan Faure letan i ti dir ki *COVID* in fer bokou lenpak negativ lo nou lekonomi.

Malgre tousala Mr Speaker, ozordi plis ki zanmen sa Gouvernman e lepep antye i devret vin proaktiv e pare pou navig bann defi ki prezant devan nou. Priyrite en Gouvernman, se ki i devret pe met byennet son pep par lao tou atraver son bann Polisi e osi stratezi ki i adopte.

Sa size lenflasyon ki'n ganny adrese dan Bidze i enn ki bokou Seselwa i konsernen avek. Kou lavi pe afekte tou Seselwa e pli spesifikman sa ki pe ganny en saler pli ba dan pei. Mr Speaker, tro bokou Seselwa pe soufer dan sa pei Sesel. Menm si bokou zot pa oule tann parle lo sa size. Me zot tou zot konnen ki sa i en realite ki nou pe viv avek.

Lavi dan Sesel in vin pli kritik ki zanmen in deza ete. E ozordi menm si i annan

dimoun ki pe fer 2 travay, i pa fasil pou li fer 2 bout zwenn. Sitwayen pe kontinyelman plenny logmantasyon pri manze, delo, elektriske, lwave, bis, lenz. Me la mon le dir Mr Speaker, gran mersi zot pa met palto.

Seselwa pe enplor Gouvernman pou re get ankor dan zot saler espesyalman bann ki pe ganny saler ki pli ba. Re get saler minimonm, e fer li vin pli azour avek realite kou lavi e depans ozordi.

Gouvernman *LDS* ti dir zot pe vin met larzan dan pos Seselwa. Par kont Seselwa i vwar ki sa Gouvernman pe plito ranpli zot pos. E sa pep i santi ki sa promes pa ankor ganny akonpli. Alors, mon pou demann Gouvernman *LDS* avan zot manda i fini 2025 pou akonplir zot promes ki zot ti fer ek sa pep an 2020.

Mon demande ki Gouvernman *LDS* i seryezman re get sa propozisyon ki sa komite ki pe travay lo saler *constitutional appointees* e reviz sa kantite larzan ki'n ganny propoze pou donn Prezidan, Vis Prezidan, bann Minis e lezot ankor.

(APPLAUSE)

HON SYLVANNE LEMIEL

Mr Speaker, e la ankor en kestyon ki mon'n toultan pe demann mon lekor. Si sa saler

ki zot pe gannyen aktyelman pa ase pou zot? Eski Gouvernman in seryezman reflesir lo sityasyon bann ki pe ganny mwens ki R10 mil? Eski sa pa en pwen ki Minis ti devret pe adrese dan sa Bidze?

Olye propoz bann grosaler pou zot, mon rekomannde ki Gouvernman i revwar ankor saler minimonm ki bann travayer pe gannyen. E osi revwar sekirite sosyal bann pansyoner pou fer li ariv sa R10 mil.

(APPLAUSE)

HON SYLVANNE LEMIEL

Wi Mr Speaker, sa R10 mil parey ki zot ti promet dan zot kanpanny an 2016.

E sa Mr Speaker i pou posib, la ki Minis in fer nou konpran dan son adres, ki Sesel ozordi in ganny vwar koman en sikse ekonomik lo nivo mondyal.

Prezidan Ramkalawan ti osi ti dir Anse Royale, ki ler lekonomi i fer byen i pou toultan partaz avek pep Seselwa. Le moman in arrive prezan pou zot gard zot parol e get plis dan byennet sa pep. Met antet ki zot la pou travay pou lepep me non pa pou zot gen personnel.

Me Speaker, lasante en pep i primordial e devret pli enportan pou nenport ki Gouvernman o pouwarr. Pour

lannen 2024, Gouvernman pe donn en Bidze R1.41 bilyon pour sekter lasante ki reprezent 4.7 poursan *GDP* konpare avek 4.5 poursan *GDP* dan Bidze revize an 2023.

Mr Speaker, i byen ki plis larzan i ganny mete dan sekter lasante. Me ki nou pe vwar pe passe ozordi dan lasante? Dimoun pe kontinyelman konplent lo servis ki sa Minister i donnen, paysan ki asiz pou bokou erdtan pou esper dokter kot lopital, e osi bann klinik. Napa Spesyalis e maladi bann pasyan i grave. E menm i annan ki mor akoz zot napa swivi spesyalis, mankman latizann e osi grad latizann ki pasyan pe gannyen.

E la an se moman i annan mankman antibiotik e lezot latizann pou maladi respiratwar dan bann klinik. Lapropte lo serten *ward* dan lopital e osi klinik i en konsern. E la mon pa'n oubliy bann *staff* Lasante ki pe kontinyelman sipliy lotorite pou revwar zot *scheme*.

Mon kestyon la i, eski Gouvernman, eski sa logmantasyon sa dan Bidze pou rezourd tou sa bann problem ki mon'n fer resorti? Ankor mon rekomande, ki Minister Lasante i reget dan tou sa bann problem ki mon'n mansyonnen atraver Bidze, pou ki zot pou gannyen

an 2024. E asire ki zot donn sa pep en meyer servis e osi tretman.

Mon'n fer plizyer demann pou ki Anse Royale i ganny en *outpatient clinic*, la kot sa vye lopital i ete. An 2022, mon ti ganny dir ki Anse Royale pou gannyen sa *outpatient clinic*. E zot in azout en lot keksoz avek. Zot ti dir ki zot pou fer li vin en *outpatient* e *emergency center* ki pou deservi rezyon. Mon'n ganny dir plan in fer e zot annan finansman, sa letan ti annan finansman.

Me mon pa vwar naryen dan Bidze pou sa proze. Petet sa pei zanmi pa ankor donnen. Antretan, zabitan i ankor pe servi lopital koman en *outpatient* klinik. Kan an realite sa lopital ti devret pe ganny servi pou ladmisyon pasyan lo son bann *ward*.

Lanbilans i toultan an demann kot bann sant lasante mazer parey Anse Royale. Mon oule rekomande, ki atraver Bidze 2024 Anse Royale i ganny ankor en lanbilans pou amelyor servis ki zabitan i demande.

Mr Speaker, ledikasyon i devret priyорите nimero enn nenport Gouvernman. Nou zanfan i devret komans avek en bon baz. E sa i ed zot anmezir ki zot grandi. Pour lannen 2024, en alokasyon Bidze R1.40 bilyon pe met a dispozisyon Minister

Ledikasyon. Sa i reprezant 4.6 poursan *GDP*. En alokasyon R 598.6 milyon pe ganny propoze dan Bidze reminerasyon e saler dan Ledikasyon, ki reprezant 42.8 poursan depans anba sa sekter.

Mon rekomande ki sa Minister i asire ki rekritman i ganny fer a ler. E ki tou bann laklas i annan ansennyen konpetan pou enstri nou bann zanfan. En sonm R21.4 milyon pe osi ganny bidzete pour *stipend*, ki bann etidyan sant profesyonnel pou resevwar. Sa i en logmantasyon R600 lo sa ki zot ti pe gannyen oparavan.

Mon ti pe ekspekte ki sa Gouvernman ki'n toultan deklar zot lekor koman en Gouvernman zis e ferm, ti pou fer lazistis pou tou bann etidyan post segonder egalman. Me la ankor Mr speaker, i en lot gran dezapwentman pou sa bann etidyan ki'n ganny met a kote.

Alors, mon ensiste ki Gouvernman i revwar e reviz sa *allowance* ki tou etidyan post segonder pe gannyen, pou ki sa a kapab soulaz zot depans. E osi anmenn en soulazman lo zot paran.

Gouvernman i propoze ki R4.5 milyon. Pou kontinyasyon lakres Anse Royale apre ki 3 an in ganny met lo *standby*. Parey mon ti

ganny lasirans isi dan sa Lasanble avek CEO SIA, mon espere ki par lafen dezyenm term 2024 sa proze i a'n ganny konplete, e zanfan Anse Royale a kapab komans servi sa fasilité etann donnen ki kot zot ete zot kwense e mank konfor.

Apre tou parey Minis in dir dan son adres, en popilasyon edike, an bonn sante, rezilyan, travayan, for e responsab i depan lo en bon preparasyon nou bann zanfan ki fitir nou pep. Alors, la mon oule enplor bann ki konsernen pou fer sa proze vin en realite an 2024.

Later e lakaz pou reste touzour en gran demann parmi nou pep. Gouvernman presedan in fer bokou an sa ki konsern alokasyon later e lakaz isi Sesel, e bokou fanmir in ganny asiste. Mr Speaker, lannen pase larzan in ganny mete pou konstriksyon lakaz dan plizyer distrik. Me mazorite sa bann proze pa ankor materyalize, la nou pe ariv lafen lannen 2023.

Sa lannen menm, R11 milyon ti ganny bidzete pou fer bann lenfrastruktir neseser dan Bamboo Anse Royale kot aepre 60 dimoun ti pou kapab benefisyé avek en kare later. Sa proze li menm pa'n ganny fer. E la nou vwar ki ankor R15 milyon pe ankor ganny bidzete pou menm

proze. Mon espere ki sa fwa si, sa proze Dan Bamboo Anse Royale i komanse e konplete pandan lannen 2024.

Mr Speaker, Gouvernman presedan ti annan en *scheme* kot i ti aranz lakaz bann dimoun aze e osi bann dimoun ki pa ti kapab pran en *loan*. Bokou dimoun ti benefisyé anba sa *scheme*. An 2021 sa *scheme* ti ganny aboli par Gouvernman *LDS*.

La, lavey eleksyon Gouvernman *LDS* in vwar ki sa *scheme* i enn ki ti bon e in deside pou re- entrodwir li. Savedir sa ki US ti'n komanse ti bon e Gouvernman *LDS* in pran. Me diferans avek sa se, pou en dimoun kapab ganny sa lasistans, i bezwen pas dan bokou prosedir. Tir en pe birokrasi dan sa bann prosedir.

Mr Speaker, spor i inifye e anmenn dimoun ansanm. I enportan ki nenport Gouvernman ki o pouvwar i investir dan sports e osi *sportsmen*. I enportan pou investir dan diferan lenfrastruktir sportif pou bon devlopman nou bann zenn e osi atlet.

Gouvernman *LDS* in vin zwenn lenfrastruktir an plas. I fer ki i toutafe normal e i form parti zot devwar pou fer mentenans e osi amelyor lo sa ki zot in vin zwenn pou benefis nou bann atlet. Ler ou aste bef

ou bezwen pran li avek son korn.

(APPLAUSE)

HON SYLVANNE LEMIEL

Alors, oli problemm si zot bezwen envestir dan fer renovasyon e osi amelyor bann lenfrastriktir ki deza la?

Nou pa kapab anmenn en Gouvernman ki zis anmas larzan pou aste palto, pey dantis prive, donn zot lekor bann gro *allowance*. Bann *housing allowance, allowance* pou linet menm si zot parfetman vwar kler.

Mr Speaker, R4 milyon ti'n swadizan dan Bidze 2023 pou fer *sports complex* Anse Royale. Me dan *mid-year review* larzan ki swadizan ti pou koman en *grant*, i pa'n paret e mon krwar i pa'n ganny *granted*. Minis. Minis Finans ti donn lasirans ki nou pou koup riban sa lannen me malerezman Minis, pa'n arive.

(APPLAUSE)

HON SYLVANNE LEMIEL

Me pou mwan, i pa sirprann mwan akoz mon konnen ki mon pe travay ek en Gouvernman ki pa kapab delivre lo son promes.

(APPLAUSE)

HON SYLVANNE LEMIEL

E la ankor nou vwar Gouvernman ki'n promet R4.5 milyon pou renovasyon *sports complex*, ankor. E osi R15.6 milyon pou konstriksyon *indoor courts*. Sportsmen Anse Royale in dir mwan dir Gouvernman pa trenn lipye an 2024, e fer sir ki sa proze i komanse e konplete.

Lasistans pou bann *sportsmen* lo nivo distrik i en lot size ki devret ganny revwar, la ki Minister in met dan Bidze en sonm pou detekte bann zenn talan. Sistem an plas ozordi i fer li difisil e konplike pou en tim *sport* ganny lasiste atraver Gouvernman Lokal.

Mr Speaker, en kominote i devret pe toultan bouze, devlope e anmenn soutyen pou sa ki pe viv ladan. Developman en kominote i devret dan tou form, e i devwar Gouvernman pou envestir e asire ki demann bann zabitan dan distrik i ganny akonpli atraver bann programm e osi proze ki lotorite distrik i met devan lo zot par.

Mr Speaker, mon ti a kontan fer resorti ki mwan koman *MNA* elekte pou distrik Anse Royale mon'n toultan reste konekte avek mon zabitan. Mon'n touzour pe reponn oubyen return zot *call* mon zabitan. Mon'n toultan a lekout mon zabitan e sey mon mye pou rod solisyon pou zot problem. Si ozordi

Gouvernman LDS pe met larzan dan Anse Royale, sa i akoz son MNA i travay.

(APPLAUSE)

HON SYLVANNE LEMIEL

Sa i akoz son MNA in demande, e i pe toultan demande.

Mon oule donn mon garanti zabitan Anse Royale ki mon pou touzour pouse, demande e kontinyen demande pou zot. Mwan mon konn bezwen mon zabitan. Mon pa konn zot zis dan lavey en eleksyon, parey serten ki ler eleksyon pe aprose ou vwar zot vin fer tou sord visit dan distrik.

Dan Bidze 2024, nou vwar ki larzan pe ganny mete pou semen Grand Riviere ki ti'n ganny met lo en poz akoz Gouvernman ti ankor pe esper larzan donasyon ki pa'n zanmen aparet. La zot pe met R4 milyon dan Bidze, mon espere ki zabitan sa rezyon a kapab vwar dezyenm faz sa proze komanse e konplete an 2024. Nou'n osi vwar en sonm R2.1 milyon pou lagrandisman lakaz dimoun aze Anse Royale.

I annan 3 an depi ki sa proze ti sipoze ganny fer me sa pa'n zanmen arive. Akoz Gouvernman in kontinyen fye dizef dan vant poul. Sa enn osi zot in esper larzan

donasyon me pa'n zanmen aparet. Mon rekomande ki sa proze i demare deswit an 2024 e konplete avan lannen 2024 i fini.

Pandan lannen 2023 nou'n travay ansanm pou akonplir bokou pti proze parey met koltar ek lagrandisman semen Jardin Du Roi, lagrandisman semen lo Teat Mont Plaisir, e lezot landrwa. Lalimyer atraver donasyon Mr. Gilbert Frichot pe ganny mete e nou pe al fini mete la.

Mon remersye Mr Cupidon pou travay pros avek distrik, pou asire ki nou bann lalimyer i ganny mete dan bann landrwa kot nou zabitan in demande pou ganny mete.

Byento mon pou konkretiz nou proze met *camera* sirveyans dan nou distrik atraver bann demars ki mon pe fer. Sa i a ede pou amelyor sekirite ki bokou dimoun i konsernen avek.

Mr Speaker, Minis ti fer resorti ki son ladministrasyon i krwar dan leve debourye, e pour ki pep Seselwa i kapab leve e debourye. In dir ki son Gouvernman i bezwen kree lanvironnman ideal pou siport laspirasyon bann ki annan sa lanvi pou leve e debourye. Sa i byen Minis.

Mr Speaker, la mon mazin bann debouryer dan Anse Royale. I annan bokou dimoun ki anvi leve debourye.

I annan bann ki ti pe debourye kot *CSB Building* e zot in ganny demande pou sorti akoz dapre Gouvernman *LDS* i bezwen sa landrwa pou fer biro Gouvernman. Ziska la zis Biro *Attorney Zeneral* ki pe servi en apartman dan sa batiman.

Biro lazenes li i ti deza la depi lontan. Sa batiman pe tonm an rin. E i demann en renovasyon mazer. *Glorious Bakery* i annan plis ki 27 an depi ki i pe donn en servis zabitan Anse Royale dan sa batiman. I pe pey Gouvernman en lwaye e pe kontribye milyon rouspi atraver tax tou le lannen. Bokou fanm e zom Seselwa pe travay e ganny zot dipen atraver sa biznes.

Ki nou vwar ler Gouvernman *LDS* in vin o pouvwar, in demann tou sa bann dimoun ki annan biznes dan sa batiman pou sorti. I normal ou pe demann zot pou sorti, me ki opsyon ou pe donn bann ki napa en landrwa pou kontinyen son biznes? Sanmenm sa ki zot pe ankouraz leve debourye?

Tousala Mr Speaker, i annan malis e zwe politik. Bokou zabitan pe rod landrwa dan distrik pou leve. Pou le moman i annan sa later kot ti pou fer proze *leisure park*. E Minister Lafanmir in sipoze ganny sa landrwa e pa ankor

kennen ki pou fer avek. Mon propoze ki Gouvernman i seryezman deside e vin dir avek. Mon propoze ki Gouvernman i seryezman deside, e vin dir avek zabitan Anse Royale ki son plan pou sa landrwa. Akoz zabitan pe rod later pou zot leve e debourye.

Mr Speaker, Bidze 2024 i en Bidze pirman pou kanpanny. En Bidze ranpli avek bann gro, gro proze kapital e gran, gran promes. Me an realite mon pa pe vwar kapasite pou Gouvernman kapab akonplir tou sa bann promes. Tousala pou fini parey sa 3 an ki'n pase. Mazorite proze pa ankor ganny fer oubyen i ankor lo papye, menm i annan pa ankor konplete. Lannen i ganny letan pase, me proze pa ganny akonplir. En legzanz tipik i lakres Anse Royale.

Lazans proteksyon sosyal i ganny dezyenm pli gro Bidze pou lannen 2024. Larzan an plis pou asiste dimoun ki bezwen *welfare*. Ki kantite dimoun ki'n ganny asiste? E ki kantite dimoun ki zot pe mazin asiste pandan lannen 2024. Lasistans *welfare* i la wi, me eski tou sa ki bezwen i ganny asiste? Sa kantite letan ki pran pou en aplikan ganny asiste i tro long. 3 semenn e menm plis ki en mwan i tro lontan pou en dimoun ki bezwen lasistans

espere. In ler pou Lazans proteksyon sosyal revwar son prosedir e lakantite letan ki zot pran pou asiste en dimoun ki dan bezwen.

Letan mon pe konklir Mr Speaker, mon oule remersye mon *clerk*, Ms. Charlotte Beauchamp ki travay tre dir dan mon lofis. Ms Pamela Henriette, *DA* avek son tim kot Ladministrasyon Distrik; tou volonter e zabitan ki toulstan pe reponn lapel letan ki Lotorite Distrik i apres zot pou zot donn en koudmen dan nenport sityasyon ki arive dan distrik.

Mon oule ankor enn fwa donn garanti tou mon zabitan ki otan ki mon *MNA* Anse Royale, mon pou toulstan pe travay dir a kote zot, pou zot, pou asire ki nou distrik pa reste deryer. Mersi pou zot sipor e lankourazman ki zot toulstan pe donn mwan.

Avek sa Mr Speaker, mon remersye ou.

(APPLAUSE)

MR SPEAKER

Bon nou a pran poz e nou a repran travay 4er. Mersi.

(BREAK)

MR SPEAKER

Laparol pou Onorab Rosie Bistoquet.

HON ROSIE BISTOQUET

Mersi Mr Speaker. Bonn apre midi, Mr Speaker. Bonn apre midi Minis Finans, tou Onorab e tou bann dimoun ki pe ekoute.

Mr Speaker, lannen pase dan sa menm deba, Onorab Gabriel ti fer Lanperer Nero zwe lakordeon olye vyolone. Sa lannen sa menm Onorab i dir nou ki *US* ki'n liber *LDS*.

Be Onorab, les mwan dir ou se *LDS* ki'n liber *US*, akoz premye Prezidan ganny elekte dan bwat vote Sesel se pa lot ki Wavel John Charles Ramkalawan.

(APPLAUSE)

HON ROSIE BISTOQUET

Zour i ti ganny elekte *SPUP*, *SPPF*, Parti Lepep, *US* zot in pran kannal e vin dan Lopozisyon. En listwar enkrwayab. Sa ki nou apel liberasyon. Non pa 5 Zen 1977.

Apre Onorab Gabriel i dir, *US* in fer tou semen avek tou bon lenfra striktir. Be dir mwan, laplipar sa bann semen se semen kalver. Sa bann pov tantin ek tonton zot bezwen mont plis ki 100 mars peron pou ariv kot zot. Sa bann pov fanmir zot ti bezwen savoy materyo konstriksyon, zot kommisyon le mwan tou le mwan, lo likou ziska ozordi.

Pointe Larue menm i

annan en peron pou monte Nageon Estate pou ariv kot lafanmir Uzice. I annan 280 mars peron. Enkrwayab.

Eski sa ki nou apel liberasyon en pep? La ki zot dan lopozisyon, al demann pardon tou sa bann dimoun ki ankor pe soufer avek zot zenou akoz sa bann semen mal anboure.

Mr Speaker, mon pa konnen ki mannyer nou pou ariv laba. Be selman mon krwar zot a bezwen pran tik, tik dan kwen. Mr Speaker, mon remersi Gouvernman *LDS* atraver Minis Finans, Mr Hassan e son lekip teknisyen pour sa preparasyon Bidze konpreansib, egzanpler pour 2024.

Sa i montre bon preparasyon byen profesyonnel. E osi avek en matematik *class A1* pour en Bidze Nasyonal. Mersi Minis Finans ek ou lekip. Wi Mr Speaker, sa Bidze parey mon'n dir in byen kalkile avek en vizyon kler. En vizyon ki'n demonstre *leadership*. En Gouvernman ki'n mazin son pep avan tou.

Nou tou nou konnen ki *COVID* in fer en bann move destriksyon dan lekonomi nou pei. Dan lemonn antye, enkli Sesel. Nou tou nou konnen ki Gouvernman *LDS* i ti erit en kof vid. Nou tou nou konnen ki bal ti'n ganny donneen dan

taxpayers' money. Me sa ki mon pe dir zot i laverite. Gouvernman *LDS* in travay dir. Tre dir pandan sa 2 an edmi pou met Sesel kot nou vvar li ozordi lo son lipye. Sirtou la kot lekonomi i pe monte. E nou'n trouve poudir bann laspe sosyal ekonomikman i pe konmans repran son lipye.

In travay dir sa Gouvernman, pou kree larises pou bouz nou pei pli devan. I pa'n gaspiye. I pa'n vole. I pa'n pran gous. I pa'n fer trik parey Gouvernman dan lepase. Sou par sou. Kas par kas. Roupi par Roupi, sa Gouvernman in met ansanm. Nou Prezidan in menm al mandyan kot bann zanmi aletranze pou asire ki i kree larises pou siport nasyon Seselwa. Sa Mr Speaker, i koz pour li menm.

Ozordi Gouvernman *LDS* i sirmont tou, laplipar sa bann defi. E in kree rezilyans kont tou sa bann defi. E sa ki nou apel en bon Gouvernman. Se sa ki nou apel en bon *leadership*. Se sa ki nou apel latransparans. Se sa ki nou apel en Gouvernman byen kalkile. Se sa ki nou apel partaz larises pour benefis tou kous soyete.

Mes amis, 2 an edmi i pa 2 semenn. I pa ni 2 mwan edmi. Be selman nou Gouvernman in fer li. Malgre tou sa bann defi mondyal tel ki

nou'n vwar lekonomi mondyal dan bann pei pli devlope in ralanti, sirtou dan sekter servis. Mazinen pa tou Seselwa ki'n fer sa arive.

Bann regilasyon enternasyonal ki'n pet plafon, par egzantou keksoz in monte. Lenflasyon dan tou pei. En bon legzanp se pri *container* ki anmenn marsandiz Sesel. Par egzantou, avan COVID en 5 tonn *container* pou ariv Sesel ti ariv \$2500. E ozordi i kout ant \$5 mil a \$6500.

Logmantasyon dan pri *fuel* ki en komodite ki tou pei i pe pas atraver. Eski Seselwa ki'n fer sa arive? Laplipar komodite *made in China* ki nou'n trouve, in redwir avek en lekonomi dan Lasin. Sa set akoz i annan en kantite retar ki'n ganny fer. Lagrandisman son lekonomi dan Lasin. E sa i osi reflekte lo Sesel konman en pti pei.

An plis ki sa Mr Speaker, pei kot i annan konfli. Sirtou kot lager parey nou'n trouve, lager Ikrenn ek Larisi in devaste lafors imen pli prodkтив, lekonomi mondyal e osi rezilyans sa bann pei. E tou resaman la tou dernyerman konfli ki annan an mwayen oriyan.

Mr Speaker, nou Gouvernman in prevwar ki sa konfli an mwayen oriyan pou annan posibilite pou anmenn

defi dan sekter tourizm. Sirtou Izrael a lonterm, akoz sa sekter pe benefisyé apepre 5poursan nou total touris ki vizit Sesel.

Mr Speaker, nou Minis Finans in fer resorti dan son adres Bidze 2024 ki i prozekte ki lekonomi mondyal pou ralanti plis ankor. Lo kote lenflasyon, Fon Moniter Enternasyonal pa ekspekte pou return dan nivo normal ziska 2025. Eski sa Mr Speaker, se Gouvernman LDS ki kontrole?

Mr Speaker, sa ki nou'n trouve, sa i en Gouvernman ki pe travay e mon konnen parey nou'n dir, i pe fer en bon travay. Kontinyen LDS.

Wi Mr Speaker, ler mon get depans pour Bidze 2024, i montre nou ki Gouvernman LDS in rekonnet vre vulnerabilite nou pep apre 43 an ki Gouvernman US in kasyet zot soufrans.

Pandan sa 43 an larzan lepep in ganny partaze avek zot dalon, zot paran, zot zanmi ek zot konesans. Sa ki ti pli vulnerab ti napa lavwa. O kontrer en pti git dimyel ti ganny pas o bor zot lalev zis ler eleksyon pe vini. Avek en pti *fridge*, *cooker*, *washing machine*, en *flat screen*, en pti fey tol. Apre tousala ti *end up* kot bin.

Si nou ouver nou lizye pep Seselwa. Ouver li byen.

Nou a vwar sa bann depouy elektronik dan bor *bin* pandan – napa okenn depouy elektrik dan bor *bin* pandan sa 2 an edmi. LWMA kommela nepli annan sa traka anmas bann bout fey tol kot *bin*. Dan *clean up the world* pandan sa 2 an nou vwar zis bann brans ek bann fey dibwa.

Mr Speaker wi, nou pei in pas dan diferan sekous pandan en bann lannen. Me Gouvernman US pa'n zanmen vwar li son responsabilite pou etidye e met an aplikasyon bann mezir rezilyans pou anmenn nou pei, sirtou nou popilasyon. Amelyor lavi nou popilasyon isi Sesel.

Nou bann *leaders* dan Gouvernman LDS in pran kont tou sa bann vilnerabilite, sirtou bann lendis ki reflekte lo nou lekonomi. Sirtou sa bann defi swivan ki nou'n trouve. Nou Sesel nou pa prodwir naryen. Tou keksoz depi zepeng, legim, fri, lavyann, lenz, meb nou enporte. Nou napa ase later pou fer lagrikiltir. Eski i annan gran progre dan lendistri *Blue Economy* pandan sa 43 an?

Sanzman klima pa dan nou faver isi Sesel. E nou konnen nou ganny konsidere konman en *Small Island States*. Defi ki nou'n erite avek US i met nou lekonomi pli ba ki later. Parey drog ek lalkol

ki'n ronz nou bann zenn kot Sesel i premye dan lemonn.

Tou striktir ki ti'n ganny konstrir letap kolonyal, zot ankor la. Zot tou zot in delapide, zot koule, zot kase. Napa renovasyon ki'n ganny fer. Get nou bann batiman sportif, kiltirel. *Local Government* pli fer lapenn. Bann klinik, bann *fungus* ki'n fer korwa lo la.

Delo kaka La Misère, konpansasyon pa ankor fini donne. Nou prop ser ek frer in soufer e ankor pe soufer avek advers sa bann *fungus*. Birokrasi, trenn lipye dan tou servis piblik. Servis sosyal e Lanplwa in ganny neglize. Ti napa en bon Polisi e en bon edikater tanzib pou asire ki i annan legalite e ekite.

Larzan in ganny donne gos, drwat. Sa ki ti pli vilnerab pa ti ganny gete. Pli move si ou en dimoun ouswa ou zanfan, ou paran ti siport lopozisyon. Sa ti pli serye. Zot pa ti konnen ki *what goes around comes around*. Ozordi US in vwar li dan lopozisyon. Prezan zot kantik toulezour se zot pa fye Gouvernman LDS.

Wi Mr Speaker, ou konnen akoz zot pa fye Gouvernman LDS. Set akoz zot lespri i ankor dan *gear* aryer. Sa boul retour lopozisyon i for pou zot tenir. Zot vwar nanm gran lizour. Kot i bon, zot dir i pa bon. Ler i vwar ou pe vini, i

dir ou pe ale. Kot zot gete, zot vwar zis fernwanr. E sa ki mon pa kontan ankor, ler ou vwar ou ou'n met lenz, i dir ou touni.

(laughter)

HON ROSIE BISTOQUET

Wi Mr Speaker, dan lopozisyon i fermal. I pli fermal ler napa en direksyon.

Mon konsey se zot pran pasyans 2025. La kommela zot dan pиргатвар. 2025 zot pou ganny *exterminate!*

(laughter)

HON ROSIE BISTOQUET

LDS in bezwen trouv plis larzan pou sirmont sa bann vilnerabilite ki ganny akimile pour *des années e des années*. E ozordi zot pe vwar en zoli lalimyer *at the end of the tunnel* pour benefis tou zanfan Seselwa.

Mr Speaker, sa Gouvernman LDS pe distribye sa larises ki'n akimile, pour ki tou Seselwa i zwir sa benefis avek responsabilite.

Wi, Mr Speaker, Gouvernman LDS in pran kont tou sa bann defi naturel anmennen par *COVID*. E osi par bann defi artifisyel kree par imen, kree par *US* pandan sa bann letan. Be sa Bidze 2024 i tre prometan, akoz provizyon in ganny fer pour

nou promot en bon stil lavi pour tou Seselwa.

Sirtou atraver lenvestisman en pe plis dan nou programm sosyal e lenfrastriktir, dan en fason soutenab pou asire ki nou zanfan i ganny akse avek meyer ledikasyon formel e enformel. E nou nasyon i reste an bonn sante.

Sa ki pli vilnerab i ganny akse avek servis ou lasistans ki zot merite. Nou lafors travayer i kontinyen donnent pour nou progresyon nou lekonomi. E osi rezouir benefis ki zot in travay dir pou gannyen. Nou bann zonm ek fanm dan zot laz reprodiktiv i rezouir en fanmir an bonn sante. E osi nou zenn i kapab annan plis lespas pour zot fer zot rev vin vre kot personn pa ganny kit deryer.

Wi Mr Speaker, parey laplipar pei an developman, sekter lasante i en sekter ki ganny alinyen avek edikater Lorganizasyon Mondyal pour Lasante. Sa rapor ti ganny refer sorti lo *Global Health Report 2021* ki pli gro sonm Bidze i devret al pour Lasante.

Dapre mesaz Prezidan Ramkalawan a lokazyon Lazournen Mondyal pour Lasante le 7 Avril 2023, Prezidan ti dir ki i tre antouzyazm pou renouvele son komikman. Ki son Gouvernman pou kontinyen

amelyor lasante pour tou Seselwa atraver swen lasante pou soutenir lenvestisman dan tou travayer lasante, atraver zot devlopman ek *training*.

Wi Mr Speaker, lasante i en sekter kot i donn servis tou kous popilasyon depi ler menm avan ou ne ziska ler ou mor. Servis i konpri tou kalite maladi ou konplikasyon ki pasyan i rapport avek. Enkli aksidan lo semen.

Alors Mr Speaker, Minister Lasante i merit ganny sa Bidze ki'n propoze.

Mr Speaker, mon tre ankouraze ki Prezidan Ramkalawan in kit son parol pour Bidze pour alokasyon R1.4 bilyon pour sekter lasante. Swen lasante pou ganny fer – sa swen lasante pou ganny sa Bidze e sa i atraver tou Lopital Mahe, Praslin, la Digue. E menm Silhouette, Sant Lasante North East Point, lopital e lezot klinik.

En sonm 79.3 milyon in ganny prozekte anba bann proze kapital pour sekter lasante pour proze *maintenance* kontinyel, sirtou lopital.

Adisyonnelman Mr Speaker, sa bann sonm swivan in ganny propoze. 73.6 milyon pou aste latizann, vaksen, kontraseptiv. 100.4.5 milyon provizyon pour

medikal. sereng, koton, masin medikal. Provizyon manze pour bann pasyan. 50 milyon tretman medikal spesyalize. 76.8 milyon tretman dyaliz. Zis pou donn lenformasyon kote larzan lasante i ganny plis depanse.

Nou to mortalite i plis atraver maladi non komunikab parey maladi leker, kanser, tansyon, dyabet. E konplikasyon tansyon, dyabet i annan konplikasyon maladi ronnyon, kot konplikasyon sa bann maladi i *end up* kot dyaliz. Pour lemoman mon a donn zot zis en pti revi.

Pour lemoman i annan en sesyon dyaliz ki kout \$200 par personn kot *unit* dyaliz. Ouswa i ariv R2,600. Sak dimoun i fer 3 fwa sesyon dan en semen. Sa i kout Gouvernman 7800 par semen, par personn.

Pour en dimoun par mwan i kout R31 mil 200 par personn. Minister Lasante i annan 200 dimoun ki pe fer dyaliz an se moman. Sa i fer R374 mil 400 pour 200 pasyan pour en mwan selman. An tou Minister Lasante pou depans li R74 milyon 800 mil pour 200 pasyan. E sa i depan ankor lo deviz etranzer ki mannyer son *rate* i ete.

Eski sa Gouvernman pa pe donn swen lasante pour son pep, malgre i ser? Nou remersi tou staff lasante pour

zot devosyon travay dir pandan sa lannen 2023. Zot servis in ganny tre byen apresye. Lo mon non personnel e non mon bann zabitan, mon osi remersi *staff* lasante baze kot Klinik Anse Aux Pins pou deservi tou zabitan Pointe Larue. Mersi pour zot devosyon e kouraz pou donn plis sa ki zot annan. Sirtou pour lannen 2024.

Mr Speaker,
Ladministrasyon Distrik.
Lopozisyon in koz bokou lo trezyenm mwan saler. Zot oule ki sa i vin en drwa pour tou travayer. Wi Mr Speaker, nou konnen, bonous i bonous. Saler i saler.

Ki mannyer bonous pou vin en drwa? Bonous i en konpansasyon ki travayer i resevwar par lao son saler. I paret mwan lopozisyon pa konn konte. I annan 12 mwan dan en lannen. Napa 13 mwan. Sa bonous trezyenm mwan i pa en drwa. Me i en rekompans baze lo ou performans.

(APPLAUSE)

HON ROSIE BISTOQUET

Tou travayer i bezwen travay dir pou ganny sa rekompans. Wi Mr Speaker, Lopozisyon pe anmenn en largiman depi ler zot in perdi eleksyon an 2020. Zot pe kontinyen dir ki servis pa bon dan servis piblik. Be

dapre zot, avan 2020, servis ti pli bon, ouswa ti bon? Se pourtan zot ki'n la pour sa dernyen 43 an.

Eski pa i ti menm travayer ki ti la? Menm *PS*? Menm *CEO*? Menm Direkter Zeneral ki la dan sa servis piblik? Eski se Gouvernman *LDS* ki'n fer serten, pa tou travayer pou trenn lipye? Fer dimoun vir an ron? Pa reponn telefonn?

E an menm tan Mr Speaker, si zot ankor pe konplent. Si sa servis i pa bon parey *US* i dir, eski sa i vedir travayer osi pa pe donn servis? Sa ki zot pe dir nou? Eski zot pe dir nou poudir travayer servis piblik pa bon? Eski zot pe blanm travayer servis piblik?

Mr Speaker, me selman zot menm zot, zot dir donn trezyenm mwan saler, bonous tou travayer. Zot pa krwar dan *result base management*. Me zot krwar travayer i devret ganny bonous baze lo - Zot pa krwar travayer i merit ganny bonous baze lo zot performans.

Be Mr Speaker, *US* i mantal. Servis pa bon, me zot osi dir donn tou dimoun trezyenm mwan saler parey. Gouvernman *LDS* in ekout tou kous travayer. Lamazorite i dir wi, donn rekompans sa ki travay. Non pa sa bann ki pares. Bann ki pa vin travay.

Alor zot dakor pou avek sa *result base management appraisal* ki'n ganny *institutionalized* depi sa lannen. Sa novo programm *RBM* i pou anmenn rezulta servis piblik pli efektiv. En lafors travayer pli byen ekipe. Nou lekonomi i a transformen atraver en gro – en novo kad pour tou servis piblik.

Mr Speaker, ledikasyon i lakle nou fitir zenerasyon. E sekter ledikasyon pou ganny en logmantasyon Bidze 1.4 bilyon pour lannen 2024. Mon tre kontan ki sekter ledikasyon in osi ganny en pli gro Bidze parey Minister Lasante. Mr Speaker, akoz lekol i en landrwa kot zanfan i depans plis ki apepre 6 a 7 erdtan par zour dan laklas.

Alor i tre kritik pour tou *teachers*, tou edikater pou annan en lanvironnman pli fezab pour aprantisaz nou zanfan. Ler i annan sa bon lanvironnman, *teachers* edikater i osi benefisyé atraver en bon lanvironnman ekitab pour lansennyman.

Mon asire Mr Speaker, ki lekol Pointe Larue Primer pou osi benefisyé e sirtou Lekol Segonder ki en lekol rezyonal ki annan bann zanfan. Sirtou sorti Cascade, Anse aux Pins, Au Cap, e osi bann zanfan Pointe Larue.

I tre ankourazan pour la premye fwa ki Gouvernman

LDS in osi rekonné net nou zanfan ki'n konplet lekol profesyonnel avek distensyon parey *NIHSS*, *SITE*, *NIE*, *STA* e lezot. E menm nou bann zenn ki dan lanplwa, zot osi zot a kapab kontinyen zot letid pli avanse atraver sa Bidze pour sa sonm 198 milyon ki'n ganny bidzete pour lannen 2024.

Dan sa Bidze ledikasyon Mr Speaker, mwan mon vwar li enn ki fantastik. Fantastik akoz provizyon in ganny mete pour tou laspe ledikasyon nou zanfan. E osi sipor pour edikater.

I tre prometan pou vwar en gro sonm 335.4 milyon ki'n ganny bidzete pour lenfrastriktir dan sekter lakaz ek later pour benefis tou Seselwa ki dan bezwen. Lakaz ek later i parmi lenfrastriktir ki tre neseser pour bann fanmir.

Mon kontan pou vwar ki zabitant Pointe Larue osi pou benefisyé. Gouvernman *US* in toultan negliz zabitant Pointe Larue. Mon pa konnen akoz. Par egzanp, zabitant in ganny promet par ladministrasyon *US* ki devlopman dezyenm faz lakaz Nageon Estate ti sipoze konmanse depi 2016.

Naryen pa'n ganny fer ziska ki lopozisyon in antre dan lopozisyon. Sa bann pov zabitant pe reste dan sa bann lakaz ki enpitwayab. Karya in

pran korya! Plans in defonse! Oli konpansasyon ki US – konpasyon ki US i annan pour sa bann zabitan Pointe Larue? LDS in vwar zot soufrans.

Wi, mon annan loner pou dir lafanmir Amédée, Labonte, Roseline, Amis, Bonnelame ki reste Nageon. Zot lavwa in ganny tande par Gouvernman LDS. Byento zot a antre dan zot novo labri. Redevlopman Proze Nageon Estate in fini ganny *tender*. E par lannen 2024 zot lavi pou sanze, apre ki zot esper tro bokou letan.

Mr Speaker, ankor zabitan Pointe Larue pou benefisyé atraver en sonm R8.3 milyon pou konstrir sa 16 *unit* Anse Francois pour proze lozman.

Mr Speaker, i tre ankourazan pou trouve ki Gouvernman LDS in kontinyen amelyor sistemni sipor sosyal pandan sa 2 an, ki pli ekitab e soutenab. E avek kontrol pour tou Seselwa ki dan bezwen.

Mon pe dir Mr Speaker, pour Seselwa ki dan bezwen atraver bann protokol byen detaye. Pa parey dan lepase kot larzan benefis sosyal ti ganny – sirtou benefis sosyal. En kantite dimoun ki ti gannyen ki pa ti merite. Larzan ti ganny donnez avek nenport ki sa ki zot anvi donnez. Me ti napa okenn dokimantasyon.

Mon konn dimoun Pointe Larue ki'n dir mwan dan lepase zot ti ganny *call aswar* dan 8er, 9er diswar pou rapport kot lasanm nimero 10 *Ocean Gate House*. Ler zot ti al laba, zot ti ganny dir ou *MNA* in siny en papye pou ou ganny en pti larzan tou le mwan. Menm si ou pa'n demande.

(Interruption)

HON ROSIE BISTOQUET

Ozordi i annan kontrol. E sa i kler. Pa mwan ki lalang. Kekfwa kote laba ki lalang...

(Interruption)

HON ROSIE BISTOQUET

Si sa Gouvernman LDS in pran kot plis bezwen zot tou - in pran bezwen tou kous Seselwa, popilasyon ki pli vilnerab. Kot serten renovasyon, malgre revizyon, malgre vilnerabilite sosyal in sanze depi ki US i o pouvwar.

Par egzanp. Mon pou donn par egzanp, nou annan an plis, en kantite plis *single mothers* ki pe okip bann fanmir. Plis zenn fiy anba laz zot pe fer tonn assent. Nou apel *teenage pregnancy*. Serten papa pa pe pran zot responsabilite. Tousala i apel vilnerabilite ki Gouvernman US pa'n zanmen regard ladan. E sa bann papa pa pe kontribye kot lakour.

En bon pe nou bann zonm i dan prizon. Nou popilasyon pe vyei. Levidans leksperyans lavi an nesans dan rapor Minister Lasante 2022, kot zonm i pe viv 74 an e fanm 82 an. Sesel i nepli annan *extended family* kot granmanman ti vey pti zanfan kot lakour. I regretan ki en bon nomm nou, nou bann zenn in ganny noye dan drog avek lalkol. Lekel ki ti anmenn sa, Gouvernman LDS?

Mr Speaker, ouver nou lizye Seselwa. Gouvernman LDS in konn zot soufrans. E se pour se la ki nou vvar li neseser e pou revwar tou sa bann benefis. Menm azout novo benefis ki pa ti zanmen egziste. Mon santi mon tre fyer pou vvar ki sa bann benefis swivan in ganny revize ouswa ganny azoute.

Maternity, paternity benefit ki'n ogmante. E sa i pou ed bann manman ek papa tousel ki etablir zot fanmir. Orfelen ou semi orfelen. *Foster child, foster parents* ki'n ogmante. Sa i a ed fanmir pou siport zanfan ki'n perdi enn ou tou lede zot paran.

Madanm ou zonm ki'n perdi zot pros in osi ganny ogmante. Ogmantasyon pour madanm ansent ki pe al donn nesans Mahe, sorti lo bann zil pros.

Mr Speaker, mon pou tourn en pti pe par deryer akoz

yer mon ti tann en koleg lot kote, atraver ou, ki pou mwan dir ki; Onorab Pillay *LOTO*, aret anbet Seselwa. Minister Lasante i annan en protokol ki'n ganny etablir depi plis ki 20an pase pour bann manman reste La Digue ek Praslin ki pou ganny baba lo Mahe. Limero enn, tou manman dapre sa protokol. Tou manman i lib pou swazir kote i anvi ganny son baba.

Limero 2, tou manman ki pou ganny baba, zot dezyenm ouswa zot katriyenm baba. Zot fodre zot al Mahe akoz zot kapab ganny konplikasyon. Tou manman ki annan ou ki ti annan konplikasyon pou zot bann baba oparavan, zot bezwen al Mahe pou ganny swivi de pros ziska ler zot delivre.

Mr Pillay –Onorab Pillay, *sorry*, rod byen ou levidans avek ou *leader* parti avan ler ki ou donn bann fo propagann. Swadizan ou *leader* parti i en dokter medikal.

(*Interruption*)

HON ROSIE BISTOQUET

Mr Speaker, mon kontinyen. *Multi births*; Paran – mon kontinyen lo benefis. Paran pou ganny en sonm ki i pou kapab soutenir zot zanfan. Nuevo benefis pour paran ki ganny donn nesans plis ki en baba. E sa i tre enportan pour

ziska bann zanfan i ariv laz 5 an.

En *halfway home* osi pour bann viktim vyolans. Gouvernman pe negosye pou fer en lesanz later. E sa mon krwar i a kapab siport bann manman. Sirtou bann single mother ki ganny abize avek zot fanmir – avek zot zanfan.

Mr Speaker, tousala i montre komikman Gouvernman *LDS* i tre serye pou siport son pep.

Mr Speaker, zabitan Point Larue in apresye *meeting* piblik ki Prezidan ti fer avek zot. Menm si *MNA* elekte ti *boycott*. Zabitan, zot lavwa in ganny tandem. Apre konversasyon ki zot ti annan avek nou Prezidan, avek son lekip ki'n ganny elekte.

En sonm 7.5 milyon pour bann dezas, sirtou dan movetan kot brigad irzans i pour sa lazans. E i pou kapab ed bann zabitan Pointe Larue kot zot pou benefisy, sirtou ler i annan movetan. E kot dibwa i tonbe, pye dibwa i kase, zot pou ganny ede. Ouswa i annan *flood*.

En lot sonm 3.2 milyon renovasyon lakaz dimoun aze dan bann distrik. E mon kontan ki zabitan Pointe Larue pou osi benefisy akoz zot in deza pe koz lo la. Sa Gouvernman *LDS* in osi rekonnnet ki nou bann group

pli vilnerab i devret ganny siporte.

Se pou se la ki i annan 2 milyon pour lazans propriete ki'n ganny azoute dan sa Bidze pou konmans konstrir en *halfway home* pour bann viktim vyolans domestik.

En sonm 10 milyon in osi ganny mete dan Bidze pou travay lo sistem semen segonder. La nou pa zis pe koz lo semen. Me drenaz osi e lezot ankor.

Lo non zabitan Pointe Larue - mon en zabitan Pointe Larue, mon reste Pointe Larue e mon pou koz pour Pointe Larue. Mon oule dir mersi Gouvernman *LDS* kot travay drenaz dan semen ek *Flat Mirabelle*. E osi France Joseph Estate in byen demare depi Zilyet sa lannen.

Bann zabitan pe felisit sa Gouvernman. Byento sa 2 *flat* pou ganny konekte avek sa sistem *sewage STP*. Zot in vreman soufer avek delo desarz kabinen dan lakaz. Zanfan mars dan delo desarz pou al lekol. Menm pou zot al travay ti en problem.

US pa'n zanmen get dan zot *welfare*. Me selman sak fwa eleksyon zot vin devan zot laport dan bogi pou vin rod zot *vote*. Ler mon'n fer en pti letour kot sa 2 *flat*, zabitan dan sa 2 *flat* i dir mwan dir Gouvernman *LDS* mersi bokou. I pe fer en bon travay!

(APPLAUSE)

HON ROSIE BISTOQUET

E zot in osi dir mwan dir US lannen 2025 tat zot delo.

(APPLAUSE)

HON ROSIE BISTOQUET

Semen Adela Pointe Larue, ti en rev. I ti toulstan en rev pour sa bann zabitan en bann letan. Travay in konmanse depi Septanm 2023. Mon pou dir mersi *local government*.

Granmersi lafanmir Adela, Alex, Sandra. Lafanmir Freminot, Auguste, Marie pou annan sa bon lantant antre zot pou kapab aksepte donn *wayleave* pour konstriksyon Semen Adela. E en *parking* pou pran 6 transpor. Mersi pou annan en bon korperasyon antre zot. E mersi Gouvernman.

Mr Speaker, mon pou osi lans lapel avek Gouvernman pou kontinyen donn zot sipor zabitan Pointe Larue, sirtou pour sa bann proze swivan.

Akse semen segonder transpor kot lafanmir Pierre, Anse Francois. Akse semen segonder transpor, Nageon Estate faz 2 pour benefis zabitan. Spesyalman Mr Jules ki annan en serten dezabilite. I dan *wheelchair*. Akse avek semen segonder ek *parking*

Matata ki pou benefisyé plis ki 30 lakaz.

Koreksyon drenaz Pointe Larue santral deryer lekol segonder, kot lafanmir Bastienne i toulstan pas dan movetan. E sirtou ler rigol i bouse. Mr Bastienne ek Mrs Bastienne, ekout byen pe vin kot zot byento ki i a kapab debous sa rigol. Zot pa kapab reste toulstan dan labou. Zabitan Pointe Larue i toulstan soufer...

MR SPEAKER

30 minit Onorab. 30 minit.

HON ROSIE BISTOQUET

Wi, mon pe al fini Mr Speaker. Mr Speaker pou terminen, en gro mersi pour tou bann zabitan Pointe Larue. En gro mersi pour mon Clerk ki nou'n travay ansanm. E en gro mersi pour mwan tim Pointe Larue. Mersi bokou e nou a kontinyen sa bon travay 2024. Mersi.

(APPLAUSE)

MR SPEAKER

Laparol pour Onorab Gervais Henrie.

HON GERVAIS HENRIE

Mersi Mr Speaker. Minis Hassan. Avan mon konmans mon prezantasyon, mon ti ava kontan ki bann koleg Lasanble zot zwenn mwan pour nou

wish Onorab Sathya Naidu en *Happy Birthday. All the best on your big day.*

(APPLAUSE)

HON GERVAIS HENRIE

Lo lapar tou zabitant Mont Buxton, permet mwan eksprim nou gratitud pour tou dimoun ki'n prepar *Appropriation Bill*, 2024. Sa lannen i en loner pour mwan reponn sa enn diskour Bidze akoz i vin dan milye manda nou Parti *LDS* koman Gouvernman.

Depi nou laviktwar elektoral 3 an pase, Lepep Seselwa pe ganny envite pou zwenn nou lo en traze transformasyon. A lafen sa traze ki pa pou pran ni 3 zour, 3 semenn, 3 mwan ouswa 3 an. *LDS* pe promet ou en servis piblik modern, en nasyon an bonn sante, letablisman lord e Lalwa.

En sistem ledikasyon pli modern ki alinyen avek nou bann bezwen dan le fitir. Soustenabilite lanvironnman e rezilyans kont sanzman klima. E en azanda transformasyon ekonomik.

Apre sa 3 an *LDS* in o pouvwar, mon pe adres bann zabitant Mont Buxton e Lepep Seselwa an zeneral ozordi. Avek non selman lafyerte, me osi konviksyon ki zot pa'n fer en move swa an Oktob 2020.

Bidze 2024 pe ganny prezante dan en lepok kot pe annan en logmantasyon dan bann eleman risk ki kontinyelman menas nou stabilite ekonomik e finansyel. Tel ki *cyber-attacks*, sanzman klima, pandemik *COVID 19* e bann tansyon politik atraver lemon, kategorize par lager dan omwen 32 pei atraver lemonn. E sa i enkli dan 23 pei Afriken kot i annan swa lager sivil, vvolans etnik ouswa bann aktivite terorizm.

Me lafyerte nou pti nasyon lo sa traze transformasyon, i nou determinasyon pou donn sak Seselwa sa garanti ki zot annan en plas e en rol pou zwe dan Sesel. I responsabilite sakenn de nou koman Seselwa pou non selman benefisy, me osi batir sa Sesel anba direksyon *LDS* e sa ki i pe ofer ou.

Mr Speaker, Bidze 2024 pa'n ganny prezante dan vid. I form parti sa traze transformasyon dan ki misyon *LDS*, se pou diriz Sesel dan en novo letap son devlopman koman en pei ki pe ganny byen gouvernen, kot drwa sak Seselwa i ganny valorize. Lekonomi pei i fleri. E byennet nou pep i garanti.

An 2021, pour nou premye Bidze a en sonm R11 bilyon, lanfaz ti lo stabilite makro ekonomik. E latansyon

ti al pour sekter lapes e pou rebat masin lendistri tourizm ki ti'n fre apre ravaz koze par pandemik COVID 19.

Touzour an 2021, aksanti osi ganny mete lo promosyon Sekter Lagrikiltir, Sekter Finansyel e Lekonomi Nimerik. Dan son premye adres Bidze, Minis Hassan ti osi anons bann mezir pou reviz bann prosedir koleksyon reveni. Prezerv plizer kategori biznes, selman pour Seselwa. E lezot mezir pou mye zer resours pei atraver bon gouvernans, stabilite sityasyon finansyel pei. Enkli kontrol nivo det pei.

An 2022 pour dezyenm Bidze, ti en plan pou konsolid, reglement e moderniz lekonomi pou asire ki en lot kriz pa pou sekwe li akoz son fondasyon i solid. Pour sa arive fodre ki Bidze pei i retourn dan siplis. Nivo lapey dan sekter piblik ti reste soutenab, e depans avek det Gouvernman pa ti al an deor kontrol.

Bidze 2022 ti baze lo donn nouvo loportinite e met bann striktir an plas pou permet sitwayen leve e debourye. Sa Bidze ti pe senm bann lagrenn pour lagrandisman lekonomi. E pour sitwayen epanouir pour byennet nou nasyon.

Lanfaz Bidze 2022 ti osi lo sa bann sekter swivan.

Tourizm, lagrikiltir, lapes avek lekonomi ble, lekonomi nimerik e finansyel.

An 2023 dan trwazyenm Bidze, a en som R10 bilyon, latansyon ti lo en seri mezir pou anmenn sipor e soulazman pour Seselwa swivan bann defi ekonomik dir ki nou ti'n pas atraver an 2021 e 2022.

Pli enteresan avek sa bann mezir sete distribisyon fri travay dir tou dimoun parmi bann ki ti merite. E pou fer li posib pour Gouvernman kontinyen envestir dan lenfrastriktir sosyal pour benefis nou pep e kontiny devlopman pei.

Bann mezir sosyal ti enkli tou travayer sekter piblik ti ganny en logmantasyon 10poursan dan zot saler de baz. Ti annan mezir tanporer *maximum* R500 pou siport bann ki saler i pli ba. R17.9 milyon pour programm goute dan lekol primer e segonder. R20.1 milyon pour programm dezennen. R205.1 milyon pou anvoy 2 group etidyan ki ti'n kalifye an 2020 e 2021 pour en labours al zot letid aletranze.

Logmantasyon
10poursan dan *stipends* bann etidyan dan 17 pei aletranze. R2.5 milyon pour bann etidyan Liniversite Sesel. En logmantasyon 10 poursan dan zot *allowance. Educational Loan Scheme* ti ganny

entrodwir. R11.8 milyon ti ganny mete dan *Scheme Home Improvement and Re-roofing*.

R5 milyon ti ganny mete dan *scheme part rental*. En sonm R1.18 bilyon ti ganny mete de kote pour bann proze lenfrastriktir. E 27.6 poursan sa lenvestisman total ti pour bann proze later avek lakaz ki reprezant plis ki R389.4 milyon. E ti annan restriktirasyon dan kondisyon travay bann *carers*, e osi *cleaners corporate*.

Mr Speaker, nou ankor lo nou traze transformasyon. I en long parkour. Nou pa pou perdi nou sans direksyon malgre tou lesey lopozisyon pou met nou retar dan sa travay irzan ki annan devan nou. Nou refize ganny distrakte par preokipasyon lopozisyon pou anmenn politik dan tou keksoz.

Nou pa dekouraze par labsans en lopozisyon konstriktiv dan rekonstriksyon nou pei. Nou fason travay i kler. Responsabilite, disiplin e desizyon desiziv dan byennet nou pep.

An 2024 pour nou katriyem Bidze pour en sonm R10.6 bilyon, i kontinyasyon programm lonterm sa ladministrasyon pou amelyor sityasyon sosyal e ekonomik Sesel e son pep. Lanfaz i lo

bann Polisi ki a ede transform lekonomi e kree plis larises.

Gouvernman in osi anons revizyon dan 7 programm benefis sosyal ki tonm anba responsabilite lazans proteksyon sosyal ASP, enkli en novo benefis ki pou pran lefe apartir Zanvye 2024.

Sa 4 Bidze ansanm i konkretiz dan sa 3 tenm ki Dirizan Zafer Gouvernman in koz lo la yer e sa se :

- 1.** Kree plis larises dan en fason ki nou annan plis larzan pou administre pei e partaz avek popilasyon.
- 2.** Rekonnet nou vulnerabilite e batir rezilyans a bann sok domestik e eksteryer.
- 3.** Amelyor lenfrastriktir nou pei, e siport rezim sosyal pour popilasyon pou ki personn pa ganny kit deryer.

Alor ou konpran ser avek frer Seselwa. Pandan sa dernyen 3 an, depandan lo mwayen e resours ki pei in annan, diferan kous nou sisyete in ganny en benefis direk anba sak sa bann Bidze ki Minis Hassan in prezante devan sa Lasanble.

Sa i en fe ki lopozisyon pou refize dir ou. Ozordi nou annan en Gouvernman ki pe travay pou batir rezilyans nou lekonomi e en nasyon

responsab. Sa i en realite ki lopozisyon pou kasyet ou.

Lo sa *note* mon zwenn Prezidan Wavel Ramkalawan dan son lapel ki i ti fer dan *mini rally LDS*, Marie-Jeanne Estate, Baie Ste Anne, Sanmdi pase. Letan i ti demann tou Seselwa pou aret viv dan negativite.

Pour sakenn de nou realiz difikilte ki non selman nou pei, me ki lemonn pe pas atraver. E pour sakenn pran son responsabilite. Ki ou en etidyan lekol ouswa ou sa pansiyoner ki lo retret. Ou annan en rol pou kontribye e fer Sesel monte.

Par egzanp Mr Speaker, letan Minis Hassan dan son diskour Vandredi i dir e mon site ‘alors mon pe demann tou travayer servis publik pou *perform* a en oter ki pou ed lekonomi agrandi plis’. I pa pe donn ou lord. Sa i en lapel pour plis responsabilite e volonte pou deservi ou pei, ki dan *manifesto LDS*.

Letan ou pran konsyans ki en keksoz i pour ou, ou pou pran swen avek li e ou pou protez li. E asire ki ou ganny benefis *maximum* avek li. Lo sa *note* Mr Speaker, mon oule regard serten lanons spesifik dan Bidze 2024.

Avek bi ki zabitant mon distrik i kapab vwar e apresye ki mannyer sakenn de zot, sirtou bann fanmir kot sak

manm pe leve e debourye, i devret vwar zot pe ganny pran swen avek dan sa Bidze.

La mon oule dir san rezervasyon ki mon siport *Appropriation Act, 2024* akoz i pou benefisye tou zabitant Mont Buxton. Sa Bidze i en dokiman entelizan e i en plan ekitab ki pou permet Sesel navig en lekonomi global enserten. I protez progre ki ladministrasyon Prezidan Ramkalawan in fer pou siport e kree loportinite ekonomik pour sekter prive.

Sa Bidze pe osi envestir dan lazenes e zot lavenir avek en nivo lenvestisman istorik dan sekter ledikasyon, sirtou dan swen Petit Anfans lekol leta e pour letid avanse.

Bidze 2024 i protez progre ki nou'n fer depi 2021 san koup larzan dan okenn programm. E osi napa okenn nouvo *tax* ki'n ganny entrodwir. An realite, depi nou o pouvwar an Oktob 2020, zanmen nou'n entrodwir okenn nouvo *tax* lo Seselwa.

I kontinyen envestir dan ledikasyon, lasante, lozman, zesyon salte, lagrikiltir avek lapes e lord e sekirite dan pei. Ki bann servis de baz nou bezwen dan nou lavi toulezour koman sitwayen dan en leta efektiv.

I kontinyen nou langazman ver en Bidze responsab kot par egzanp

nou'n kapab anmas 13poursan dan koleksyon tax, ouswa R1.1 bilyon an plis ki lannen 2022. Sa i vedir ki pei i dan en pozisyon pou asir serten lenvestisman dan en letan ekonomik enserten.

Sa bann lenvestisman swivan dan Bidze 2024 pou direkteman benefisyé zabitant Mont Buxton. Dabor mon ava koz lo ledikasyon. Atraver konstriksyon e renovasyon nouvo blok lekol primer La Rosiere, en sonm R18.2 milyon an total. Sa i lekol ki pe ganny plis lenvestisman sorti direk dan Bidze. Renovasyon lekol Belonie e osi Lekol La Rivière Anglaise kot zanfan Mont Buxton osi al lekol, R4.5 milyon.

En sonm R5 milyon pour *Laptop Scheme* bann marmay P5 e P6. An tou i annan 250 zanfan lekol La Rosiere. Si paran sak sa bann zanfan i rod lasistans anba sa *scheme*, i annan en total R750 mil pour zot dan sa Bidze.

Kot lekol Belonie sa lannen, en senkantenn paran in profit sa loportinite pour zot zanfan. En sonm R41.1 milyon in bidzete pou pey gadyak e osi dezennen pour zanfan P1 ziska S5.

Koman en Dirizan responsab, mon fer en lapel avek paran pou ankouraz zot zanfan an servi sa servis zot pe ganny ofer. Se sa ki nou merit

fer, olye al koz lalang ki zanfan pe dormi vant vid dan rali politik.

(APPLAUSE)

HON GERVAIS HENRIE

Mon pe dir sa Mr Speaker, akoz parmi tou sa zanfan segonder lekol Belonie, selman 82 zot ki'n anrezistre pou pran *breakfast*. Me zis en 12enn ki pran regilyerman. Pour dezennen parmi sa 48 ki'n anrezistre, selman 5 ki partisipe anba sa programm peye atraver *Dedicated Fund*.

Lekol La Rivière Anglaise, menm zafer kot selman 26 ki pe pran *breakfast* e 9 dezennen. Loportinite i la zanfan, profite. Ler ou mazinen ki i annan 1047 etidyan zis dan lekol La Rosiere. Eski ou kapab apresye konbyen fanmir Seselwa pe benefisyé dan sa Bidze?

Koman en dirizan responsab, mon oule denons fortman sa sityasyon kot zanfan ki zot paran i *afford* pou donn zot larzan pou aste manze dan *tuckshop*, i sikann zot kanmarad ki manz kot lekol, parey nou dir. Sa konportman pa akseptab. Alor reflesir byen lo ki ou dir avek ou pti kanmarad, ki li osi i bezwen manze.

Lasistans sosyal; Dan domenn sosyal atraver Lazans

Proteksyon Sosyal, sa bann sonm swivan in ganny peye avek bann zabitan Mont Buxton depi Zanvye ziska Septanm 2023.

Benefis orfelen R4 mil 220. *Foster care* R117 mil. Benefis pour semi orfelen R273 mil. Benefis envalidite R2 milyon 87 mil 250. Benefis dezabilite R4 milyon 686 mil 250. *Allowance pour carers* R8 milyon 192 mil 762.62 sou. Benefis retret R18 milyon 440 mil 250.

Zis an term bann lasistans sosyal depi Zanvye ziska Septanm 2023, Gouvernman in pey R33 milyon 801 mil 132.62 sou dan distrik Mont Buxton. E an 2024 sa sif pou monte baze lo bann logmantasyon ki'n ganny anonse.

Alor ki mannyer koman en Dirizan responsab mon pou kapab kit mon lanmen anba letan ler pour Lasanble vot lo *Third Reading Appropriation Bill?* Par kont, vey lot kote latab byen.

Lozman. Menm ler napa proze lakaz ki'n anonse pour distrik Mont Buxton ziska apre 2026, mon rekonnet ki Gouvernman pe ofer omwen 6 diferan prodwi konsernan lakaz a en kou 55 milyon, kot bann zabitan pou benefisyen.

Bann group ki pou kapab benefisyen i bann pansiyoner. Bann travayer ki pe ganny

ziska R30 mil par mwan e oule pret larzan avek labank pou konstrir zot lakaz. Bann ki pe lwe lakaz e bezwen led pou peye.

Bann ki vilnerab e pa kapab pey reparasyon zot lakaz. Bann endividé ki kalifye sonm – ki plito pa kalifye sonm total pri konstriksyon zot lakaz. E Minis in osi anonse ki apartir lannen prosen *HFC* pou al revwar son bann prodwi pou reflekte larealite ozordi.

Mon konsyan defi mank teren ki annan Mont Buxton pou konstrir. Me lefe ki i annan 2 proze dan plan. Enn Lari Angar lo *parcel V21078*. E Mont Sinal kot en morso 1750 met kare in ganny idantifye. E lefe ki dernyen proze lakaz dan distrik Mont Buxton ti an 2017. Tour Mont Buxton in arive.

Avek en total 111 aplikan lo lalis lakaz ki enkli demann pour *housing assistance*, 80. *Mid-Range Condo*, 11. *Second housing loan*, 9. *Housing loan*, 6. *E luxury apartment*, 5. San oubliy sa 85 aplikasyon pour en morso later *land bank*. E sa 55 lezot laplikasyon later ki zot bann dokiman pa ankor finalize.

Mon lans en lapel avek Minister Later avek Lakaz pou ankor enn fwa etidye posibilité en proze *public private partnership* dan distrik. Sirtou lo bann kare later ki dimoun

pe ofer Gouvernman pou aste koman en proze lakaz.

Bann lezot benefis Mr Speaker. Koman en Dirizan responsab, i enportan ki nou regard sa Bidze de pre. Analiz li, depouy li e vwar kote ankor nou kapab tir benefis ladan pour bann zabitant ki nou reprezante.

Dan ka Mont Buxton, mon'n fini komans apros bann MDAs konsernan diferan keksoz pour nou vwar. Par egzanp ki mannyer distrik i kapab benefisyen anba sa alokasyon R1.5 milyon pour renovasyon lezot fasilitate sportif.

Ki mannyer distrik i kapab benefisyen dan sa alokasyon R10 milyon pour travay semen segonder e osi drenaz. E ki mannyer distrik i kapab benefisyen avek alokasyon R7.7 milyon pour lalimyer lo semen, enstal *crash barriers* e met koltar eksetera.

Sa i mon devouman pour mon distrik ki'n elekte mwan. Se pou travay e rod rezulta. Me non pa konplent e vwar problem partou kote. An parlan travay dan distrik Mr Speaker, pandan sa dernyen 34 mwan in annan 9 proze kominoter. Prensipalman bann semen pyeton segonder ki'n konplete dan distrik Mont Buxton, a en sonm R1 milyon 680 mil.

Kot Gouvernman pa'n kapab fer atraver Lasosyasyon Mont Buxton *Community Association*, nou'n konstrir *bus shelter, bin site*. Enstal *bus stop benches*. Met lansenny pou endik direksyon dan distrik e konstrir bann pti zarden piblik.

Nou pe osi travay lo plan reabilit bann *hike trails* e donn tou semen e sante en non dan distrik. Sa i form parti kiltir ki nou kapab fer pour nou pei. Olye demande ki nou pei i kapab fer pour nou. I annan ankor travay pou fer e lenvitasyon i touzour reste ouver pour tou zabitant Mont Buxton vin zwenn nou pour lanmour nou kominote.

I reste nou ankor pou fer akoz defi ki nou kontinyen fer fas avek koman en sosyete. E Bidze 2024 pa'n kapab inyor sa. Si nou zis fer en letour dan bann alokasyon, nou vwar larzan pe ganny mete pour konstriksyon *halfway home* akoz problem vyolans domestik.

Sant rezidansyel pour zenn ki annan move konportman. Prizon pour bann zenn kondannen. Sant reabilitasyon pour bann adikt lo Mahe e Praslin. Konmsi sa pa ase? La, La Digue pe rod sa ki pour li e prizon ot sekirite.

Tousala i bann lenfrastriktir pou adres bann konportman delenkan parmi

zanfan ziska adilt ki pe kout *taxpayers* Seselwa R38.2 milyon an 2024. Me pli gro defi ki pe regard nou lizye blan, e ki to ou tar nou bezwen koz lo la, se benefis retret.

Pour 2023 i pou kout pei R840 milyon 327 mil. Sa sonm pe monte an 2024 pou ariv R868 milyon 358 mil. Soustenabilite sa fon i bezwen ganny adrese. US i krwar i kapab fer desann laz panson e an menm tan fer monte sa benefis. Koze avek aksyon i de. Fodre zans la i pratik *voodoo* pou reisi dan sa demars.

(APPLAUSE)

HON GERVAIS HENRIE

Letan nou vvar Mr Speaker, ki benefis retret pe manz 2 tyer sonm total ki pei pe ranmase atraver *tax* lo saler ki apepre R1.2 bilyon, gras a lakantite travayer etranze ki i annan dan bann aktivite ekonomik lokalman. Mon vvar nou pe diriz ver presipis. E fodre nou sanz direksyon.

Mr Speaker, pandan sa dernyen 3 an ki Gouvernman *LDS* ti pe sakrifye sonmey pour ki nou pei i kapab navig sa bann tirbilans ekonomik. Nou'n fer li nou tousel. E ozordi fas a bann defi tel parey mon'n mansyonn 2, *LDS* i bezwen vin avek solisyon li tousel. Menm ler nou pa anvi. Akoz i konsern tou Seselwa.

Pandan sa dernyen 3 an, nou'n tir valer nou Roupi kont Dolar Ameriken sorti R22 pou ariv R14 nou tousel. Nou'n al rod vaksen kont *COVID-19* pou permet pei reouver nou tousel. Nou'n trouv R207 milyon 302 mil koman sibvansyon pour *Air Seychelles* dan Bidze 2022. E permet nou laliny aeryen anvole e sov travay plis ki 500 Seselwa nou tousel. Anba *LDS* sa pei pa'n koule e nou'n fer li nou tousel.

(APPLAUSE)

HON GERVAIS HENRIE

Lopozisyon li zis in kritike. Fer *press conference* e programm politik lo televizyon. *Hire a crowd* pou fer lamars lari bazar. Regroupe kot Lakour e *walkout* dan Lasamble.

Ou a rapel ki pour Bidze 2021 Dirizan parti minoriter ti dir Bidze napa ase sibstans. Pour 2022 i ti dir i ranpli avek tro bokou zoli keksoz pour larealite. Pour 2023 i ti akiz Minis Hassan konmkwa i pe fer *damage control*. Pour 2024 i dir ki mazorite Seselwa i tre dezapwente.

Dezapwent kwa? Dezapwente akoz i annan saler 10 mil 500 travayer servis piblik ladan pour en sonm R1 bilyon 874 mil 756?

(APPLAUSE)

HON GERVAIS HENRIE

Dezapwente akoz i enkli R990 milyon pour saler bann profesyonnel lasante?

Dezapwente akoz i enkli R586 milyon pour saler bann profesyonnel ledikasyon?

Dezapwente akoz i enkli R375 milyon pour saler bann zofisyen lapolis, servis swen e sovtaz?

Dezapwente akoz i enkli R190 milyon pour saler bann zofisyen militer?

Dezapwente akoz i enkli plis ki R200 milyon pou administre labours bann etidyan aletranze?

Dezapwente akoz i enkli plis ki R760 milyon pour servis lasante spesyalize?

Dezapwente akoz i enkli plis ki R860 milyon pour benefis retret?

Dezapwente akoz an Zanvye 2024 pou annan revizyon lo tax, lo bonous e bann saler ki ganny peye lo en baz performans anyel?

Dezapwente akoz en serten poursantaz egzanpsyon tax lo pansyon volonter ki anplwaye i kontribye pour son travayer? Sa 2 mezir pou benefisyen. Zis sa 2 mezir tousel pou benefisyen bokou parmi sa 35 mil 755 travayer dan sekter prive.

Si sa pa alaoter e legzizans pep Seselwa, mon

challenge parti minoriter pou dir nou kwa ki pou satisfier zot.

Mr Speaker, nou tou nou annan en rol pou zwe lo sa bato ki apel Sesel pandan sa traze transformasyon. E dan sa rol nou bezwen egzers responsabilite. Nou pa kapab koman dirizan minoriter fer krwar ki viziter pe kennsel vakans Sesel par grap.

Letan sif ofisyel pibliye par Biro Statistik Nasional i montre ki ziska le 5 Novanm, in annan en logmantasyon 2poursan dan lakantite viziter ki'n debark Sesel. Konpare avek karannkattriyenm semenn an 2022. Me pa se tou.

Ziska la 152 mil 715 touris an plis in debarke isi, konpare avek menm peryod an 2021. E 10 mil 473 touris an plis ki menm peryod an 2022. Ouswa 4poursan an plis ki *year on year arrival figures*.

Sa menm Onorab i fer Lepep Seselwa krwar ki Minis Lanplwa pa pe koz laverite an sa ki konsern to lanplwa dan pei. Pourtan statistik i montre ki dan dezyenm kar 2023 in annan en logmantasyon 4.2poursan dan lakantite dimoun dan Lanplwa. Kot sekter prive ti'n anploy 1904 travayer an plis konpare avek menm peryod lannen pase.

Sa menm Onorab i fer nou krwar ki lenvestisman dan sekter lapes pa pe bouz

ditou. Pourtan dan son diskour, Minis in dir ki sekter semi endistriyel pou rikord en krwasans 5poursan an 2023.

An sa ki konsern lenvestisman dan sa sekter, an Zilyet sa lannen Labank Devlopman Sesel fek pe envit envestiser pou pran *loan* anba *blue investment Fund* ant \$10 mil a 3 milyon a en to lentere selman 4poursan.

Bidze Mr Speaker, i en *feuille de route* pou anmenn devlopman dan nenport pei. I nou devwar koman bann Dirizan responsab pou koz laverite e gid nou pep lo sa traze transformasyon.

Ler parti minoriter i vwar i pa pou kapab, zot sanz fason e fer kalonmni lo nou. Ler zot dir nou pe regrese, Lanbasad Ameriken i re ouver son laport Sesel.

(APPLAUSE)

HON GERVAIS HENRIE

Ler zot dir nou pe mars an aryer parey kanmaron, Labank Mondyal i klasifye Sesel koman nasyon pli prospere anba rezyon Sid Sahara.

(APPLAUSE)

HON GERVAIS HENRIE

Ler zot dir zot pa mefye nou, Sesel i gard son premye plas parmi tou pei Afriken lo

lendeks persepsyon koripsyon.

(APPLAUSE)

HON GERVAIS HENRIE

Ler zot dir nou'n *intellectually spent*, Sesel i sorti dezyenm lo *MO Ibrahim Index*.

(APPLAUSE)

HON GERVAIS HENRIE

Ler zot dir nou en Gouvernman fatige, Sesel i vin premye e le sel pei Afriken pou akonplir lobzektif *UNESCO's Education for all*.

(APPLAUSE)

HON GERVAIS HENRIE

E ler zot akiz nou konmkwa nou pe fer plan vol eleksyon 2025, Sesel i ganny dekrir koman le sel demokrasi liberal dan rezyon Sid Sahara par rapor demokrasi.

(APPLAUSE)

HON GERVAIS HENRIE

An konklyzon Mr Speaker, sa ki Lepep Seselwa i bezwen rekonforte avek se fason travay Gouvernman LDS. I se ki nou pe asire ki Bidze i vin soutenab. Nou pe asire ki gaspiyaz dan Gouvernman i ganny eliminien. Ki depans i redwir. Ki labi avek koripsyon i ganny eliminien.

Sa ki swiv travay Lasanble i kapab konstate ki mannyer apenn si Komite FPAC i annan travay parey dan sizyem Lasanble. Pran legzang rapor oditer lo zeson *COVID Relief Fund*. Napa en mous vole dan kan parti minoriter lo la, konpare avek zeson *scheme FA4JR*.

Mr Speaker, pour lenformasyon piblik, en sonm R79 milyon 243 mil 551. Parmi lekel kontribisyon an Roupi par bann biznes e endividé Seselwa. Dan sa letan ki US pe dir dimoun pe soufer, ti kontribye R49 milyon 868 mil 558. E nou LDS nou ti fer en kontribisyon nou *Caucus* R100 mil dan sa Fon.

(APPLAUSE)

HON GERVAIS HENRIE

Me pli enportan, nou pe pouse ki depandans lo Leta i redwir. E pou pran letan pour sa materyalize. I pa pou vin ni 3 zour, 3 semenn, 3 mwan ou 3 an. Me nou determinen pou reisi.

Nou lo sa kote latab nou determinen pou donn en koudmen. Pou fer sa arive e nou pe envit tou Seselwa pou zwenn nou lo sa traze transformasyon, senpleman akoz Sesel i pour tou son zanfan. Kan nou reisir nou pou annan rezon pou selebre.

Mr Speaker, pli boner dan Lasanble atraver lenthervansyon en *MNA US*, sa parti in montre son vre kouler. Kot zot vanze, rankinen, konport zot senpleman parey bann move dimoun. Pou atak Onorab Naddy Zialor personnelman koumsa, akoz in sorti dan zot parti. E dekrir li engras *was uncalled for!*

(APPLAUSE)

HON GERVAIS HENRIE

Koman bann Dirizan responsab. Koman bann Dirizan responsab nou bezwen aksepte. Si en endividé son lizye in ouver, i rezet prensip e sistèm en parti akoz i nepli krwar ki li son fanmir e son pei pe benefisyé dan fason ki sa parti pe diriz zot lekor. I lib pou swazir.

Mon pa kapab remontrans li si demen i swazir pour li kit *LDS*, akoz i lib pour li fer sa. In kit *US* akoz i ti nepli kapab toler faver spesyal pour en pti group elit. Mr Speaker, atraver ou mon dir avek Onorab Zialor, *I stand strong with you my brother* e mon promet ou...

(APPLAUSE)

HON GERVAIS HENRIE

Mon promet ou ki dan *LDS* napa bann move dimoun koumsa. Mr Speaker,

malerezman lot kote latab anba direksyon bann *megalomaniacs*, zot in pri dan negativite.

Zot annan en lobsesyon avek pouvwar. Zot pa oule aksepte desizyon ki Lepep Seselwa dan son gran mazorite ti fer le – an Oktob 2020. Pou balans zot dan *bin* listwar. E zot in vin *addict* avek eleksyon.

Zot napa en sou lide Polisi, plan en programm pou avans Sesel devan apard zis kriy tir li. Mwan mon pe dir zot aprann espere.

Nek an 2025 ki alokasyon bidzeter R18 milyon pe ganny prevwar dan dokiman Bidze pour eleksyon zeneral. Si zot pa kapab espere, al rod sa 80poursan solda ki zot dir i siport zot la, vin fer koudeta ankor. Zis seye zot!

(APPLAUSE)

HON GERVAIS HENRIE

An terminan Mr Speaker...

MR SPEAKER

Wi, Onorab. Ou ti pe terminen? 30 minit.

HON GERVAIS HENRIE

An terminan, mon remersi tou dimoun ki'n travay a kote mwan an komanse par ou menm Mr Speaker. Bann *staff* dan mon lofis Deputy Speaker

e MNA Mont Buxton. Bann travayer ladministrasyon distrik. Sekretarya Lasanble Nasional. Tou aktivis, siporter LDS.

Travayer ladministrasyon distrik, zabitant Mont Buxton e tou dimoun san eksepsyon ki'n kolabor avek mwan dan en fason ou en lot. Sirtou bann travayer dan servis piblik. Mersi zot tou. Nou pa pou... ?

All LDS MEMBERS

Zanmen les tonbe!

HON GERVAIS HENRIE

Mersi Mr Speaker.

(APPLAUSE)

MR SPEAKER

Ok. Mon konnen i tar. Lazournen in long. Nou a pran nou dernyen entervansyon pour ozordi. Onorab Egbert Aglae, mon donn ou laparol.

HON EGBERT AGLAE

Mersi Mr Speaker. Bonn apre midi *Minister* e tou bann dimoun ki a lekout.

Mr Speaker avan mon konmans mon lentervansyon lo Bidze 2024, mon le dir poudir mon apresye ki entervenan ki'n koz avan mwan in ganny sa kouraz e lasazes pou ekrir son prop *speech* li menm.

(APPLAUSE)

HON EGBERT AGLAE

Mon le dir entervenan ki'n koz avan mwan Mr Speaker, ki nou lo sa kote latab nou pa bann *yes man*. Kot i byen nou pou dir. Kot i mal osi nou pou dir.

(APPLAUSE)

HON EGBERT AGLAE

E mon le dir osi Mr Speaker, atraver ou, ki mon'n ekout Onorab Bistoquet atantivman lo son bann *speech* kot in koz lo Minister Lasante. E mon ti a swete Mr Speaker, si zot ti kapab donn Onorab Bistoquet en plas dan lasante akoz 2025, Onorab Gabriel pou *shower* li.

(APPLAUSE)

(laughter)

HON EGBERT AGLAE

Mr Speaker, zabitian Port Glaud ki a lekout, zanmen mon ti krwar ki ozordi pou annan 2 Sesel. En Sesel kot serten i vwar tou keksoz i byen e an roz. Tou loportinite i pour zot. Tou laport ki zot tape i ouver. E zot dan en gran lazwa de viv konpare ek en lot Sesel kot lamazorite pe viv dan en depresyon. Mazorite pe viv dan en kalite stres lavi. Kot

presyon lavi in vin en routin e en lanmertim.

Ozordi enn sa bann realite Sesel se ki bokou Seselwa i dan difikilte. Plizyer fanmir pa pe kapab fer 2 bout zwenn. Plizyer manman e papa tou le zour pe kalkile ki pou met dan kastrol e lasyet zot zanfan. Ki mannyer pou *top up* zot kart bis SPTC. Ki pou met dan sak zot zanfan pou al lekol.

Plizyer pe priye pour PUC pa vin koup zot delo e kouran akoz in kapab pey zis en bout, akoz Bidze pa pe balanse. Plizyer pe travay zis pou pey det ki'n fer mwan o paravan, akoz prete pour zot aziste. La kredi kot malbar in double. Sa ki son biznes pe zis tenir a laflot zis pou kapab pey en *rental* ouswa son *loan*. Sa ki labank i deryer zot ouswa pe tir lo zot *guarantor*.

Sa ki son byen in ganny sezi ouswa son byen bezwen pe vann son bann *asset* pour li kapab *manage* son det. Sa ki pe kasyet son *landlord* tou le lafen dimwan apre ki in anvoy demen tanto, akoz larzan *rent* pa ankor pare ouswa pa ase pou aziste.

Mr Speaker, sa i en realite finansyel pour bokou ki bezwen pran *loan* pou al get son lasante pli devan, akoz in perdi konfyans dan sa sistem lasante. Sa ki pe bezwen pey *carer* dan son pos akoz son

gran paran pa'n kalifye, menm si i merite. Sa ki bezwen kit son lanplwa formel pou reste e ed son gran paran. E konpromiz son rev lavi akoz i bezwen aksepte en saler pli ba zis pour lanmour reste avek son paran e okip li.

Mr Speaker, sa realite ki bokou pe viv ladan ozordi, ki plizer pe tap laport kanmarad menm avan milye le mwan pou rod prete en latet zonnyon, en pe bouyon pou kapab nouri son fanmir.

Ozordi bokou i dezapwente ek sa sanzman ki zot ti pe rode. Bokou zot lekspektasyon se plis larzan dan zot pos. Sa pansiyoner ki ti ganny dir pou ganny R10mil. E ozordi zot ankor pe espere. An menm tan, plizer pe kit sa later avek en rev, ek en promes bat latet.

Mr Speaker, koze la deor, Seselwa i dir non. Non ankor dan sa pirog nanm.

(APPLAUSE)

HON EGBERT AGLAE

Plizer Seselwa ozordi i konpar lepase e ozordi, e bokou in vwar e konpran ki parti SPPF, Lepep, US ti en Gouvernman ki ti annan konpasyon. En Gouvernman ki ti ekout son pep letan zot ti anvoy lavwa. Me byensir pa tou ki ti satisfe. Me la ozordi zot pe vwar zot menm pe ganny en move sibir.

Mr Speaker, dan lepase anba sa parti ki mon ankor pe siporte, mon'n temwanny plizer benefis akoz nou ti en Gouvernman sosyalis konpare ek enn ozordi kot nou annan en Gouvernman liberal ki tradwir bef dan disab, sakenn vey son lizye. *Survival of the fittest*, kot gro pwason pe manz pti pwason par grap.

Mr Speaker, avek tou sa laport ki LDS ti deside fermen ler zot in vin o pouvwar, la zot pe sey ouver sa bann laport avan eleksyon ki vreman pros. Me sa pep Seselwa ki ti deside tir US, in fini vwar zot kler. E plizer zot pe anvoy LDS merd.

(APPLAUSE)

HON EGBERT AGLAE

Me mwan. Mr Speaker, mon pa donn zot tor. E mon konpran ler zot dir zot nepli enterese e zot in ganny ase.

Mr Speaker, nivo konplent e lanmertim ozordi an sa ki konsern servis piblik i enkrwayab. Dimoun pe kontinyen vir an ron, ennler ou a krwar zot toupi. Sey al lopital pou zot ganny zot lasante, menm problem.

Latizann ki napa. Napa ase dokter. Ners i fristre. Dokter pe kit par grap pou al dan prive. Ners menm, menm zafer menm. E bann zenn pa neseserman *look forward* pou

al pran en karyer dan lasante ozordi.

Be sa Mr Speaker, pa *text* lespri sa Gouvernman ki i annan en gro problem *somewhere, somehow?* Olye Minis ki vin isi dan Lasanble pou li ganny kouver par zot parti mazorite. Tasyon mon dir. Tasyon zot mazorite i kapab fer zot prop *downfall*.

Mr Speaker, sa ki mon konnen, zot pe blannm *US* pour zot inefikasite, me sa pa pou anmenn zot okenn par. Mr Speaker, Gouvernman *LDS* i sitan ambisyé pou konstrir en nouveau lopital. E plizyer dimoun i dir ou nouveau lopital pa pou rezourd sa bann problem lasante.

Si ou napa ase *staff* medikal, ou napa ase dokter, ou napa ase ners, ou napa ase farmasyen. Teknisyen laboratwar, asistan ners, drayver. Lanbilans ki napa. *Porter*. Ki mannyer ou pou al *run* en pli gran lopital?

Bokou i swete vvar en sanzman dan *management* lopital akoz i paret zot pa pe tande. E plizyer travayer lasante i krwar ki dan modernizasyon sa lopital ki nou deza annan ozordi.

Zot pe demande ki i annan plis lenvestisman dan lekipman modern. Aste plis lanbilans de kalite de baz. E lanbilans baze lo kondisyon semen e teren Sesel. Envestir

dan nou nouveau *lift* e lekipman pli spesyalize. E pli enportan, pey nou bann *staff* lasante pli byen e zot a reste.

(APPLAUSE)

HON EGBERT AGLAE

Aret vin dir nou zot pe ankor pe travay lo *scheme* lannen apre lannen. Silvouple, enplimant sa ki zot ti promet Seselwa.

Mr Speaker, Gouvernman *LDS* in dir nou lekonomi pe fer byen. Be si lekonomi pe fer si byen, akoz ki zot le touy sa *golden goose* ki *lay* sa *golden eggs* atraver plis *levy* ki zot pe mete? E vwala ozordi nou'n vvar sa dan domenn *tourism* Mr Speaker.

E osi sa rezulta ki zot in enplimante, nou pe vvar plis ki 6 poursan dan reveni ki sorti *tourism*. E ozordi nou pe vvar bokou *cancellation* ki pe ganny arive. E sa pe afekte bokou biznes ki dan sa sekter. Sa i relye direkteman avek move desizyon ki zot ti'n pran pou met bann *levy*.

E la Mr Speaker, i annan letablisman touristik ankor pe kalkile si zot pou kontinyen ouswa zot pou bezwen *lay off* zot *work force*.

Mr Speaker, eski ti neseser entrodwir en nouveau *tourism levy* dan sa moman kritik kot lemonn pe rekipere

ek lefe advers pandan pandemik COVID? Non, i montre en Gouvernman ki pa konnen ki pe fer. Ouswa en Gouvernman ki larzan i pas avan byennet son pep.

Si ou vwar ozordi *taxis driver* i anger ek bann DMC, anger ek *omnibus operators*, se akoz sa Gouvernman liberal kapitalis i mazin zis bann gro pwason. Zot bann gro zanmi. E zot napa en sou konpasyon pour bann *taxis driver* ki pe ganny afekte. E serten in deza konmans al antre dan lezot biznes.

Eski ozordi zot in nepli bezwen sa *taxis driver* parey zot ti servi sa bann dimoun pou maltret nou bann ansyen Prezidan ek nou Gouvernman? Sa ki mwan mon konnen se ki nou bann operater ti ganny ekoute dan lepase. E nou koman en parti, nou'n pare pou ekout zot apre 2025. Nou pei pou bezwen annan en Polisi kler kot i konsern tou bann akter dan domenn touristik. E sakenn a benefisyé.

Mr Speaker, ladres Bidze ankor enn fwa i montre ki sa Gouvernman napa en plan diversifikasyon lekonomi. I annan dimoun pe demande oli proze biznes bat kannel? Se pourtan zot ti'n vwar sa i bon pour Seselwa envestir ladan. Akoz ki Seselwa li i pa pou kapab envestir dan son lor

ble? Be les mwan *remind* zot se ki sa lekonomi ki zot in erite ki ti pe fer vreman byen zis avan COVID. Se 43 an travay SPPF, Lepep, US.

(APPLAUSE)

HON EGBERT AGLAE

Zot in ganny sa pei lo en plato ki tou striktir ti an plas. E avan 2019, *World Bank* ek *IMF* in dir klerman ki Sesel ti lo son *peak ekonomik*. Se gras a COVID ki i ti fer nou desann.

Mr Speaker, sa ki mon konstate ptitapti par mank vizyon e mank *leadership*. E mon pa vwar naryen de novo ki zot pe anmenn dan sa lekonomi. Nou Sesel nou konnen poudir dan nou letan, lotel plizyer ti ganny konstrir. Konblaz nou'n konstrir. *Industrial Zone*, nou ki'n konstrir.

Roche Caiman Vilaz e Eden Island, dan nou letan ki'n ganny batir. Perseverans, nou ki'n konstrir. La isi kot sa Lasanble i ete kot Zidisyer, nou ki'n konstrir. *Stadium*, *Palais des Sports*, nou ki'n konstrir. Erport Praslin, nou ki'n konstrir.

(Interruption)

HON EGBERT AGLAE

Por, ki zot pe selebre. Por. Por ti nou plan e por nou ki ti pe al agrandi. Tou sa bann

housing estate ki zot al fer kanpanny ladan dan Sanmdi, nou ki'n konstrir.

(APPLAUSE)

HON EGBERT AGLAE

Plizyer *network* semen ki ariv devan laport preski tou dimoun, nou ki'n konstrir.

Ki zot, zot in fer Mr Speaker? Mr Speaker mon'n war zot, zot in konstrir 35 pti lakaz ki dimoun i apel pti lakaz lapen laba Perseverans. E zot pe pase, zot pe fer *maintenance*. E se sa ki nou apel zot en Gouvernman *maintenance*. Ki fer plan apre plan.

(APPLAUSE)

HON EGBERT AGLAE

Zot pe koz gro labous lo Lopital La Digue. *State of the art equipment*. Selman yer enn nou ser Seselwa in perdi son lavi dan pe esper lasistans medikal pou vin Mahe. Mwan mon krwar Minister Lasante, Minis Lasante 2024 i bezwen pran li en desizyon.

Mr Speaker atraver ou, yer an ekoutan Onorab Georges ek lesey diviz nou dan *Caucus US*. I dir ki nou, nou en parti ki zis donnen, donnen. Me mwan mon dir li ki son Gouvernman *LDS* i le zis pran, pran, pran.

(APPLAUSE)

HON EGBERT AGLAE

Zot le zis pran, pran parey bann kolonizater lontan. Ler dile in fini ek bef aprezan zot le tir ek park.

(APPLAUSE)

HON EGBERT AGLAE

Zot in anmenn sa pep Seselwa ozordi ki fer *saving* pour zot, le fitir in vin zis en rev. Pep Seselwa, asize analize pour zot menm. Pourtan se zot *manifesto* ki ti dir met larzan dan pos Seselwa. Zot pou sekwe pye, koko pou tonbe. Me sa ki mwan mon konnen, bokou in ganny mete lo en *bus stop* kot bis pa pase.

Sa ki mon konnen se ki zot in met larzan dan pos zot bann gran dalon akoz i annan ki dan pozisyon kle ozordi ki'n dir i pe vin pran sa ki i ti sponsor, e sa ki zot ti promet li.

(APPLAUSE)

HON EGBERT AGLAE

Wi Seselwa! Wi Seselwa, larzan pe antre dan pos, me pa dan ou pos. Reflesir pour zot menm. Mr Speaker, *les fame STC* ki sipoze akter kle dan fer desann kou lavi. Be ki nou pe vwar ozordi? STC i al antre dan konpetisyon direk avek serten sekter prive. I antre dan

pharmacy. E la i dan *luxury good.* I antre dan lavyann. I al dan manze zannimo. Me se pa sa ki *SNP* ti prese. *LDS* ti prese ler zot ti pe koz lo liberalizasyon. Se pa sa ki zot ti dir ler zot ti mont en kanpanny kont *rental* later ek *US.*

Wi, zot in reisi *cancel* kontra. Me oli benefis ki'n pas ek konsonmater parey zot ti dir? Akoz pri komodite i kontinyen ogmante ziska ki *RRP* i bezwen vin *MRP?* Seselwa, sa bann fo profet ti pe zis bat zot latet. *STC* i ankor pe *trade* atraver zot bann dalon *middleman.*

Pep Seselwa, naryen pa'n sanze. Koman en parti ki *to be back in Government 2025*, nou pou re etablir nou *STC* e fer li fer son rol.

(APPLAUSE)

HON EGBERT AGLAE

Mr Speaker, mwan mon ti pou kanmi pou vin sant laglwar R63 milyon profi ki *STC* in fer lo ledo malere.

(APPLAUSE)

HON EGBERT AGLAE

STC son rol se pou kapab fer desann pri lavi e *anchor price* pou fer ki pri i abordab pour sa malere ki pe rod son komodite.

Mr Speaker, lot size ki mon anvi adrese ozordi atraver sa ladres Bidze, se ki fermye in ganny kit ater depi lentrodiksyon *subsidy* lenvestisman dan lagrikiltir ti ogmante par 40pourstan. E la avek labolisyon *subsidy*, zot pe al anmenn sa sekter lo son zenou.

Bokou ki napa sa kapital *in hands* akoz in envestir dan lenfrastriktir, *maintenance*, pey zot *loan* e travayer pe vwar li difisil pou soutenir zot biznes. Akoz sa lenpak kapital kot zot bezwen tire pou zot al aste zot manze zannimo an gro.

E la Mr Speaker, mon demande. Dan sa Bidze, oli ankourazman pou met divan anba lezel nou bann fermye? Oli divan ki zot ti prese pou fer bann biznes anvole? Zis zoli parol. Zis zoli parol, konmdir Onorab William.

Mr Speaker, Minister Lagrikiltir swivan plizyer kestyon lo sa size *animal feeds* i fer nou konpran ki pri manze enporte atraver *STC* pou pli meyer marse. Me ki nou ti vwar Mr Speaker?

Avek sa bann akter ki ti pe prodwir manze zannimo, nou'n vwar ki kantmenm Minister Lagrikiltir in antre, pri ti ogmante e zot, zot ti pe vann pri pli ba se R5. Me la mon'n fek aprann poudir ki akoz sa manze ki annan

antibiotic ladan pa pe vann, zot in fek anvoy en komunikasyon bann fermye pou dir zot pe fer pri desann, akoz fermye pa pe aste sa manze zannimo *antibiotic*.

(Interruption)

HON EGBERT AGLAE

Mr Speaker, annou koz en kou lo sa size trezyenm mwan saler. En *complete U-turn* par *LDS*. Mars an aryer. E se sa ki nou dir zot en Gouvernman kanmaron.

Yer zot ti dir trezyenm mwan saler ti zot nide. Ozordi ler zot o pouvwar, trezyenm mwan saler pe al disparate pou vin en performans bonous apre 2025. Si Seselwa i re elekte *LDS*, mwan mon dir zot *so long, goodbye* trezyenm mwan saler.

Sa pa mwan ki'n dir. Minis ki'n dir ki tou pou baze lo performans. E pou nepli annan sa mandatwar 50poursan parey zot o dir ozordi. Si parey zot ti dir e koz gro labous, lekonomi pe fer sitan byen. Akoz nou pa donn nou bann travayer ki'n travay sitan lontan e devoue. E ki zot a reste dan lanplwa pou zot kontinyen donnez dan zot karyer. Donn zot, zot *long service allowance*.

(APPLAUSE)

HON EGBERT AGLAE

Mr Speaker, mwan mon konnen akoz zot pa anvi donn sa. Akoz pa zot ki pe benefisy. E ki zot bokou serten fek vin dan Gouvernman. Selman matematik gro saler ankor pe konte lo *calculator*. Sa ki pou ganny son plis ki 200 mil pou gannyen. Sa ki pou ganny son par lao 160 mil pou gannyen. E la i ale zis ek serten.

Mr Speaker, konmdir parol, i annan man defen ki'n dir 'me zot, ase fer zerb pouse dan dezer Arab zot'.

(APPLAUSE)

HON EGBERT AGLAE

Mr Speaker, ki konfyans sa pep i kapab met dan Gouvernman ki'n ede kas tou programm sosyal ki'n pran letan e resours pou konstrir e batir par plizyer profesyonnel Seselwa.

E vwala rezulta ozordi akoz pep pe vin mizer e pep pe konplent. Si zot ti'n ekoute e kontinyen plan e en programm reabilitasyon, ozordi 3an dan zot manda plizyer ki ti'n tonm dan adiksyon ti a'n ganny sove. E ozordi ti pou napa sa o nivo kriminalite e vol dan nou pei.

LDS aksepte, ou'n fel sa group dimoun ki ti bezwen sa led. E i kler ki zot pa enterese. E okenn sa bann programm. E la ozordi ou a dir nou ou pe al

fer en *day-care* sant reabilitasyon la opposite English River *Clinic*. Come on. Annou get real.

Sa pa pou ede rezourd okenn problemm adiksyon. I pou zis en *quick fix* akoz eksper in dir ki ou bezwen en programm konpreansiv. E ou bezwen ganny plizyer sipor e sorti dan sa lanvironnman negativ pour ou kapab reisi.

Mr Speaker, kot i konsern nou Lafors Lapolis. 488 milyon in ganny mete dan Bidze. Kestyon, eski dan sa Bidze i annan lekipman modern ki enkli pou konplimant travay lapolis dan zefor pou zot konbat krim?

Eski pou annan nouvo transpor e *proper maintenance*? Eski kondisyon nou bann zofisyel lapolis pou amelyore? E sa i enkli logmantasyon zot *allowance*, anvi ki sa travay in vin pli riske, e souvandfwa zot pe ganny menase.

(APPLAUSE)

HON EGBERT AGLAE

Si nou anvi koz lo move peyer, esper sa Gouvernman ki kontan zis pran, pran, vin donn ou en pti mwenza. 10poursan logmantasyon in fini evapore dan lenflasyon. E la mon tande Mr Speaker, R40 mil pe al ganny partaze pour bann atlet *volleyball* ki'n

ganny meday lor. Harya, vre zot napa en leker e konpasyon.

(APPLAUSE)

HON EGBERT AGLAE

Mr Speaker, yer *goalpost* ti dan en pozisyon. En sel kou *goal post* i ganny met laba dan en kwen. Kisisa sa? Selman, gran selebrasyon pou onor atlet *State House*, apre en sel kou atlet i ganny en koudpye akoz douler zot transpirasyon.

Minis, mwan mon enplor ou pou pey tou zwer lekip *volleyball* madanm zot R40 mil, si zot anvi kontinyen enspir konfyans dan nou bann atlet.

(APPLAUSE)

HON EGBERT AGLAE

Mr Speaker, ledikasyon i enn ki'n ganny en lot gro Bidze. 1.4bilyon. Ankor enn fwa mon swete ki depans anver *recruitment* i materyalize e pa vin ankor avek en lot leskiz dan *Mid-Year Review Budget cut*. E bokou *teachers* i dezapwente e santi ki sa larzan ti kapab ganny depanse e al ver aste, par egzanp bann nouvo liv pour etidyan. Re etablir nou bann *library* kot i annan bann liv ki'n ganny *right off*. Envestir dan plis *computers* dan *library*. E *promote research* e *digital literacy*.

E osi etablir en meyer sistem *database* dokiman neseser pour lavansman ledikasyon e osi pou kapab annan en bon *scheme* pour nou bann *librarian*.

Mr Speaker, me pa sa ki *LDS* i enterese. Zot zis enterese ki nou pou vin dir zot in fer *savings*. Petet i annan i a dir mwan mon pe egzazere dan plas dir sa pep Seselwa fer donasyon pour liv *library*. I ti a'n pran sa larzan e aste.

E la Mr Speaker, zot in blye lekel ki ti konstrir sa *library* ki nou apel *Library* Nasyonal. Zot in blye kot zot ti ete le 3 Oktob. Ki mannyer sa *building* ti apele letan zot ti pe rasanble. Alors, *Library* Nasyonal ti la li. Be mwan mon krwar Mr Speaker...

Mr Speaker, mon le koz osi lo size *TVET*. Sa lekol ki ti pe al ganny fer. E mon anvi konnen, pour ki rezon ki Gouvernman in pran en desizyon pou pa konstrir sa lekol, dapre mon konpran? Ki annan en merit.

E ki zot - e kestyon, se ki zot pou fer avek sa plis ki 15 *teachers* ki'n ganny *training*. E dabor i annan 6 sa bann *teachers* ki ankor Lasin. Mr Speaker, se sa ki nou dir zot, zot en Gouvernman kanmaron.

(APPLAUSE)

HON EGBERT AGLAE

Yer zot vini zot pran en desizyon. E demen bomaten apre ki zot in lav zot figir e get dan laglas, zot deside sanz desizyon. Kisisa tousala? Lepep pe zize zot menm.

Mr Speaker dan sa Bidze 10.4 milyon, mon distrik Port Glaud in ganny kit ater. Akoz mon dir sa? Premyerman ler mon regard bann proze *CAPEX*, dan tou distrik *LDS* in rapporte, i annan proze.

Alors Minis, mon oule konnen ki pou arive? Akoz letan mon'n get dan ou bann proze, ki pou arive avek proze lakaz *Ex SACOS* Beolière ki orizinalman Minis ti dir pou annan 60 *unit*. Nou'n fer vizit. Nou'n konsilte. E tou dernyerman, Minis i dir pou annan pou redwir pou vin 40 *unit*. Mon kestyon alor, mon pa'n vvar dan Bidze. Alors kan ki sa *projet* pou ganny enplimante?

Dezyenmman, proze *land bank*, Port Launay *plateau*, lenfrastriktir semen ziska kot lafanmir Uzice. Mon pa vvar naryen ki'n ganny mete dan sa Bidze. Pourtan mon'n vvar i annan proze *land bank* dan 4 rezyon.

E pourtan Minis li menm li ti monte ti dir i annan potansyel. Port Glaud i annan en kantite later pou devlope. Me selman mon pa vvar zot met larzan pour devlopman sa

bann *land bank*. E ki plis Seselwa i ava kapab ganny zot kare later ki pe ganny espere.

Trwazyenmman, larzan pou proze mitigasyon delo sale lo devan Vilaz Prezidan Mr Speaker. I fer 3 an la a 2 repriz. R800 mil i ganny mete dan Bidze. Proze pa zanmen konmanse. Zot ankor pe fer letid. Minis, be kan eski sa proze pou demare?

Katriyenmman Mr Speaker, proze STP pour rezyon Port Launay. In dir poudir pou annan larzan dan Bidze. Me, mon pa vwar. Mr Speaker, mon ankor pe esper CEO SIA pou vin vizit Port Glaud.

Akoz i paret mwan bokou zot pa anvi vini Port Glaud. Pa konnen ki zot per ek Port Glaud. Mwan mon dir zot vin Port Glaud. Vin vizite zot a vwar problem. Akoz dan *meeting*. Dan zot *meeting* piblik, piblik ti met devan zot konsern. E si zot anvi adrese, fer mannyer zot adres li.

Mr Speaker, proze semen pour fermye Des Arpents. Ankor nou ankor pe espere. Napa larzan dan Bidze. E SAA ti vizite. Ti dir pou mete dan proze dan Bidze 2024. E la lafanmir Joubert, lafanmir Alphonse, lafanmir Laporte ankor pe espere, Mr Speaker.

Pa mwan ki'n fer sa bann promet ek zot. Se zot menm ki dir zot pou fer. Be ler zot dir en

keksoz, be fer. E se sa ki mon dir poudir Port Glaud in ganny kit ater atraver sa Bidze.

Par kont Mr Speaker, mon vwar zot in met logmantasyon dan Bidze pour *small project*. Me sa ki mon ankor pe enplor avek *Local Government* pou zot konmans enplimant bann proze pli boner posib konmansman lannen. Pou evit bann *last minute* tay isi, tay laba. E vin met presyon lo Lotorite Distrik.

E mon pe demande osi ki zot revwar sa *scope maintenance* lo lofis ladministrasyon distrik Port Glaud, akoz mwan mon santi poudir sa *building* i en vye *building*. In ler pou kraze e fer enn ki nouveau parey zot pe fer dan bann lezot distrik.

MR SPEAKER

30 minit Onorab.

HON EGBERT AGLAE

Mr Speaker, Bidze in fer provizyon pour *Home Care Agency*. Me mwan avan mon koz lo *carer*, mon anvi dir Gouvernman ki sa *meeting* ki zot in fer avek bann dimoun aze tou resaman. Ki zot pe demande pou pey R1000 i vreman mal, Mr Speaker.

Nou bann dimoun aze, pansyoner, pa'n ganny logmantasyon dan pansyon. Akoz ki zot pe vin met en

burden ankor R1000 pou peye letan zot pe reste dan sant. Silvouple, sey rekonsider.

MR SPEAKER

Ou a konklir Onorab silvouple.

HON EGBERT AGLAE

Mr Speaker, an konklizyon size *part rental* e lasistans sosyal. Wi, larzan in ganny mete. Selman, ki kantite ki benefisye? Ki kantite ki'n ganny dezapwente menm si zot ti merite? Zot in etablir en prosedir ki *cumbersome* ki parfwa i plis ki en mwan pou espere.

Alors, mon demann zot. *Come on! Get real* letan zot in dir zot in met larzan. Larzan i zis sif *in black and white*. Me pep pa pe gannyen. An terminan Mr Speaker, mon le remersye tou staff Ladministrasyon Distrik...

(*Interruption*)

MR SPEAKER

Silvouple!

(*Interruption*)

MR SPEAKER

Eh!

HON EGBERT AGLAE

Mr Speaker, an ter...

MR SPEAKER

Nou a ganny lord!

HON EGBERT AGLAE

Mr Speaker, an terminan mon le felisit e remersi tou bann *staff* ladministrasyon distrik ki pe fer louvraz. E mon demann zot pou kontinyen donnez e reste angaze. E Mr Speaker, nou konman Manm Lasanble nou responsab. Nou pa ti a kontan vwar serten nou bann Manm pe taye demi touni ler zot al zot bann fonksyon.

(*laughter*)

(APPLAUSE)

HON EGBERT AGLAE

(*off-mic*)

Mr Speaker, mersi. US Sesel, mersi.

(APPLAUSE)

MR SPEAKER

Bon. Alor mersi bann Manm pour zot kontribisyon dan deba lo Bidze. Mon'n, en pti remark. Mon'n vwar ki ozordi en kantite Manm in komans servi bann term ki pa dan langaz parlamanter, e zot konn byen. Mon le zis fer zot rapel ki zot legzanz pour bann dimoun deor. E dimoun i deza annan kritik lo konportman Manm Lasanble.

So, annou pa al dan sa direksyon e azout en lot kritik ankor.

Silvouple, si i annan ki'n met bann term dan zot *speech*, reviz li. Koumsa nou pa gannyen demen. Mersi bokou. Mersi Minis pour ou latansyon. Lasanble ava *adjourn* e i a repran deba demen bomaten 9er. *Adjourn*.

(ADJOURNMENT)